

ማቶሲ ጸፊዳ ኑ ጎዳ ዩሱስ ኪርስቶስ ሚሺራቾ ቃላ ጊዶ ቆፋ

ማቶሳ ሚሺራቾ ቃላይ፡ ዩሱስ ኪርስቶስ ቡሮፔ ያናይሳ ሲንሳሲዱ ኢዛ ገሻስ የቲቲዳ ዴሬ አሻናዴይ ኢዛ ጊዱዳይሳኔ ጸሲ ካሴ ጋልኦ ጫቆ ማጻፋን ባ ዴሬዛስ ኢሚዳ ሂዶታ ቃላ ኩንሲዳይ ኢዛ ባጋራ ጊዱዳይሳ የቲዛ ሚሺራቾ ቃላራ ዴስ። ሄሲካ ሄ ሚሺራቾ ቃላይ፡ ዩሱስ ኪርስቶስ ኢስታ ጊዶን ዩሌቲ ዲጪዳ ኣይሁዳ ኣሳስ ጸላላ ጊዶንታ ኣላሚ ኣሳስ ኩሚላሳ።

ማቶሳ ሚሺራቾ ቃላይ፡ ዳሮፔ ናጌቲላን ጊጌቲዳ ማጻፋ። ማጻፋዚ ኮይሮፔ ዩሱሳስ ዩሌታ ገሻስ የቶ ዶሚዲ ኢዛ ጸንቃታ ገሻሲኔ ኢዚ ፓጩቲዳ ፓጩዛ ሎኤሊ የቲዳፔ ጉዬ ኢዚ ጋለላ ዴሬን ሳባኪዳይሳ፡ ታማርሲዳይሳኔ ኣሳ ሃርጌሬ ፓሊዳይሳ ቆንጪሴስ። ቃሴካ ዩሱሲ ጋለላ ዴሬፔ ዩሩሳላሚ ቢዳይሳ፡ ኢዚ ሃይሳ ሃ ኣላሚዛ ቦላ ዴኢዳ ዴኦ ገሻሲኔ ሃ ኣላሚዛ ቦላ ጋምኢዳ ወርሴላ ላይላን ወርሴላ ሳሚንታን ሃኒዳ ሃኖታ ገሻስ የቲስ። ሄይቲካ ዩሱሲ ካቂቲዳይሳ፡ ሃይቂዳይሳኔ ሃይቆፔ ዴንዲዳይሳ።

ሃ ሚሺራቾ ቃላዚ፡ ዩሱሲ ጸሳ ዋጋ ቢርሻናስ ኢዛስ ጎዳቴሊ ዲዛዴኔ ጸሳ ካዋቲላ ገሻስ ታማርሲዛ ጊታ ኣስታማሬ ሂስቲ ሺሼስ። ኢዛ ቲሚርቲዛፔ ዳሪዛ ባጋይ ኢቻሹ ዱማ ዱማ ኪፊሌን ሻኬቲስ።

1. ጸሳ ካዋቲላን ዲዛይታ ሃኖ፡ ኢስታ ኦሶ፡ ኢስታ ሼኔ፡ ኢስቲ ሃናና ማላ ኢስታስ ቤሲዛዚኔ ኢስታስ ቤሲዛ ወርሴላ ኤጸ ሻኪ ኤሪሲዛ ዙማ ቦላ ሳባኪዳ ቃላ (ሼምፖ 5-7)
2. ታማኔ ናምኡ ኢዛ ኣሽካራቲ ሚሺራቾ ቃላ የታናስ ኪቲቲ ቢሺን ኢስታስ ኢሜቲዳ ዋጋታ (ሼምፖ 10)
3. ጸሳ ካዋቲላ ገሻስ ሺቂዳ ዱማ ዱማ ሌሚሶታ (ሼምፖ 13)
4. ዩሱሳ ዋስቲ ካላናኮን ኢስታስ ጌላና ማላ ኢሜቲዳ ቲሚርቲ (ሼምፖ 18)
5. ሃይሳ ሃ ዋዴዛ ወርሴላ ገሻሲኔ ጸሳ ካዋቲላይ ያናይሳ ገሻስ ኢሜቲዳ ቲሚርቲ (ሼምፖ 24-25)

ሃ ማጻፋይ ኦይኪዳ ኩሜላ ቆፋ

ዩሱስ ኪርስቶስ ዩሌታ ዛርኬኔ ኢዛ ዩሌታ 1:1—2:23

ጸማቂዛ ዮሃንሳ ኦሶ 3:1-12

ዩሱስ ጸማቂቴሲኔ ኢዛ ፓጩቴላ 3:13—4:11

ዩሱሲ ጋሊላን ኦሶ ዶሜላ 4:12—18:35

ዩሱሲ ጋሊላፔ ዩሩሳላሚ ቡስ 19:1—20:34

ዉርሴላ ሳሚንታን ዩሱስ ጋኪዳ ሜቶታ 21:1—27:66

ዩሱሲ ሃይቆፔ ዴንዲ ቤቴዴስ 28:1-20

ዩሱስ ኪርስቶስ ዩሌታ ዛርኬ

(ሉቃ 3:23-38)

¹ ዳዊቴ ና፥ ኣብራሃሚ ና ጊዲዳ ዩሱስ ኪርስቶስ ዩሌታ ዛርኬይ ሃይሳፌ ካሊዛይሳ፤

² ኣብራሃሚይ ዩሳቃ ዩሊዴስ፤ ዩሳቂ ያቆቤ ዩሊዴስ፤ ያቆቤይ ዩሁዳኔ ኢዛ ኢሻታ ዩሊዴስ፤

³ ዩሁዳይ ቲማሪፔ ፋሬሴኔ ዛራ ዩሊዴስ፤ ፋሬሴይ ኤስሮሚ ዩሊዴስ፤ ኤስሮሚይ ኣራሚ ዩሊዴስ፤

⁴ ኣራሚይ ኣሚናዴቤ ዩሊዴስ፤ ኣሚናዴቤይ ኔኣሶኔ ዩሊዴስ፤ ኔኣሶኔይ ሶሎሞኔ ዩሊዴስ፤

⁵ ሶሎሞኔይካ ቦኤዜ ኤራቢፔ ዩሊዴስ፤ ቦኤዜይ ኡሩቴፔ ኢዮቤዳ ዩሊዴስ፤ ኢዮቤዳይ ኢሴዬ ዩሊዴስ፤

⁶ ኢሴዬይ ካዎ ዳዊቴ ዩሊዴስ፤ ዳዊቴ ኦሪዮ ማቼይፌ ሶሎሞኔ ዩሊዴስ።

⁷ ሶሎሞኔይ ኤርቢኣሚ ዩሊዴስ፤ ኤርቢኣሚይ ኣቢያ ዩሊዴስ፤ ኣቢያይካ ኣሳፌ ዩሊዴስ፤

⁸ ኣሳፌይ ኢዮሳፊዶ ዩሊዴስ፤ ኢዮሳፊዶይ ኢዮራሚ ዩሊዴስ፤ ኢዮራሚይ ኦዚያ ዩሊዴስ፤

⁹ ኦዚያይ ኢዮኣታሚ ዩሊዴስ፤ ኢዮኣታሚይ ኣካዜ ዩሊዴስ፤ ኣካዜይ ሂዝቂያሳ ዩሊዴስ፤

¹⁰ ሂዝቂያሳ ሚናሴ ዩሊዴስ፤ ሚናሴይ ኣሞጾ ዩሊዴስ፤ ኣሞጾይ ኢዮሲያሳ ዩሊዴስ፤

¹¹ ኢዮሲያሳ ባቢሎኔ ዲኦ ላይላ ኢኮኒያኔኔ ኢዛ ኢሻታ ዩሊዴስ።

¹² ባቢሎኔ ዲኦፔ ጉዬ ኢኮኒያኔይ ሳላቴያሌ ዩሊዴስ፤ ሳላቴያሌይ ዜሩባቤሌ ዩሊዴስ፤

¹³ ዜሩባቤሌይ ኣቢዮዳ ዩሊዴስ፤ ኣቢዮዳይ ኤልያቂሚ ዩሊዴስ፤ ኤልያቂሚይ ኣዛሬ ዩሊዴስ፤

14 አዛሬይ ሳዶቄ ዩሊዳስ፤ ሳዶቄይ አኪሜ ዩሊዳስ፤ አኪሜይ ኤሊዮዳ ዩሊዳስ፤

15 ኤሊዮዳይ አላዛሬ ዩሊዳስ፤ አላዛሬይ ማታኔ ዩሊዳስ፤ ማታኔይ ያቆቤ ዩሊዳስ፤

16 ያቆቤይካ ኪርስቶሳ ጌቴቲዳይሳ ዩሱሳ ዩሊዳ ማራሞ ኤካና ጊግሲዳ ዮሴፌ ዩሊዳስ። *

17 ሄሳ ጊሻስ አብራሃሜ፤ ዪዲ ዳዊቴ ጋካናስ ታማኔ ኦይዱ ዩሌቴል፤ ቃሴ ዳዊቴ፤ ባቢሎኔ ዲኦ ዋዴ ጋካናስ ታማኔ ኦይዱ ዩሌቴል፤ ባቢሎኔ ዲኦቴ ኪርስቶሳ ዩሌታ ጋካናስ ታማኔ ኦይዱ ዩሌታ ጌዴስ።

ዩሱስ ኪርስቶሳ ዩሌታ

18 ዩሱስ ኪርስቶሳ ዩሌታ ታሪኬይ ሃይሳፌ ካሊ ዲዛይሳ፤ ኢዛ አዮ ማራማ ዮሴፌስ ጊጌታ ዲሺን ኢዚ ኢዚራ ጋይቶንታ ጸሎ አያናን ቃንፋታዳ ቤታዴስ።

19 ኢዛ ጊግሲዳ ዮሴፌይ ጸሎ አስ ጊዲዳ ጊሻስ ማራሞ አሳ ሲንፋን ቆንጮ ኬሶንታ ቆታራ አጋናስ ባ ዋዚናራ ቃቺዴስ።

20 ሃይሳ ኢዚ ቆፒሺን ጸሳ ኪታንቻይ አጉሞራ ኢዛስ ቆንጮዲ፤ «ዳዊቴ ና ዮሴፌ! ኔ ጊግሲዳ ማራማ ቃንፋቲዳይ ጸሎ አያናን ጊዲዳ ጊሻስ ኢዛ ኔሶ ኤፋናስ ባቦ።

21 ኢዛ አቱማ ና ዩላና፤ ኢዚ አስ ናጋራ፤ አሻናዴ ጊዲዳ ጊሻስ ኢዛ ሱንል ኔ፤ «ዩሱሳ» ጋ ሱንፋና» ጌዴስ።

22-23 ጎዳይ ናቤ ኢሳያሳ ዶናን፤ «ሄኮ! ጌላኦይ ቃንፋታና፤ አቱማ ናካ ዩላና፤ ናዛ ሱንፋይካ አማኑኤሌ ጌቴታና፤ ሄሳ ቢርሼሊካ፤ «ጸሲ ኑናራ ዴስ» ጌቴቲዲ ዳፌቲዳይሲ ፖሌታና ማላ ሃይሲ ወሪካ ሃኒዴስ» ጌዴስ።

24 ዮሴፌይካ ቂስኮፌ ቤጊዲ ጎዳ ኪታንቻይ ኢዛ አዛዚዳ ማላ ማራሞ ባሶ ኤፌዴስ።

25 ጌዶ አቲን ባዳ ኢዛ ኮይሮ ናዛ ዩላና ጋካናስ ኢዛ ኤኪቤና። ዩሌቲዳ ጉፋ ናዛ ሱንፋ፤ «ዩሱሳ» ጌዴስ።

2

አርሼይ ሞኪዛ ባጋፌ ዪዳ ኤራንቻታ

* 1:16 ኪርስቶሳ ኪርስቶሳ ጉሲ፤ «ማሲሄ» ዋይኮ «ቲዬቲዳይሳ» ጉሳ። 1:18

ሉቃ 1:27

1:21 ሉቃ 1:31

1:22-23 ኢሳ 7:14

1:25 ሉቃ 2:21

1 ካዎ ሄርዶስ ዋዴ ዩሱሲ ቤቴሊሄሜ ዩሁዳን ዩሌቲዳፔ ጉዩ ኣርሼይ ሞኪዛ ባጋፌ ኤራንቻቲ ዩሩሳላሚ ዩዲ፥

2 «ዩሌቲዳ ኣይሁዳ ካዎይ ኣዋን ዲዜ? ኣዋ ኣርሼይ ሞኪዛ ባጋራ ዲዛ ጸለንቴዛ ቤኢዲ ኢዛሰ ጎይናና ዩዶስ» ጊዲ ኦይቺዳ።

3 ካዎ ሄርዶሲ ሄሳ ሲዩዲ ዳጋሚዴስ፤ ዩሩሳላሚን ዲዛ ኣሳይ ዉሪ ኢዛራ ዳጋሚዴስ።

4 ኢዚካ ቄሴታ ሃላቃታኔ ዋጋ ታማርሲዛይታ ኡባ ሺሺዲ፥ «ከርሰቶሲ ኣዋን ዩሌታኔ?» ጊዲ ኦይቺዴስ።

5-6 ኢስቲካ ኢዛሰ፥ «ናቤይ፥ ቂሁዳ ቢታን ዲዛሬ ሃኔ ቤቴሊሄሜ!

ታ ዴሬ ኢስራኤሌ ናጊዛዴይ

ኔፔ ኬዛና ጊሻስ

ሃንኮ ዩሁዳ ሃሪዛይታፔ

ኣዛንካ ጉጸካ፥

ጊዲ ጸፊዳ ጊሻስ ኢዚ

ቤቴሊሄሜ ዩሁዳን ዩሌታና»

ጊዲ ዮቲዳ።

7 ሃሳፌ ጉዩ ሄርዶሲ ሄ ኤራንቻታ ጌማራ ጳይጊሲዲኔ ኢስታ ሃሳይሲዲ ጸለንቴዚ ኢስታሰ ቤቲዳ ዋዴዮ ሻኪ ኤሪዴስ።

8 ኤራንቻታ ቤቴሊሄሜ ዩዲዲ፥ «ቢዲ ጉላ ናዛ ኮዩቲ፥ ታኒካ ባዳ ኢዛሰ ጎይናና ማላ ዴሚዳ ማላ ሃ ታኮ ሲሚዲ ኢዚ ኣዋን ዲዛኮን ታሰ ዮቲቲ» ጊዴስ።

9 ኤራንቻቲካ ካዎይ ኢስታሰ ጊዳይሳ ሲዩዳፔ ጉዩ ሲሚ ቢዳ፤ ኣርሼይ ሞኪዛ ባጋራ ኢስታሰ ቤቲዳ ጸለንቴይ ኢስታ ካሌሊዲ ጉላ ናዚ ዲዛሶ ጋሊዴስ።

10 ኢስቲ ጸለንቴዛ ቤኢዲ ዳሮ ኡፋዬቲዳ።

11 ኬሌ ጌሊዲ ጉላ ናዛ ኢዛ ኣዮ ማራሚራ ዴሚዲኔ ጉልባቲዲ ኢዛሰ ጎይኒዳ፤ ባ ሳጺኔ ሳጺኔ ዶይዲ ዋርቃ፥ ኤጸኔኔ ካርቤ ጌቲቲዛ ሚሽ ኢዛሰ ኢሚዳ።

12 ኢስቲ ሄርዶሳኮ ሲሞንታ ማላ ኣጉሞን ኬሂ ናጌታና ማላ ጌቲቲዳ ጊሻስ ሃራ ኦጌራ ባ ዴሬ ሲሚዳ።

ጊብጾ ቢታ ቤቲ ቡስ

13 ኤራንቻቲ ቢዳፔ ጉዩ ጎዳ ኪታንቻይ ዮሴፌስ ኣጉሞራ ቤቲዲ፥ «ሄርዶሲ ጉላ ናዛ ዋፋና ኮይዛ ጊሻስ ኔ ሲማና ዋዴ ታ

ነና ኤሪሳና ጋካናስ ዴንዲዳ ጉላ ናዛ አዬይራ ኤኪዳ ዱጌ ጊብጼ ቢታ ባቃታዳ ሄን ዳሻ» ጊደስ።

14 ሄሳ ጊሻስ ዮሴፌ ዴንዲዳ አዬዮ ናዛራ ኤኪዳ ጊዶላራ ዱጌ ጊብጼ ቢታ ቢደስ።

15 ሄርዶሲ ሃይቃና ጋካናስ ሄን ዴኢደስ። ሄሳንካ፥ «ታ ናዛ ታ ጊብጼ ቢታፌ ጸይጋዲስ» ጊዲ ጎዳይ ካሴ ናቤ ዶናን ሃሳይዳይሲ ፖሌቲደስ።

16 ኤራንቻቲ ኢዛ ባሌሊዳይሳ ኤሪዳ ዎዴ ሄርዶሲ ኮሂ ሃንቁቲደስ። ኤራንቻቲ ኢዛስ ካሴ ዮቲዳ ማላ ባ እስ ከቲዲ ናምኤ ላይሴ ናምኤ ላይሳ ኩሞንታይታ ቤቴሊሄሜኒኔ ቤቴሊሄሜ ዩሾን ዲዛ ጉላ አቲማ ናይታ ኡባ ዎዲሲደስ።

17-18 ሄሳን፥ «ዬሆይኔ ጊታ ዋሶ ጊሪሳይ

ኤራማን ሲዬቲደስ፤

ኢራኤላ ባ ናይታስ ዩካዲስ፤

ናይቲ ወሪ ወሪዳ ጊሻስ

ሚናናስ ዳንዳዮንታ ኢዳዲስ»

ጌቲቲዲ ናቤ ኤርማሳን

ዮቲቲዳይሲ ፖሌቲደስ።

ጊብጼፔ ናዚሬቲ ሲሞ

19 ሄርዶሲ ሃይቁዳፔ ጉዬ ጎዳ ኪታንቻይ አጉሞራ ዮሴፌስ ጊብጼ ቢታን ቤቲዲ፥

20 «ዴንዲዳ ጉላ ናዛኔ ኢዛ አዬዮ ኤኪዳ ኢሰራኤሌ ቢታ ሲማ፤ ናዛ ዎቆና ኮይዛይቲ ሃይቁዳ» ጊደስ።

21 ዮሴፌይ ዴንዲዳ ናዛ አዬይራ ኤኪዳ ኢሰራኤሌ ቢታ ሲሚደስ።

22 ጊዶ አቲን አርካላዎሴይ ባ አዋ ሄርዶሳ ሶሆን ዩሁዳን ካዎቲዳይሳ ሲዬዲኔ ሄ ባናስ ባቢደስ፤ ጎዳይ አጉሞራ ኢዚ ሄ ቦንታ ማላ ዮቲዳ ጊሻስ ጋለላ አወራጃ ቢደስ።

23 ናዚሬቲ ጌቲቲዛ ካታማዮ ቢዲ ሄን ዱስ ኦይኪደስ። ሄሳንካ ካሴ ናቤታን «ናዚሬቲ እስ ጌቲታና» ጌቲቲዲ ሲንሳፌ ሃናይሳ ካሴቲ ዮቲቲዳይሲ ፖሌቲደስ።

3

ጸማቂዛ ዮሃኒሳ ሳባኮ

(ማር 1:1-8፤ ሉቃ 3:1-18፤ ዮሃ 1:19-28)

1-2 ሄ ዎዴ ጸማቂዛ የሃኒሲ አሳስ፥ «ሳሎ ካዎቴሊ ማቲዳ ጊሻስ ኢንቴ ናጋራፔ ሲሚቴ» ጊ ሳባኪሼ የሁዳ ባዘራ ዪዴስ።

3 «ሳዳ ኦጌ ኦሊቴ፤

ዎጋ ኦጌዛካ ሎኤሊቴ

ጊሼ ባዘ ቢታን

ዋሲዛ ቃላ»

ጌቴቴዲ ካሴ ናቤ ኢሳያሳን

ዮቴቴዲይሲ የሃኒሳ

ጊሻሳ።

4 የሃኒሲ ጋሜላ ኢስኬፌ ኦሴቲዳ ማይኦ ማይኤስ። ባ ጾሳን ዳፎ ጊጼስ፤ ኢዚ ሚዛ ቁማይ ዴጌራ ኤሲኔ ቦሌ።

5 ዬሩሳላሜ፤ ኩሜላ የሁዳፔኔ ዮርዳኖሴ ሻፋ ማታን ዲዛ ዴሬ አሳይ ዉሪ የሃኒሳኮ ዎዲዲ፤

6 ባ ናጋራካ ኢዛስ ፓጺሼ ዮርዳኖሴ ሻፋን ኢዛ ኩሼን ጸማቂቴዴስ።

7 ዳሮ ፋርሳዌቴኔ ሳዱቃዌቲ ኢዚ ጸማቂዛሶ ዪሺን ቤኢዲ የሃኒሲ፥ «ኢንቴኖ ሾሻቶ! ኢንቴ ሲንላራ ዲዛ ሃንቆፌ አታና ማላ ኢንቴና ኦኒ ቤሲዴ?

8 ኢንቴ ኢንቴ ናጋራፔ ሲሚዳይሳ ቤሲዛ ኦሶ ኦሊቴ።

9 ኦኦ አዋይ ኣብራሃሜይ ኦስ ዴስ፤ ጊዛይሳን ኢንቴርካ ኢንቴና ባሌላፍቴ፤ ታ ኢንቴስ ጸሲ ሃይታ ሹቻታፔ ኣብራሃሜስ ና ሂስቲ ዴንላናስ ዳንዳዬስ ጋይስ።

10 ሄኮ ካልታይ ቃንጸናስ ሚላታ ጋርሳን ጊጌቲ ኡቲዴስ፤ ሄሳ ጊሻስ ሎኦ ኣይፌ ኣይፎንታ ሚሊ ዉሪ ቃንጾታናኔ ታማን ዬጌታና።

11 ታኒ ማሮቴላስ ሃላን ጸማቃይስ፤ ሃራይ አቶሺን ታ ኢዛ ጫማ ቶካናስ ቤሶንታዴይ ታፔ አዲዛ ሚኖይ ጉዬራ ያና፤ ኢዚካ ጺሎ ኣያናኒኔ ታማን ኢንቴና ጸማቃና።

12 ካሐ ሱራጊዛ ላይዳይ * ኢዛ ኩሼን ዴስ፤ ኢዚካ ባ ካላ ባሌዛ ፒቲ ጌሻና፤ ባ ጊስቴዛካ ዲኤን ቆላና፤ ሃፓ ጊዲኮ ቶኦንታ ታማን ጹጋና» ጊዴስ።

ዬሱሳ ጸማቂቴሐ

(ማር 1:9-11፤ ሉቃ 3:21-22)

3:1-2 ማቶ 4:17፤ ማር 1:15 3:3 ኢሳ 40:3 3:4 2ካዎ 1:8 3:7

ማቶ 12:34፤ 23:33 3:9 ዮሃ 8:33 3:10 ማቶ 7:19 * 3:12 ካሐ ሱራጊዛ ላይዳ ጊዛይሳ ኣማራላ ቢርሼላይ ሚንሼ ጌስ፤ ሄሳ ጊሻስ ኦኒ ላይዳ ጊዛይሳ ሚስሌን ጎኡቲዶስ።

13 ሄ ዋዴ ዩሱሲ የሃኒሳን ጸማቂታናሰ ጋሊላፔ ዮርዳኖሴ ሻፋ ቢዴሰ።

14 ጊዶ አቲን የሃኒሲ፥ «ሃይሲ ሃኒና፤ ታኒ ኔናን ጸማቂታና ቤሲሺን ኔኒ ዋናዳ ታኮ ያይ?» ጊዱ ኢዛራ ማርሼቲዴሰ።

15 ዩሱሲካ፥ «አይኮይ ባ፥ ኤሮ ጋርኪ? ሃይሳ ኦሊዱ ኮኒ ጸሎቴል ኡባ ፖላናሰ ኑሰ ቤሴሰ» ጊዴሰ። የሃኒሲካ ኢዛ ቆፋ ኤሮ ጊ ኤኪዴሰ።

16 ዩሱሲ ጸማቂቲዱ ሃላፌ ኬዚዳ ማላ ሄራካ ሳሎይ ዶዬቲን ጸሳ አያናይ ሃራጼ ሚሳቲዱ ኢዛ ቦላ ዋዲሺን ቤዩዴሰ።

17 ሳሎፔካ፥ «ታኒ ኢዛን ኡፋዬቲዛ ናዚኔ ታ ሲቂዛ ታ ናዚ ሃይሳ» ጊዛ ቃላይ ሲዬቲዴሰ።

4

ዩሱሳ ፓጩቴል

(ማር 1:12-13፤ ሉቃ 4:1-13)

1 ሃሳፌ ጉዬ ጸሎ አያናይ ጸላኤን ፓጩታና ማላ ዩሱሳ ዱጌ ባዞ ቢታ ኤፊዴሰ።

2 አይዱ ታሙ ጋላሲኔ ኦይዱ ታሙ ቃማ ጸሚዳፔ ጉዬ ዩሱሲ ጋፊዴሰ።

3 ፓጩዛይሲ ዩሱሳኮ ሸቂዱ፥ «ኔ ጸሳ ና ጊዱኮ እኔ ሃይታ ሹቻታ ኡኬል ጊዳና ማላ አዛዛ» ጊዴሰ።

4 ዩሱሲካ፥ « ላሲ ጸሳ ዶናፔ ኬዚዛ ቃላንፔ አቲን ካላን ጸላ ዴና፤ ጌቲቲ ጸፊቲዴሰ» ጊዱ ኢዛሰ ዛሪዴሰ።

5 ቃሴካ ጸላኤይ ዩሱሳ ጌሻ ካታማዮ ኤፊ ጸሳ ኬላ ቁሰቴ ቦላ ኬሲዱ፥

6 «ኔ ጸሳ ና ጊዱኮ እኔ ሃይሳፌ ዱጌ ጉፓ፤ አይሰ ጊኮ

« ላኔ ቶሆይ ሹቻን ጳጳቶንታ ማላ

ኪታንቻቲ ባ ኩሼራ ኔና

ኦይኪ ዴንላና ማላ ኔ ጊሻሰ

ጸሲ ባ ኪታንቻ ኪታና

ጌቲቲ ጸፊቲዴሰ» ጊዴሰ።

7 ዩሱሲካ፥ «ጌሻ ማጸፋን፥ ሳዳ ኔ ጸሳ ፓጩፋ፤ ጌቲቲ ጸፊቲዴሰ» ጊዱ ዛሪዴሰ።

8 ቃሴካ ጸላኤይ ዩሱሳ ኬሂ ቶቃ ዙማ ቦላ ኬሲዲ ሳሎ ጉፋንሉን ዲዛ ካዎቴላ ቦንቸዛራ ኡባ ኤሂ ቤሲዲ፤

9 «ኔ ኩንዳዳ ታስ ጎይኒኮ ሃይሳ ኡባ ታ ኔስ ኢማና» ጌዴስ።

10 ዩሱሲ፡ «ሃይሶ ጸላኤ! ታ ሲንላፌ ኔ ሃካ! ሳኒ ጎዳ ኔ ጸሳስ ጎይና፤ ኢዛስ ጸላላ ኣዛዜታን ጌቴቲ ጌሻ ማጸፋን ጸፊቲዴስ» ጌዴስ።

11 ሃሳፌ ጸላኤይ ኢዛ ኣጊዲ ቢዴስ፤ ኪታንቻቲካ ዩዲ ኢዛ ማዲዳ።

ዩሱሲ ሳባኮ ዶሜሐ

(ማር 1:14-15፤ ሉቃ 4:14-15)

12 ዩሱሲ፡ ዮሃኒሲ ቃሼቲዳይሳ ሲዩዲ ጌዴ ጋለላ ሲሚዴስ።

13 ናዚሬቴ ካታማ ኣጊዲ ዛቢሎኔ ኒፍታሌሜ ሄራን ኣባ ማታን ዲዛ ቂፊርናሆሜ ካታማን ዱስ ኦይኪዴስ።

14-16 «ሄሳን ዛቢሎኔኒኔ ኒፍታሌሜ ቢታን፤

«ዮርዳኖሴፔ ሄ ፒንሳን

ኣባ ላንቄራ ኤፊዛ ኦጌ ማታን ዲዛ

ኣይዛቤ ጊዲዳ ጋለላ ዴሬ ኣሳይ፤

ቋማን ዲዛ ዴሬይ

ዎልቃማ ፖኦ ቤዩዴስ።

ሃይቆ ኩዋ ጊደን ዲዛ ዴሬስ

ፖኦይ ፖኢዴስ»

ጌቴቲዲ ናቤ ኢሳያሳ ዶናን ካሴቲዲ ሃሳዬቲዳይሲ ፖሌቲዴስ።

17 ዩሱሲ ሄ ዎዴፔ ሃ ሲሚን፤ «ሳሎ ካዎቴላ ማቲዴስ፤ ማርታን ጌለቲ» ጊዲ ሳባኮ ኦይኪዴስ።

ኮይሮ ዩሱሳ ካሊዳይታ ጴይጌቴሐ

(ማር 1:16-20፤ ሉቃ 5:1-11)

18 ዩሱሲ ጋለላ ኣባ ላንቄራ ኣፋሼ ናሞኡ ኢሻንታ፤ ሄይቲካ ጴጽሮሳ ጌቴቲዛ ሲሞናኔ ኢዛ ኢሻ ኢንዲራሳ ቤዩዴስ። ኢስቲካ ሞሌ ኦይኪዛይታ ጊዲዳ ገሻስ ሞሌ ኦይኪዛ ጌቲ ኣባን ዩጊሼ ዴቴስ።

19 ዩሱሲ ኢስታ፤ «ሃ ዩቴ! ታና ካሊቲ! ታ ኢንቴና ኣስ ኦይኪዛ ኣስ ኬሳና» ጌዴስ።

20 ኢስቲ ሄራካ ሞሌ ኦይኪዛ ጌቲዛ ዩጊ ኣጊዲ ዩሱሳ ካሊዳ።

21 ጉል ሲንሌ ቢሼ ሃራ ናምኡ አሻንታ ዛብደሳ ና ናምኦታ ያቆቤኔ ዮሃንሳ በዪዴስ፤ ኢስቲካ ባ ኣዋ ዛብደሳራ ዋሳሎ ጊደን ሞሌ ጊቲ ሎኤሌቴስ። ዬሱሲካ ኢስታ ጸይጊን

22 ኢስቲ ሃራካ ዋሳሎዛኔ ባ ኣዋ ኣጊዲ ኢዛ ካሊዳ።

ዬሱሲ ሃርጊዛይታ ፓሊዴስ
(ሉቃ 6:17-19)

23 ዬሱሲ ኣይሁዳታ ኢስታ ዋሳ ከላን ታማርሲሼኔ ካዋቴላ ሚሺራች ቃላ ሳባኪሼ ቃሌ ዴሬ ጊደን ኣይ ሃርጊይካ ሳኪዛይታ ፓሊሼ ኩሜላ ጋሊላን ዩዪዴስ።

24 ሄሳ ጋሶን ሎኦ ናሾይ ኩሜላ ሶሪያ ቢታን ሲዬቲዴስ፤ ዴሬይካ ዱማ ዱማ ሳኮን ዳሮ ዋዬቲዛይታ፡ ዳይዳንሉ ኢስታን ጌሊዳይታ፡ ቢጮ * ሃርጊይ ዲዛይታኔ ሲሊዳይታ ኢዛኮ ኤሂን ኡባካ ፓሊዴስ።

25 ሄሳፌ ዴንዲዳይሳን ጋሊላ፤ ታሙ ካታማታ፤ † ዩሩሳላሜ፤ ዩሁዳ፤ ዮርዳኖሴ ሻፋ ፒንላፌ ዪዳ ዳሮ ኣሳይ ኢዛ ካሊዴስ።

5

ዬሱሲ ዙማ ቦላ ታማርሲዳ ቲሚርቲ

1 ዳሮ ዴሬይ ሸቂዳይሳ በኢዲ ዬሱሲ ፑዴ ዙማ ቦላ ከዚ ኡቲዴስ፤ ኢዛ ካሊዛይቲካ ኢዛኮ ዪዳ።

2 ኢዚካ ኢስታ ሂዝጊ ታማርሶ ኦይኪዴስ፤

ቱሙ ኣንጃ ዴማና ኣሳታ
(ሉቃ 6:20-23)

3 «ኣያናን ባና ካዉሸዛይቲ ኣንጃቲዳይታ፤ ኣይስ ጊኮ ሳሎ ካዋቴሉ ኢስታሳ።

4 ቃዴቲዛይቲ ኣንጃቲዳይታ፤ ኣይስ ጊኮ ኢስቲ ሚኔታና።

5 ኣሽኬቲ ኣንጃቲዳይታ፤

4:23 ማቶ 9:35፤ ማር 1:39 * 4:24 ቢጮ፡ ቢጮ ጌቲቲዛይሲ ኢሲ ኢሲ ባጋ ጋሞሉን ኪሮ ዋይኮ ቡሉንላ ሃርጊ ጌቲቲስ። † 4:25 ታሙ ካታማ፤ ታሙ ካታማታ ጌቲቲዛይሲ ጊሪኬ ቃላ ሃሳይዛይቲኔ ኣይሁዳ ጊደንታ ዴሬቲ ኢሲፌ ዲዛሶይ ታሙ ካታማታ ጌቲቲስ። ሄ ካታማታ፤ ዳሮ ባጋቲ ጋሊላ ኣባፌ ኣርሼይ ጌሊዛሶ ባጋራኔ ፑዴሃ ባጋራ ኡሻቻ ቦላ ዴቲስ። 5:4 ኢሳ 61:2

- እይሰ ጊኮ ኢስቲ ቢታ ላታና።
- 6 ጸሎቴላ ጋፊዛይቲኔ ሳሜቲዛይቲ እንጃቲዳይታ፤
እይሰ ጊኮ ኢስቲ ካላና።
- 7 አሳሰ ሎኦ ኦሲዛይቲ እንጃቲዳይታ፤
እይሰ ጊኮ ኢስታሰካ ሎኦይ ኦሴታና።
- 8 ዋዚና ጸሎቲ እንጃቲዳይታ፤
እይሰ ጊኮ ኢስቲ ጸሳ ቤያና።
- 9 ሳርቴላ ኦሲዛይቲ እንጃቲዳይታ፤
እይሰ ጊኮ ኢስቲ ጸሳ ናይታ
ጌቲቲ ጸይጌታና።
- 10 ጸሎቴላ ጊሻሰ
ጎዳቲዛይቲ እንጃቲዳይታ፤
እይሰ ጊኮ ሳሎ ካዎቴላ ኢስታሳ።
- 11 «ታ ጋሶን አሳይ አንቴና ጫዩኮ፣ ጎዲኮኔ ኢታ ዮኦ ዋርዶራ
አንቴ ቦላ ሃሳይኮ አንቴ እንጃቲዳይታ።
- 12 አንቴ ሳሎን ዳማና ዋጋይ ኬሂ ጊታ ጊዲዳ ጊሻሰ ኡፋይሳን
ጉፒቴ። አንቴፌ ሲንሳን ዲዛ ናቤታካ ሄሳሶ ጎዲዳ።
- ማጺኔኔ ፖኦ ሌሚሶ
(ማር 9:50፤ ሉቃ 14:34-35)
- 13 «አንቴ ሃ ቢታ አሳሰ ማጺኔ ማላ። ማጺኔይ ባ ማልኦቴላ
ዬዲዛ ጊዲኮ ጌዴ ካሬ ዩጌቲዲ ዩጴቴላፌ ኦቲን ዛሪዲ ዳማናሰ
ዳንዳይዜ?
- 14 አንቴ አላሜሰ ፖኦ። ዙማ ቦላ ዲዛ ካታማያ ቆቴታናሰ
ዳንዳይኩ።
- 15 አሲ ጸዋፔ ኦይሊዲ ኬላን ዲዛ አሳ ኩሜላሰ ፖኦና ማላ
ጶቃሶሆን ዋሴሰ ኦቲን ጌማሶሆን ዋሴ ኤሬና።
- 16 ሄሳሶካ አሳይ አንቴ ሎኦ ኦሶ ቤኢዲ ሳሎን ዲዛ አንቴ
አዋ ቦንቻና ማላ አንቴ ፖኦይ አሳ ሲንሳን ፖኦ።

ሙሴ ዋጋ ጊሻሰ

- 17 «ታኒ ሙሴ ዋጋኔ ናቤታ ቃላ ሻራና ዬዳ አንቴሰ ሚሳቶፖ፤
ፖላናሰ ያዲሰ ኦቲን ሻራናሰ ያቤኬ።

18 ታ ኢንቴስ ቱሙ ጋይስ፥ ሳሎይኔ ሳኣይ ኣቓና ጋካናስ ሙሴ ዋጋይ ወሪ ፖሌታና ኣቲን ዋጋፔ ኢሲ ፒዳሌይካ ዋይኮ ቄሪናካ ሻሬቱኩ።

19 ሄሳ ጊሻስ ኦኒካ ሃ ኣዛዘታፔ ጉጺዛሮ ጊዲኮካ ኦሶንታ ዩጊ ኣቋኩ፥ ሃንኮይታካ ዩቋ ኣቓና ማላ ታማርሲኮ ሳሎ ካዋቴላን ሄሳዴይ ጉል ጌቲቲ ጸይጌታና፤ ጊዶ ኣቲን ሃይታ ኣዛዘታ ኦሴ ፖሊሼ ሃንኮይታ ፖላና ማላ ታማርሲኮ ሄሳዴይ ሳሎ ካዋቴላን ጌታ ጌቲታና።

20 ታ ኢንቴስ ጋይስ፥ ኢንቴ ጸሎቴሌ ፋርሳዌታፔኔ ሙሴ ዋጋ ታማርሲዛይታ ጸሎቴላፌ ኣቋንታ ኣጊኮ ሳሎ ካዋቴላ ጌላና ዳንዳዬኬታ።

ኣስ ዋቓናስ ቤሴና

21 «ካሴ ኣሳታስ፥ «ዋጵፓ፤ ዋቋዳዴ ቦላ ፒርዴታና፥ ጌቲቲዳይሳ ኢንቴ ሲዪዴታ።

22 ታ ቃሴ ኢንቴስ ጊዛይ ባ ኢሻ ቦላ ኦጌይ ባይንዳ ሃንቄቲዛዴ ቦላ ፒርዴታና፤ ኦኒካ ባ ኢሻ፥ «ናፓይ» ጊዛዴይ ዱላታ ሲንላን ኦይሼታና። «ኤያይ» ጊዛዴ ጋናሜ ታማ ፒርዳይ ናጌስ።

23 ሄሳ ጊሻስ ኔኒ ያርሾ ሺሺዛሶን ጸሳስ ያርሻና ጊሺን ኔ ኢሻይ ኔ ቦላ ሚሼቲዳዚ ኔስ ቆፌቲኮ።

24 ኔ ያርሺዛይሳ ሄን ያርሺዛሶን ኣጋዳ ኮይሮ ባዳ ኔ ኢሻራ ጊጋ፤ ሄሳፌ ጉዬ ሲማዳ ኔ ያርሾዛ ጸሳስ ሺሻ።

25 «ኔና ሞቲዳ ኔ ሞርኬይ ኔ ቦላ ፒርዲሶንታ ማላ፥ ፒርዲዛ ዳናይ ቃቺዛይሳስ ኔና ኣሌ ኢሞንታ ማላ፥ ቃሾ ኬላን ኔ ዋጵንታ ማላ ቡሮ ኦጌ ቦላ ዳሼ ኔ ሞርኬራ ኤሌላ ጊጋይቻ።

26 ታ ኔስ ቱሙ ጋይስ፤ ኢዚ ፒርዲሲ ወርሲዳ ጊዲኮ ወርሴላ ሳንቲዮ ቃንጸና ጋካናስ ቃሾፔ ኔኒ ቢርሼታካ።

ላይማታናስ ቤሴና

27 « (ላይማቶፓ) ጊዛይሳ ኢንቴ ሲዪዴታ።

28 ታኒ ጊዲኮ ኢንቴና ሂዘጋይስ፤ ማጫስ ኣሞ ኣይፌራ ጸሊዳዴይ ወሪ ባ ዋዚናን ኢዚራ ላይማቲዳስ።

29 ናጋራ ኦላናስ ኔ ኡሻቻ ኣይፌይ ኔስ ጋሶ ጊዲኮ ኔፔ ኬሳ ዋራ ዩጋ፤ ኔ ኣሳቴላይ ኩሚል ጌዴ ጋናሜ ታማን ዩጌታናፔ ኔ ኣሳቴላፌ ኢሲና ፓጪኮ ሎኦ።

30 ኔ ኡሻቻ ኩሼይ ናጋራ ኦሶስ ጋሶ ጊዲኮ ኔፔ ቃንጸ ዲጋ፤ ኔ ኣሳቴላይ ኩሚል ጋናሚን ዩጌታናይሳፌ ኔ ኣሳቴላፌ ኢሲ ቢሊቴይ ኔስ ፓጮ ጊዲኮ ሎኦ።

31 « ማቸ ኣንጂ ዩዲዛዴይ ፒርማ ዋራቃታ ኢዚስ ኢማና ቤሴስ) ጌቴቲዳስ።

32 ታኒ ቃሴ ኢንቴና ሂዘጋይስ፥ ሃራ ኣሳራ ላይማቲሺን ቤኦንታ ዲሼ ባ ማቸ ኣንጂዛዴይ ወሪ ኢዛ ላይማታና ማላ ኦሴስ። ሄሳሶካ ኣንጃቲዳሮ ኤኪዛዴይካ ላይማቲዳ ማላ ቆዴቴስ።

ጫቆ ጊሻስ

33 «ካሴ ኣሳታስ፥ ጦርዶ ጫቆፋ፤ ጸሳ ሲንላን ኔ ጫቂዳይሳ ናጋ) ጌቴቲዳይሳ ኢንቴ ሲዪዳታ።

34 ታ ቃሴ ኢንቴና ኣይኮካ ጫቆፍቴ ጋይስ፤ ሳሎይ ጸሳስ ኡቴዛ ኣራታ ጊዲዳ ጊሻስ ሳሎን ጫቆፍቴ።

35 ቢታይ ጸሳ ቶሆይ ዩጂዛሶ ጊዲዳ ጊሻስ ቢታንካ ጫቆፍቴ። ዋጋ ካዋ ካታማ ጊዲዳ ጊሻስ ዩሩሳላሚንካ ጫቆፍቴ።

36 ኢንቴ ሁኡንካ ጫቆፍቴ፤ ኢንቴ ሁኤ ቢናናፔ ኢሲኔዮካ ቦል ዋይኮ ካሬል ሂሰታናስ ዳንዳዬኬታ።

37 ሄሳ ጊሻስ ኢንቴ ኢንቴ ጊዶን ሃሳዬቲሺን ኢንቴ ሃሳያይ፥ ሓ) ጋናዝ ጊዲኮ፥ ሓ) ጌቴ፤ ሓካይ) ጋናዝ ጊዲኮ፥ ሓካይ) ጌቴ፤ ሄሳፌ ሃራይ ወሪ ኢታ ኣሳፔ ዪዛዛ።

ሃሎ ኬሶ ጊሻስ

(ሉቃ 6:29-30)

38 « ሓይፌ ጊሻስ ኣይፌ፥ ኣቕ ጊሻስ ኣቕ) ጌቴቲዳይሳ ኢንቴ ሲዪዳታ።

39 ታ ቃሴ ኢንቴስ ጊዛይ ኢታ ኦሊዳዴራ ኤቁቶፍቴ፤ ጊዶ ኣቲን ኔስ ኡሻቻ ሻጋላ ባቂዛዴስ ሃንኮይሳካ ዩሻ ቤሳ።

40 ኢሲ ኣሲ ኔኒ ጋርሳራ ማይኢዳይሳ ኔፔ ኤካናስ ኔና ሞቲኮ ቦላራ ማይኢዳይሳካ ጉጃዳ ኢዛስ ኢማ።

41 ኢሲ ኣሲ ኔና ኢሲ ሳቴ ኦጌ ኔ ባና ማላ ዋልቃሊኮ ኢሲፌ ናምኡ ዳኮ ጊዳና ኦጌ ኢዛራ ባ።

42 ኔና ዋሲዛዴስ ኢማ፤ ኔፔ ታልኤ ኤካናስ ኮይዛዴስ ዘኮ ዛርፓ።

5:31 ዛሬ 24:1-4፤ ማቶ 19:7፤ ማር 10:4 5:32 ማቶ 19:9፤ ማር 10:11-12፤ ሉቃ 16:18፤ 1ቆር 7:10-11 5:33 ሉቃ 19:12፤ ታይ 30:2፤ ዛሬ 23:21 5:34 ያቆ 5:12፤ ማቶ 23:22 5:35 ኢሳ 66:1፤ ማዛ 48:2 5:38 ኬሳ 21:24፤ ሉቃ 24:20፤ ዛሬ 19:21

43 « ኀ ላጌ ሲቃ፤ ኔ ሞርኬ ኢጸ፤ ጌቴቲዳይሳ ሲደዳታ።
 44 ታ ቃሴ ኢንቴና ኢንቴ ሞርኬታ ደሲቴ፤ ኢንቴና ጎዲዛይታሰ
 ዋሲቴ ጋይሰ።
 45 ኢንቴ ሄሳሶ ኦሊኮ ኢንቴ ሳሎ አዋሰ ናይታ ጊዳና።
 ኢዚ ኣርሼ ኢታታሲኔ ሎኦታሰ ኢሲ ቦላ ጋሊ ኢሜሰ። ኢራካ
 ጸሎታሲኔ ናጋራንቻታሰ ኢሲ ቦላ ቡኪሴሰ።
 46 ኢንቴና ደሲዛይታ ጸላ ኢንቴ ደሲኮ ኢንቴሰ ኣዛ ጎኣይ
 ዲዜ? ቃራጸ ቃንጸሲዛይቲ ሄሳሶ ኦሊቴኔ?
 47 ኢንቴ አሻታ ጸላ ኢንቴ ሳሮቲኮ ሃንኮይታፔ ኣዛን ሎኡቲ?
 አማኖንታይቲካ ሄሳሶ ኦሊቴሰ።
 48 ሄሳ ጊሻሰ ኢንቴ ሳሎ አዋይ ዋሶይ ባይንዳይታሰ ጊዲዳ
 ማላ ኢንቴካ ዋሶይ ባይንዳዴ ጊዲቴ።

6

ማንቆሰ ማዶ ኢሞ

1 «ኣሲ ኢንቴና ቤያና ማላ ኣሳ ሲንላን ሎኦ ኦሶንታ ማላ
 ናጌቲቴ፤ ሄሳሶ ኦሊኮ ኢንቴ ሳሎ አዋፔ ጎኣ ዴሜኬታ።
 2 ኢንቴ ማንቆታሰ ማዶ ኢሚዛ ዋዴ ኣሲ ታና ቤዮ ጊዲ ኣሳ
 ሲንላን ቦንቼታናሰ ኦጌኒኔ ኣይሁዳ ዋሳ ኬላን ጸሩሞባ ፑኒሲዛ
 ቆጼፔ ቆሞን ሃኒዛይታሶ ኦሶፍቴ። ታ ኢንቴሰ ቱሙ ጋይሰ፤ ኢሰቲ
 ባ ዋጋ ኡባ ሃን ኤኪዳ።
 3 ኢንቴ ማንቆታሰ ኢሚሺን ኡሻቻ ኩሼይ ኦሊዛ ሃዲርሳ ኩሼይ
 ኤሮፖ።
 4 ኢንቴ ኢሞይ ጌማን ጊዶ፤ ቆታን ኦሴቲዳይሳ ቤኢዛ ኢንቴ
 አዋይካ ኢንቴ ዋጋ ኢንቴሰ ኢማና።

ዋሳ ጊሻሰ (ሉቃ 11:2-4)

5 «ኢንቴ ዋሲሼ ቆጼፔ ቆሞን ሃኒዛይታ ማላ ሃኖፒቴ፤ ኢሰቲ
 ኣሲ ቤያና ማላ ኣይሁዳ ዋሳ ኬላታኒኔ ኦይዱ ኦጌ ቦላ ኤቂዲ
 ዋሳናሰ ደሴቴሰ። ታ ኢንቴሰ ቱሙ ጋይሰ፤ ኢሰቲ ኩሜላ ዋጋ
 ኤኪቹዳ።
 6 ኔኒ ዋሳና ጌሊዛ ኔ ኪፊሌ ጌላ፤ ካፊካ ኔ ቦላ ጎርዳዳ
 ጌማን ዲዛ ኔ አዋኮ ዋሳ። ጌማን ኦሴቲዳይሳ ቤኢዛ ኔ አዋይ
 ኔ ኦሶ ማላ ኔሰ ኢማና።

7 «አማኖንታ አሳይ ኢሲ ቃላ ዛሪ ዛሪ ዋሲኮ ኢስታስ ሲዬቲዛ ሚሳቲን ኢስቲ ዛሪ ዛሪ ገዛይሳላ ኢንቴካ ዋሲሼ ኢሲ ቃላ ዛሪ ዛሪ ጎፒቲ።

8 ገዶ አቲን ኢንቴ አዋይ ኢንቴ ዋሳናፔ ካሴቲዲ ኢንቴስ አዚ ኮሺዛኮ ኤሪዛ ገሻስ ኢንቴ ኢስታ ሚሳቶፒቲ።

9 ኢንቴ ዋሲሼ፥
« ሳሎን ዲዛ ኑ አዋዉ!
ኔ ሱንሊ አንጃቶ።

10 ኔ ካዋቴሊ ሃ ዮ፤
ኔ ሼኔይ ሳሎን ገዲዳ ማላ
ሳአንካ ሃኖ።

11 ሃቺስ ገዲዛ ካል
ኑስ ሃቶ ኢማ።

12 ኑ ኑና ቆሂዳይታስ
አቶ ገዛ ማላ
ኔካ ኑ ቆሆ ኑስ አቶ ጋ።

13 ኢታፔ ኑና አሻ አቲን
ኑና ፓጩን ጌልሶፋ፤
ቦንቾይ ሜሪፔ
ሜርና ጋካናስ ኔይሳ።
አሚን» ገ ዋሲቲ።

14 «ኢንቴ ኢንቴና ቆሂዳይታስ አቶ ገኮ ኢንቴ ሳሎ አዋይካ ኢንቴስ አቶ ጋና።

15 ቃሴ ኢንቴ አሳ ናጋራ አቶ ጎንታ ኢዲኮ ኢንቴ አዋይካ ኢንቴ ናጋራ አቶ ጌና።

ጾማ ገሻስ

16 «ኢንቴ ጾማ ጾማሼ ቆጶፔ ቆሞን ጾማዛይታሶ ሹሎፍቲ።
ኢስቲ ባ ጾማዛይሳ አሲ ኤራና ማላ ባ አይፌሶ ኢሴቴስ። ታ
ቱሙ ጋይስ፤ ሄሳሶ ኦሊዛይቲ ባ ዋጋ ኩሜል ኤኪቺዳ።

17 ኔኒ ጾማ ጾማሼ ኔ አይፌሶ ሜጩታ፥ ኔ ሁኤ ቲዬታ።

18 ሄሳሶ ኔ ጾሚኮ ጌማን ዲዛ ኔ አዋይ ጸላላ ኤሪዛዚኔ አሲ
ኦኒካ ኤርንታ ቆታን ገዳና። ቆታን ኦሴቲዳይሳ ቤኢዛ ኔ አዋይካ
ኔ ዋጋ ኔስ ኢማና።

ሳሎን ዲዛ ሃሮ
(ሉቃ 12:33-34)

19 «ቢላይ ሚዛሶን ቡቂዲኔ ሺይዲ ሞሬቲዛሶን፤ ካይሶይ ቦኪዲ ካይሳናስ ዳንዳይዛሶን፤ ሃ ቢታ ቦላ ኢንቴስ ሚሽ ሺሾፍቴ።

20 ጌዶ ኣቲን ቢላይ ማናስ፤ ቡቂዲ ዋይኮ ሺይዲ ሞሬቶንታሶን፤ ካይሶይ ቦኪ ኤካና ዳንዳዮንታሶን ሄን ሳሎን ኢንቴስ ሚሽ ሺሺቴ።

21 ኔ ሚሻይ ዲዛሶን ኔ ዋዚናይ ሄን ዴስ።

22 «ኣይፌይ ኣሳቴላስ ፖኦ፤ ሄሳ ጊሻስ ኔ ኣይፌይ ፓጸ ጌዲኮ፤ ኔ ኩሜላ ኣሳቴላይካ ፖኦ ጌዳና።

23 ኔ ኣይፌይ ሃርጋንቻ ጌዲኮ፤ ኔ ኩሜላ ኣሳቴላይካ ጳማ ጸላ ጌዳና። ሂስቲኮ ኔናን ዲዛ ፖኦይ ጳማ ጌዲኮ፤ ቃሴ ጳማይ ዋኒዳ ጊርዲ ጌዳ ጳማ ጌዳንዴ?

24 «ኢሲ ኣሲ ናምኡ ጎዳስ ኦላና ዳንዳይና። ኢሳ ኢዲዲ ናምኣንሶዛ ዶሳና፤ ዋይኮ ኢሳ ቦንቲዲ ናምኣንሶዛ ሌቃና፤ ጸሳሲኔ ሚሻስ ናምኣታስ ጋሊ ኦላናስ ዳንዳይና።

ዳር ቆፖፍቴ

25 «ሄሳ ጊሻስ ታ ኢንቴና ኢንቴ ዴሳ ጊሻስ፤ «ኣይ ሚኖ? ኣይ ኡዪኖ? ኣይ ማይኢኖ?» ጌዲ ሂርጎፍቴ ጋይስ። ሼምፖይ ቁማፔ፤ ኣሾይ ማይኦፌ ኣጴኔ?

26 ኣኔ ሳሎ ካፎታ ጸሊቴ! ዜሬቴና፤ ማጼቴና፤ ዲኤን ቆሌቴና፤ ጌዶ ኣቲን ኢንቴ ሳሎ ኣዋይ ኢስታ ሚዜስ። ኢንቴ ኢስታፌ ኬሂ ኣጴኬቴ?

27 ኣኔ ኢንቴፌ ዳር ዋይቲዲ ባስ ኢሜቲዳ ላይላ ቦላ ሃራ ኢሲ ጋላስ ጉጃና ዳንዳይዛ ኣሲ ዲዜ?*

28 «ቃሴ ማይኦ ጊሻስ ኣዛስ ሂርጌቴ? ኣኔ ጮ ዴምባን ዲዛ ጨሻታ ጸሊቴ፤ ዳቡሬቴና ዋይኮ ሱቁቴና።

29 ሄሳ ጊሻስ ታ ኢንቴና ጊዛይ ሃራይ ኣቶሺን ካዋ ሶሎሞኔይካ ባ ቦንቸራ ሃ ጨሻታቴ ኢሲኔይ ማላ ሎኦ ማይኢቤና።

30 ኢንቴኖ ፓጩ ኣማኖይ ዲዛይቶ! ሃኛ ኣሳ ኣይፌን ቤቲዲ ዋንቶ ታማን ዋጃና ማታ ሃይሳሶ ማይዚዛ ጸሲ ኢንቴና ሄሳፌ ሎኤሊ ኣሊ ማይዛናስ ዳንዳይኔ?

6:19 ያቆ 5:2-3 * 6:27 ባስ ኢሜቲዳ ላይላ ቦላ ሃራ ኢሲ ጋላስ ጉጃና ዳንዳይዛ ኣሲ ዲዜ? ጊዛይሳ ኢሲ ኢሲ ጌሻ ማጸፋታ ቢርሼላን «ባስ ዲዛ ኣዲሳቴላ ቦላ ኢሲ ዋጃ ፑዴ ጉጃናስ ዳንዳይዛ ኣሲ ዲዜ?» ጊዛዚ ዴስ።

31 ሄሳ ገሻሰ ኑ አይ ማኔ? አይ ኡያኔ? አይ ማይአኔ? ገዲ ሂርጎፍቴ።

32 ሃንኮ አማኖንታ አሳይ ሃይሳ ዴማናስ ዳር ቆፔስ። ሃይሲ ዉሪ ኢንቴስ ኮሺዛይሳ ኢንቴ ሳሎ አዋይ ኤሬስ።

33 ሃራፔ ሲንፋቲዲ ጸሳ ካዎቴላ ጸሎቴላ ኮዪቴ፤ ሃይቲ ዉሪ ኢንቴስ ጉጂታና።

34 ሄሳ ገሻሰ ዋንቶስ ኬሂ ቆፖፍቴ፤ ዋንቶ ሜቶይ ዋንቶስ አቆ፤ ኢሲ ኢሲ ጋላሳይ ባስ ባስ ገዲዛ ሜቶራ ዴስ።

7

ሃራ አሳ ቦላ ፒርዳናስ ኮሼና

(ሉቃ 6:37-42)

1 «ኢንቴ ቦላ ፒርዳቶንታ ማላ ሃራ አሳ ቦላ ፒርዳፍቴ።

2 ኢንቴ ፒርዲዳ ማላ ኢንቴ ቦላካ ፒርዳታና። ኢንቴ ማኪዳ ሚሻራ ኢንቴስ ማኬታና።

3 ኔ አይፌን ዲዛ ገታ ሚላ ቤኦንታ ዳሼ ኔ ኢሻ አይፌን ዲዛ ቄሪ ቡራ አዛስ ጸላይ?

4 ኔ አይፌን ገታ ሚሊ ዲሺን ኔ ኢሻ፡ ላኔ ታ ኔ አይፌፔ ቄሪ ቡራኖ ኬሳይስ። ጋናስ ዋና ዳንዳያይ?

5 ኔኖ ቆጼፔ ቆዋን ሃኒዛይሶ ካሴታዳ ኔ አይፌን ዲዛ ገታ ሚላ ኬሳይቻ። ሄሳፌ ጉዬ ኔ ኢሻ አይፌን ዲዛ ቡራ ኬሳናስ ሎኤላ ጸላንዳሳ።

6 ባ ቶሆን ዬጶንታ ማላኔ ሲሚዲ ኢንቴና ሳጺ ዳኬሬሶንታ ማላ አንጃቲዳይሳ ካናታ ሲንፋን ዬጎፍቴ፤ ቃሴ ኢንቴ ዋርቃካ ጉዲንፋታ ሲንፋን ዬጎፍቴ።

ዋሲቴ፡ ኮዪቴ፡ ቆጸቲ

(ሉቃ 11:9-13)

7 «ዋሲቴ ኢንቴስ ኢሜታና፤ ኮዪቴ ኢንቴ ዴማና፤ ካሬ ቆጸቲ ኢንቴስ ዶዬታና።

8 ዋሲዳ ኡባስ ኢሜታና፤ ኮይዛ አሲ ዴማና፤ ቆጸዛዴስ ካሬይ ዶዬታና።

9 ኢንቴ ገዶፌ ኢሳዴስ ናይ ኡኬላ ዋሲኮ ሹቕ ኢሚዛ አዋይ ዳንዴ?

10 ዋይኮ ዋሊ ዋሲኮ ሾሽ ኢሚዛዴይ ዳንዴ?

11 ሂሰቲን ኢንቴ ኢታታ ጊዲ ኡቲዲ ኢንቴ ናይታሰ ሎኦ ሚሽ ኢሞ ኤሪዛይታ ጊዲኮ ኢንቴ ሳሎ ኣዋይ ኢዛ ዋሲዛይታሰ ዋኒዲ ኣጲዛ ሎኦ ሚሽ ኢሜኔ?

12 ሄሳ ጊሻሰ ሃራ ኣሲ ኢንቴሰ ኦፋና ማላ ኢንቴ ኮይዛይሳ፡ ኢንቴካ ሃራታሰ ኦሊቴ። ሙሴ ዋጋይኔ ናቤቲ ጊዛይሲ ሃይሳ።

ኣሆ ፔንጌኔ ጸንፋ ፔንጌ

(ሉቃ 13:24)

13 «ጸንፋ ፔንጌራ ጌሊቴ፤ ቆዮሶ ኤፊዛ ኦጌይ ጌታ፤ ፔንጌይካ ኣሆ፤ ዳሮ ኣሳይ ሄ ፔንጌዛራ ጌሌሰ።

14 ዴኦሰ ጋሊዛ ኦጌይ ጊዲኮ ጸንፋ፤ ፔንጌይካ ጸንፋ፤ ጌላናይቲካ ጉፋታ ጸላ።

ዋርዶ ናቤታ

(ሉቃ 6:43-44)

15 «ኢሰታሰ ጊዶ ባጋይ ካና ሱይቴ * ማላ ጊዲ ኡቲዲኔ ደርሳ ኢቴ ማይኢ ጌሊዲ ኢንቴ ጊዶን ኦሊዛ ዋርዶ ናቤታፔ ናጌቲቴ።

16 ኢንቴ ኢሰታ፡ ኢሰታ ኦሶን ኤራንዴታ። ኣጉንፋ ዋራፔ ዋይኔይ፡ ኪንዲቾ ኣጉንፋፊ ባላሴ ኣይፊይ ማጽቲዜ?

17 ሄሳፋካ ሎኦ ሚሊ ወሪ ሎኦ ኣይፊሰ፤ ኢታ ሚሊካ ኢታ ኣይፊ ኣይፊሰ።

18 ሎኦ ሚሊ ኢታ ኣይፊ ኣይፋናሰ ዳንዳዮንታይሳ ማላ ኢታ ሚሊ ሎኦ ኣይፊ ኣይፋናሰ ዳንዳዬና።

19 ሎኦ ኣይፊ ኣይፎንታ ሚሊ ወሪካ ቃንጾታናኔ ታማን ዬጌታና።

20 ሄሳ ጊሻሰ ኢንቴ ኢሰታ ኢሰቲ ኣይፊዛ ኣይፊን ሻኪ ኤራና።

21 «ሳሎን ዲዛ ታ ኣዋ ሸኔ ፖሎንታ ዲሼ ታና፡ ሳዶ! ጎዶ!» ጊዛይ ወሪ ሳሎ ካዋቴላ ጌሌና።

22 ሄ ጋላሰ ዳሮቲ፡ ሳዶ! ጎዶ! ኦኒ ኔ ሱንፋን ቲንቢቴ ዮቲቤኮኒ? ኔ ሱንፋን ዳይዳንላ ኬሲቤኮኒ? ኔ ሱንፋን ዳሮ ማላታ ኦሊቤኮኒ?» ጋና።

23 ሄ ዋዴ ታ ኢሰታሰ፡ ታ ኢንቴና ሙሊካ ኤሪኬ! ኢንቴ ኢታቲ ታፔ ሃኪቴ» ጋዳ ቆንጨራ ታ ኢሰታሰ ዮታና።

7:12 ሉቃ 6:31 * 7:15 ካና ሱይቴ፡ ካና ሱይቴይ ኢሲ ኢሲ ባጋ ጋሞላ ቃላን ሱፉሜ ጌቴቴሰ። 7:19 ማቶ 3:10፤ ሉቃ 3:9 7:20 ማቶ 12:33

ከሌ ከጸዳክ ኤራኔ ኤያ አሳ ለሚሶ

(ሉቃ 6:47-49)

24 «ሂስቲኮ ሃይሳ ታ ቃላ ሲዪዲ ኦሶን ፔይሺዛዴይ ባ ከሌ
ዛላ ቦላ ከጸዳክ ሚሳቲሶ።

25 ዴጾ ኢራይ ቡኪን ሃርይካ ሃርቲዴሶ፤ ጨርኮይካ
ጨርኪዴሶ፤ ከላካ ሱጊዴሶ ሺን ዛላ ቦላ ከጾቲዳ ጊሻሰ
ኩንዲቤና።

26 «ሃይሳ ታ ቃላ ሲዪዲ ኦፋንታዴይ ጊዲኮ ባ ከሌ አጩ
ቦላ ከጸዳክ ኤያ አሳ ማላ።

27 ዴጾ ኢራይ ቡኪን ሃርይካ ሃርቲዴሶ፤ ጨርኮይካ
ጨርኪዴሶ፤ ሄ ከላካ ሱጊዴሶ፤ ከላይካ ኢታ ኩንዴሶ
ኩንዲዴሶ» ጊዴሶ።

28 ዬሱሲ ታማርሲ ወርሲን አሳይ ኢዛ ቲሚርቲዛን
ማላሌቲዴሶ።

29 ጋሶይካ ሙሴ ዋጋ ታማርሲዛይታ ማላ ጊዶንታ ኢዚ
ኅዳቲሊ ዲዛ አሳ ማላ ታማርሲዴሶ።

8

ዬሱሲ ኢንቺራቻ ሃርጌይ ኦይኪዳ አዴዛ ፓሊዴሰ

(ሉቃ 6:37፣41-42)

1 ዬሱሲ ዙማ ቦላፌ ዋጂን ዳር ዴሬይ ኢዛ ካሊዴሶ።

2 ኢሲ ኢንቺራቻ * ሃርጌይ ዲዛዴይ ዬሱሳኮ ሺቂዲ ኢዛ
ሲንላን ጉልባቲዲ፥ «ኅዶ! ኔ ኮይኮ ታና ፓላናሰ ዳንዳያሳ»
ጊዴሶ።

3 ዬሱሲ ባ ኩሼ ዬዲዲ፥ «ታ ዶሳዲሰ፤ ፓጸ!» ጌን አዴዚ
ሄ ሃርጌዛፔ ሄራካ ፓጸዴሶ።

4 ቃሴካ ዬሱሲ አዴዛ፥ «ኔ ፓጸዲይሳ ኦናሰካ ዮቶፓ፤ ጊዶ
አቲን ባዳ ኔና ቁሴሰ ቤሳ። ኢሰቲ አዛዚዳ ያርሾዛ ጋላ፤ ሄሲካ
ኢሰታሰ ማርካ ጊዳና» ጊዴሶ።

ዬሱሲ ማቶ ሃላቃዛ አሽካራ ፓሊዴሰ

(ሉቃ 7:1-10)

5 ዬሱሲ ቂፊርናሆሜ ጋኪዳ ማላ ማቶ ሃላቃይ ኢዛኮ ሺቂዲ
ኢዛ ሂዝጊ ዋሲዴሶ።

6 «ኅዶ! ታ አሽካራይ ኬሂ ሳኬቲዲ ኬላን ኢቺ ዴሰ» ጊዴሶ።

* 8:2 ኢንቺራቻ፡ ኢንቺራቻ ገሻ ማጻፋይ ቆንጨሲዛ ማላ አሳቲላ ቦላ ቦላራ ጋልባን
ኬዚዛ ዲማ ዲማ ሃርጌታ ኡባ ቤሴሰ።

7 ዩሱሲካ ኢዛስ፡ «ታ ባዳ ፓፋና» ገደሰ።

8 ማቶ ሃላቃዚ ኢዛስ ዛሪዲ፡ «ታ ኔና ታ ኬፍ ጌልፋናስ ቤሲዛዴ ገዲኬ፤ ገደ ኣቲን ኔ ሃን ዳዳ ኢሲ ቃላ ጸላ ጊኮ ታ ኣሸካራይ ፓጸና።

9 ታሰካ ታና ኣዛዚዛ ሃላቃቲ ታፔ ቦላራ ዴቲስ፤ ቃሴካ ታስ ኣዛዜቲዛ ዋታዳራቲ ታፔ ጋርሳራ ዴቲስ፤ ኢስታፌ ኢሳ፡ «ባ!» ጊኮ ቤስ፤ ቃሴ ኢሳ፡ «ሃ ያ!» ጊኮ ዩስ፤ ታኒ ታ ኣሸካራዛ፡ «ሄሳ ኦላ!» ጊኮ ኦፊስ» ገደሰ።

10 ዩሱሲ ኢዛ ዛርዛን ማላሌቲዲ ባና ካሊዛይታስ፡ «ታ ኢንቴስ ቱሙ ጋይስ፤ ሃራይ ኣቶሺን ኢስራኤሌ ኣሳ ጋርሳን ሃይሳ ማላ ኣማኖይ ዲዛዴ ኢሳዴካ ዴማቤኬ።

11 ታ ኢንቴስ ዮታይስ፤ ዳሮቲ ኣርሼይ ሞኪዛ ባጋፌኔ ወሊዛ ባጋፌ ያና። ሳሎ ካዋቴላ ማዳን ኣብራሃሜንታራ ዩሳቃንታራኔ ያቆቤንታራ ኢሲፌ ኡታና።

12 ሳሎ ካዋቴሊ ኢስታስ ገደና ቤሲዛ ኣሳቲ ሄን ካሬ ቋማን ዩጌታና። ሄንካ ዩሆኔ ኣቐ ጋርጨኛ ገደና» ገደሰ።

13 ዩሱሲካ ማቶ ሃላቃዛስ፡ «ባ! ኔ ኣማኖ ማላ ኔስ ሃና» ገደሰ፤ ኣሸካራዚ ሄራካ ፓጺደሰ።

ዩሱሲ ዳርታ ፓሊዴስ

(ማር 1:29-34፤ ሉቃ 4:38-41)

14 ዩሱሲካ ቡሮ ጴጽሮሳ ኬፍ ጌሊሺን ጴጽሮሳ ቦሎቴያ ሚሾ ሃርጌ ሳኬታዳ ኢቺዳር ቤዩዴስ።

15 ኢዚ ኩሼ ዩሱሲ ቦቺን ሚሾ ሃርጌዚ ኣገደሰ። ኢዛካ ዴንዳዳ ዩሱሳ ሞካዲስ።

16 ሄ ጋላሳ ኦማርስ ዳይዳንፊ ኦይኪዳ ዳሮ ኣሳታ ዩሱሳኮ ኤሂዳ። ኢዚካ ቱና ኣያናታ ባ ቃላራ ኢስታፌ ኬሲዴስ፤ ሃርጋንቻታ ኡባካ ፓሊዴስ።

17 ኢሳያሲ፡ «ኢዚ ኦ ሃርጌ ኤኪዴስ፤ ኦ ሳኮካ ቶኪዴስ» ገደ ቃላይ ሃይሳን ፖሌቲዴስ።

18 ዳሮ ኣሳይ ኢዛ ገደሊዳይሳ ቢዩዲ ዩሱሲ ኣሳ ኣባፌ ሄ ፒንፊ ፒናና ማላ ኣዛዚዴስ።

19 ሄ ዋዴ ኢሲ ኣይሁዳ ኣማኖ ታማርሲዛዴይ ኢዛኮ ሺቂዲ፡ «ኣስታማሬ! ኔ ቢዛሶ ኣዋካ ታ ኔና ካላና» ገደሰ።

20 ዩሱሲካ ኢዛስ ዛሪዲ፡ «ዋራካናታስ ኦላይ ዴስ፤ ሳሎ ካፎታስ ኬፍ ዴስ፤ ታስ ኣሳ ናስ ገዲኮ ሁኤ ጌልፊዛሶይካ ዴና» ገደሰ።

21 እዚ ካሊዛ እሲ ሃራ ኣሲ ቃሴ፥ «ጎደ! ኮይሮ ባዳ ታ ኣዋ ሞጎ?»† ገደሰ።

22 እዚ ቃሴ፥ «ሃይቂዳይቲ ባ ሃይቄል ሞጌቶ፤ ኔኒ ገዲኮ ታና ካላ» ገደሰ።

ዩሱሲ ኣባ ዳምባላ ጮኡ ሂስቲዴስ

(ማር 4:35-41፤ ሉቃ 8:22-25)

23 ሃሳፌ ጉዬ ዩሱሲካ ዋጎሎን ጌሊን እዚ ካሊዛይቲካ ኢዛራ ኢሲፌ ቢዳ።

24 ቆፖንታ ኣባ ገደን ዳምባላይ ዴንዲዲ ዋጎሎኖ ሚታና ጋካናስ ኢስታ ዋዪሲዴስ። ሄሲ ወሪ ሃኒሺን ዩሱሲ ጳሰኪዴስ።

25 እዚ ካሊዛይቲ እዚ ቤጎሊዲ፥ «ጎደ! ኑ ጳዮስ፤ ኑና ኣሻ!» ገደ።

26 ዩሱሲካ ኢስታስ፥ «ኢንቴኖ ኣማኖይ ፓጪዳይቶ! ኣዛስ ሃይሳ ማላ ባቤቲ?» ገደሰ። ሃሳፌ ዴንዲዲ ጫርኮዛኔ ኣባ ዳምባላ እዚ ሃንቁን ሄራካ ሲርጺ ገደሰ።

27 ኢስቲካ፥ «ሃይሲ ኣባይኔ ጫርኮይካ ኢዛስ ኣዛዘቲዛዴይ እዚ ዋኒዳዴ?» ገዲ ማላሌቲዳ።

ቱና ኣያናፔ ፓጺዳ ናምኡ ኣሳታ

(ማር 5:1-20፤ ሉቃ 8:26-39)

28 እዚ ኣባ ፒኒዲ ጌርጌሴኖኔ ጌቲቲዛ ዴሬ ጋኪዳ ማላ ዳይዳንሊ ኦይኪዳ ናምኡ ኣስ ዳይቲ ባ ዲዛ ዱፎፔ ኬዚዲ ኢዛራ ጋገዳ። ኣሲ ሄ ኦጌዛራ ኣጳናስ ዳንዳዬቶንታ ማላ ኣሳስ ዳሮ ኬሂ ሜቶ ገዲ ዴቲስ።

29 ኢስቲካ፥ «ጸሳ ናዉ! ኔስ ኑናራ ኣዛ ኢሲፌቲል ዲዜ? ዋዴይ ጋኮንታ ዲሺን ኑና ጸጋና ያዲ?» ገ ዋሲዳ።

30 ሄን ኢስታፌ ጉል ሃኪዲ ዳሮ ጉዲንፋ ዉዴይ እሲ ቦላ ሄሜቲስ።

31 ዳይዳንፋቲ ዩሱሳ፥ «ኔ ኑና ኬሳና ገዲኮ ሃይታን ዳሮ ጉዲንፋታን ኑ ጌላና ማላ ኑስ ፒቃዴ ኢማ» ገዲ ዋሲዳ።

32 ዩሱሲካ ኢስታ፥ «ቢቲ!» ገደሰ። ዳይዳንፋቲካ ኢስታፌ ኬዚዲ ጉዲንፋታን ጌሊዳ። ጉዲንፋቲ ዉሪካ ባ ዲዛሶ ኣፎራ ቢቻሪሽ ኣባን ጌሊዲ ሃፋን ሚቲቲ ሃይቂዳ።

33 ጉዲንፋ ሄሚዛይቲ ኤሌሊዲ ካታማይ ዲዛሶ ቢዲ ጉዲንፋይ ሃኖይሳኔ ዳይዳንሊ ኢስታ ኦይኪዳ ኣሳታ ቦላ ሃኒዳይሳ ኡባ ኣሳስ ኖቲዳ።

† 8:21 ታ ኣዋ ሞጎ? ገዛይሲ እዚ ኣዋይ ሃይቃና ጋካናዉ ሄሚዲ ሃይቂኮ ሞገ ያናስ ዲዛ እዚ ኣሞዛ ቤሲዛ ሚሳቲስ።

34 ካታማ አሳይ ዉሪ ዩሱሳራ ጋጋናሰ ኬዚደሰ። ዩሱሳ ቤኢዲኔ ኢሰታ ዴሪ ዩዲ ባና ማላ ኢዛ ዎሲዳ።

9

ጉንዳ አዴዛ ፓጾ

(ማር 2:1-12፤ ሉቃ 5:17-26)

1 ሄሳፌ ጉዬ ዩሱሲ አባ ቦላ ዎጎሎራ ፒኒዲ ካሴ ባ ዲዛ ካታማ ዩደሰ።

2 ሄን ኢሲ ጉንዳ አዴዛ፤ አሳይ ሃላራ * ቶኪዲ ዩሱሳኮ ኤሂደሰ። ዩሱሲካ ኢሰታ አማኖ ቤኢዲ ጉንዳ አዴዛ፤ «አይኮይ ባ፤ ሃይሶ ናዘ! ኔ ናጋራይ አቶ ጌቴቲደሰ» ጌደሰ።

3 ሄ ዎዴ ሙሴ ዎጋ ታማርሲዛይቲ፤ «ሃይሲ ጸሳ ጫሻ» ጌዲ ባ ዎዚናን ቆፒዳ።

4 ዩሱሲ ኢሰታ ቆፋ ኤሪዲ፤ «ኢንቴ ዎዚናን ኢታ ዮኦ አዛሰ ቆፒቲ?»

5 «ኔ ናጋራይ አቶ ጌቴቲደሰ» ጉሳፌኔ «ዴንዳዳ ባ!» ጉሳፌ አዎይሲ ካወሸ?

6 ጌዶ አቲን አሳ ናሰ ቢታ ቦላ ኣሴ ናጋራፔ ማራናሰ ሸኔይ ዲዛይሳ ኤራና ማላሳ» ጌዲ ጉንዳ አዴዛ «ዴንዳ! ኔ ሃላ ኤካዳ ኔሶ ባ» ጌደሰ።

7 ጉንዳ አዴዚካ ዴንዲዲ ባሶ ቢደሰ።

8 ዴሪይካ ሄሳ ቤኢዲ ማላሌቴላኒኔ ባቦን ኩሚዲ ሃይሳ ማላ ጎዳቴላ አሳሰ ኢሚዳ ጸሳ ጋላቲደሰ።

ዩሱሲ ማቶላ ጴይጌደሰ

(ማር 2:13-17፤ ሉቃ 5:27-32)

9 ዩሱሲ ሄፔ ዴንዲዲ ቢሸ ኢሲ ማቶላ ጌቴቲዛዴይ ቃራጸ ቃንጺሲዘሶን ኡቲዳይሳ ቤኢዲ፤ «ታና ካላ!» ጌን ዴንዲዲ ኢዛ ካሊደሰ።

10 ዩሱሲ ማቶላሶን ማዳ ቦላ ዲሺን ዳሮ ቃራጸ ቃራጺዛይቲኔ ናጋራንቻቲ ኢዘኮ ዩዲ ኢዛራኔ ኢዛ ካሊዛይታራ ኢሲፌ ማናሰ ኡቲዳ።

11 ፋርሳዌቲ ሄሳ ቢዩዲ ዩሱሳ ካሊዛይታ፤ «ኢንቴና ታማርሲዛይሲ ቃራጸ ቃንጺሲዛይታራኔ ናጋራንቻታራ ዋኒ ኢሰታራ ኢሲፌ ካላ ሚዜ?» ጌ ኦይቺዳ።

* 9:2 ሃላ፤ ኢሲ ኢሲ ባጋ ጋዋል ቃላን ሃላ ጉሲ ዛጸ ጉሳ።

12 ዬሱሲካ ኢስቲ ጊዛይሳ ሲዬዲ ኢስታስ፡ «አከሜይ ኮሺዛይ ሳኬቲዳይታስ ኣቲን ሳኬቶንታ ፓጻታስ ጊዳና።

13 ሄሳ ጊሻስ፡ «ኢንቲ ቢዲ ያርሾ ጊዳንታ ማርቴል ደሳይስ» ጊዛ ቃላ ቢርሼል ታማርቴ። ናጋራንቻታ ጳይጋና ያዲስ ኣቲን ጸሎታ ጳይጋናስ ያቤኬ» ጊዳስ።

ዬሱሳ ካሊዛይቲ ጸማ ጸሞንታ ጋሶ
(ማር 2:18-22፤ ሉቃ 5:33-39)

14 ጸማቂዛ ዮሃንሳ ካሊዛይቲ ዬሱሳኮ ዪዲ፡ «ኑኒኔ ፋርሳዌቲ ጸሚሺን ኔና ካሊዛይቲ ኣዛስ ጸሜቴን?» ጊ ኦይቺዳ።

15 ዬሱሲ ኢስታስ፡ «ሚሺራ ላጌቲ ሚሺራዚ ኢስታራ ዲሺን ሙዞታና ቤሲዜ? ሚሺራይ ኢስታፌ ኤኬታና ዋዴይ ያና፤ ኢስቲ ሄ ዋዴ ጸማና።

16 «ጋልኣ ማይኦ ቦላ ኦራላ ዋሶ ዋሊ ሲኪዛ ኣሲ ዴና። ጋልኣ ቦላ ኦራል ዋሊ ሲኪኮ ኦራላዚ ጋልኣዛ ፔዴሬሊዲ ዳኬል ሃ ዳርሳና።

17 ኦኒካ ኦራላ ዋይኔ ኡሹ ጋልኣ ሉካሞን ጉጁና። ጉጁዛ ጊዲኮ ሉካሞዚ ቆቃና፤ ዋይኔ ጫጃዚካ ጉካና፤ ሉካሞዚካ ጎኣይ ባይንዳዝ ጊዳና። ጊዳ ኣቲን ኦራላ ዋይኔ ጫጃይ ኦራላ ሉካሞዛን ጉጁቲስ። ሄሳ ማላራ ዋይኔ ጫጃዚኔ ሉካሞዚ ሎኦን ናጌቲዲ ጋሞኤስ» ጊዳስ። †

ያኢሮሳ ናዮኔ ዬሱሳ ኣፋላ ማጫራ ቦቺዳ ማጫሳዮ
(ማር 5:21-43፤ ሉቃ 8:40-56)

18 ዬሱሲ ኣሳ ሃሳይሶን ዲሺን ኢሲ ሹሜይ ኢዛ ሲንፋን ኩንዲዲ፡ «ታስ ና ዳራ ሃይቃና ጋዉስ። ኢዛ ፓጻ ዳና ማላ ያዳ ኔ ኩሼ ኢዚ ቦላ ዋላርኪ?» ጊን።

19 ዬሱሲ ዴንዲዲ ኢዛራ ቢዴስ፤ ዬሱሳ ካሊዛይቲካ ኢዛራ ቢዳ።

20 ታማኔ ናሞኡ ላይል ኩሜል ኢዚፔ ሱሊ ጉኪዛ ኢሲ ማጫሳያ ዬሱሳፔ ጉዬራ ያዳ ኢዛ ኣፋላ ማጫራ ቦቻዲስ።

21 ኢዛ ሄሳ ኦሊዳይ፡ «ኢዛ ኣፋላ ማጫራ ታ ቦቺዳኮ ፓጻና» ጊዛ ኣማኖይ ኢዚ ዋዚናን ዲዛ ጊሻስ ቦቻዲስ።

22 ዬሱሲካ ጉዬ ሲሚ ጸሊዲ ማጫሳዮ፡ «ኣይኮይ ባ፡ ታ ናዬ! ኔና ኔ ኣማኖይ ፓሊዴስ» ጊን ማጫሳያ ሄራካ ፓጻ ጋዲስ።

9:13 ማቶ 12:7 † 9:17 ሉካሞ፡ ሉካሞ ኢሲ ኢሲ ባጋ ጋሞል ቃላን ኦጎር ጉሳ።

9:20 ታይ 15:38፤ ዛሬ 22:12

23 ዩሱሲካ ሹሜዛ ሶ ማታ ጋኪሺን ዳሬይ ዛዬራኔ ዲንከራ ዋሲሽ ዩኪዛይሳ በኢዲ፥

24 «ኪቺቲ! ናያ ጲሰካዱሰ ኣቲን ሃይቃቤኩ» ጊን ኢሰቲ ኢዛ ቦላ ሚጪዲ፥

25 ዳሬይ ወሪ ኩፋፌ ኬዚን ኢዚ ኩፋ ጌሊዲ ናይ ኩሼ ኦይኪዳሰ፤ ናያካ ዴንዳ ኤቃዱሰ፥

26 ኢዛ ጎባቴሉ ሄ ዳሬ ኡባን ሴቴቲዳሰ፥

ዩሱሲ ቆቂታኔ ዶና ዱዴዛ ፓሊዳሰ

27 ዩሱሲካ ሄፔ ቢሺን ናምኡ ቆቂቲ፥ «ዳዊቲ ናዉ! ኑና ማራርኪ!» ጊዲ ዋሲሽ ኢዛ ጌዶ ካሊዲ፥

28 ቆቂቲካ ዩሱሲ ጌሊዲ ኩፋ ኢዛ ካሊዲ ጌሊዲ፥ ዩሱሲካ ኢሰታሰ፥ «ታ ኢንቴ ኣይፌ ፓፋና ዳንዳይዛይሳ ኣማኔቲ?» ጊዲ ኦይቺዳሰ፥ ኢሰቲካ፥ «ኤ፥ ጎዶ!» ጊዲ፥

29 ሄሳፌ ጉዬ ዩሱሲ ኢሰታ ኣይፌ ቦቺዲ፥ «ኢንቴ ኣማና ማላ ኢንቴሰ ሃና!» ጊዳሰ፥

30 ኢሰታ ኣይፌይካ ጸሊዳሰ፥ ዩሱሲካ፥ «ሃይሳ ኦኒካ ኤርንታ ማላ» ጊዲ ሚንሊ ዮቲዳሰ፥

31 ጊዶ ኣቲን ኢሰቲ ቢዲ ሄራ ኡባሶን ዩሱሳ ጊሻሰ ዋሪሲዲ፥

32 ኢሰቲ ሄፔ ኬዚሺን ዳይዳንሊ ኦይኪዳ ኢሲ ዶና ዱዴ ኣሰ ዩሱሳኮ ኤሂዲ፥

33 ዳይዳንሳዚ ኬዚዳፔ ጉዬ ሄ ዶና ዱዴ ኣዴዚ ሃሳያ ኦይኪዳሰ፤ ዳሬዚካ ማላሌቲዲ፥ «ሃይሳ ማላ ሃናይ ኢሰራኤሌ ቢታን ሃኒን ኑ በዪ ኤርኮ» ጊዲ፥

34 ጊዶ ኣቲን ፋርሳዊቲ ዛሪዲ ኢዛ፥ «ዳይዳንሳ ኬሲዛይ ዳይዳንሳታ ሃላቃና» ጊዲ፥

ዩሱሲ ዳራሰ ሚሺቲዳሰ

35 ዩሱሲ ኣይሁዳታ ዋሳ ኩፋን ኣይሁዳታ ታማርሲሽኔ ጸሳ ካዋቲፋ ሚሺራቾ ቃላ ዮቲሹ ቃሴካ ሃርጌ ኡባፌ ኣሳ ፓሊሽ ጉታታን ጉታታን ዩዪዳሰ፥

36 ኣሳይ ወሪ ሄሚዳይ ባይንዳ ዶርሳ ማላ ኬሂ ሜቶቲቲዲ ጸሊዛይ ባይንዳዬ ጊዲዳይሳ በኢዳ ዋዴ ኢሰታሰ ዳር ሚሺቲዳሰ፥

37 ባና ካሊዛይታሰካ፥ «ማጸ ጋኪዳ ካሳይ ዳር ሺን ማጺ ሺሺዛይቲ ጉላታ፥

38 ሄሳ ጊሻስ ካላ ጎዳይ ካላኮ ኦሳንቻታ ዬዳና ማላ ዋሲቴ!»
ጊዴስ።

10

ዬሱሳ ካሊዛ ታማኔ ናምኣታ ኪቴቴል

(ማር 3:13-19፤ ሉቃ 6:12-16)

1 ዬሱሱ ባና ካሊዛ ታማኔ ናምኣታ ባኮ ጴይጊዲ፥ ኢስቲ ቱና
ኣያናታ ኬሳና ማላ ቃሴካ ሳኮፔኔ ሃርጌፊ ፓላና ማላ ኢስታስ
ጎዳቴል ኣሚዴስ።

2 ታማኔ ናምኡ ሃዋሬታ ሱንላይ ሃይሳፊ ካሊዛይሳ፤ ኮይሮይ
ጴጽሮሳ ጌቴቲዛ ሲሞና፥ ኢዛ ኢሻ ኢንዲራሳ፥ ዛብዶሳ ና ያቆቤኔ
ኢዛ ኢሻ ዮሃንሳ፤

3 ፒሊጶሳኔ ባርቴሌሞሳ፥ ቶማሳኔ ቃራጸ ሺሺዛ ማቶሳ፥
ኢልፊዮሳ ና ያቆቤኔ ታዶሳ፤

4 ባ ባጋስ ሚሼቲዛ ሲሞና * ጉዬፔ ዬሱሳ ሃይቆስ ኣሊ
ኣሚዲ ኣስቆሮንቶ † ዩሁዲ።

5 ሃይታ ታማኔ ናምኣታ ኡባ፥ «ኣይዛቤታ ጊዶ ቦፒቴ፤ ሳማሪያ
ኣሳ ካታማ ጌሎፒቴ።

6 ጊዶ ኣቲን ኢስራኤሌ ዴራ ጋርሳፊ ጳይዳ ዶርሳታኮ ቢቴ።

7 ቢዲኔ፥ «ሳሎ ካዎቴሊ ማቲዴስ!» ጊዲ ሳባኪቴ።

8 ሃርጋንቻታ ፓሊቴ፥ ሃይቂዳይታ ሃይቆፔ ዴንሊቴ፥ ኢንቺራቻ
ሃርጊዛይታ ጌሺቴ፤ ዳይዳንላታ ኬሲቴ፤ ኢንቴ ማላ ኤኪዳይሳ
ሚላ ኣሚቴ፤

9 ዋርቃ፥ ቢራ ዋይኮ ጸርቂማላ ጊዲን ኢንቴ ኪሴን ኦይኮፍቴ።

10 ኦሳንቻስ ሃቺስ ሃቺስ ጊዲዛዝ ኮሺዛ ጊሻስ ኢንቴ ኦጌስ
ጊዲ ሺንቄ፥ ኮሾንታ ማይኦ፥ ጫማ ዋይኮ ጉፊ ኤኪ ቦፒቴ።

11 «ኢሲ ካታማ ዋይኮ ኢሲ ጉታ ኢንቴ ጌሊዛ ዋዴ ኢንቴና
ሞካናዴ ኮዬ ዴሚዲ ኢዛ ኬላን ሸምፒቴ፤ ሄፔ ኬዛና ጋካናስ
ሄን ዲሺቴ።

12 ኢንቴ ኦና ኬሊካ ጌልሼ፥ «ሳሮ» ጊቴ።

* 10:4 ባ ባጋስ ሚሼቲዛ ሲሞና፥ ሃይሲ ሃ ሱንላይ ጉጃቲዳይ ኢሲ ኢሲ ኣሳቲ ኢዚ
ባ ሃይማኖቲዛ ሚሼቲዛ ጊሻሳ ጌቴስ። ሃራቲ ቃሴ ኢዚ ኣስ ኣይሌቴላፊ ኬሲዛ
ኢሲ ዲርጂቴ ጊዶን ዲዛ ጊሻሳ ጌቴስ። † 10:4 ኣስቆሮንቶ፥ ሃይሳ ሃ ቃላ
ጊሻስ ሸቂዛ ናምኡ ቆላቲ ዴቴስ፤ ኢሶይ ዩሁዲ ኣስቆሮንቶ ጌቴቲዛ ዴሬፔ ዬዳይሳ
ቤሳናስ ጎኡቴሺን ሃራቲ ቃሴ ዩሁዲ ዋርዳንቻኔ ባሌሊዛይሳ ጊዲ ጫያናስ ጎኡቲዛ
ሱንላ ጌቴስ። 10:7 ሉቃ 10:4-12 10:10 1ቆሮ 9:14፤ 1ጲሞ 5:18

13 ሄ ከላይ ሳርታይ ቤሲዛ ከሌ ጊዲኮ አንቴ ሳርታይ ሄ ከላሰ ጊደ፤ ሳርታይ ቤሶንታ ከሌ ጊዲኮ አንቴ ሳርታይ ኣጊ አንቴሰ ሲሞ።

14 እይ አሲካ አንቴና ሞኪ ኤካናሲኔ አንቴ ጊዛ ሲያናሰ ኮዮንታዴ ጊዲኮ ሄሳዴ ከላፌ ወይኮ ሄ ካታማፔ ከዚሼ ኢሰታ ቦላ ዪዛ ጎሜፔ አንቴ ኣቲዳይሳሰ ማርካ ጊዳና ማላ አንቴ ቶሆ ቦላ ዲዛ ጉዱላ ፒቲዲ ከዚቴ።

15 ታ አንቴሰ ቱሙ ጋይሰ፤ ፒርዳ ጋላሰ ሄ ካታማይ ቦላ ጋካና ፒርዳይ ሶዶሜ ቦላኔ ጋሞራ ቦላ ጋኪዳ ፒርዳፌ ዴጾ ጊዳና።

16 «ታ አንቴና ዶርሳ ማላ ካና ሱይቲታ ጊዶራ ኪታይሰ። ሄሳ ጊሻሰ ሾሻ ማላ ጨንጫታኔ ሃራጼ ማላ ኣሸኬታ ጊዲቴ።

17 ኣሳይ አንቴና ኦይኪዲ ፒርዲዛ ዱላታሰ ሽሻና፤ እይሁዳቲ ባ ዋሳ ከላን አንቴና ጋራፋና፤ ሄሳ ጊሻሰ ኢሰታፌ ናጌቲቴ።

18 ታ ጋሶን ዴሬ ሃሪዛይታኮኔ ካዎታኮ አንቴና ኤፋና፤ ኢሰታ ሲንላኒኔ ኣማናንታ ኣሳታ ሲንላን አንቴ ማርካ ጊዳና።

19 አንቴና ኢሰቲ ኦይኪዛ ወዴ፥ ሱ እይ ጊ ሃሳይና? ዎዝጊ ዛር ኢሚና? ጊ ሂርጎፍቴ። ሄ ወዴ አንቴ ጋናዚ አንቴሰ ኢሜታና።

20 አንቴናን ሃሳያናይ አንቴ ኣዋ ኣያናፔ ኣቲን አንቴና ጊዴኬታ።

21 «ኣሻይ ባ ኣሻ ሃይቆሰ ኣሌ ኢማና፤ ኣዋይ ባ ና ቦላ፥ ናይቲ ባና ዬሊዳይታ ቦላ ማካላቴላን ዴንዲዲ ሃራ ኣሳን ወዴሳና።

22 ታ ጊሻሰ አሲ ዉሪካ አንቴና ኢጻና። ጊዶ ኣቲን ዉርሴላ ጋካናሰ ሚኒ ኤቂዳይ ኢዚ ኣታና።

23 ኣሳይ አንቴና አንቴ ዲዛ ሄራፔ ጎዲኮ ሃራሶ ኪቺቲ! ታ አንቴሰ ቱሙ ጋይሰ፤ አንቴ ኢሰራኤሌ ካታማ ኡባ ጋኮንታ ዲሺን ታ ኣሳ ናይ ያና።

24 «ኣሽካራይ ጎዳፔ ወይኮ ካሊዛዳይ ካሌሊዛዴፌ ኣጴና።

25 ታማሬይ ባና ታማርሲዛይሳ ማላ ወይኮ ኣሽካራይ ባ ጎዳ ማላ ጊዲኮ ሄሲ ኢዛሰ ጊዳና። ከላ ኣዋ፥ «ቢኤሊዜቡላ» ጊኮ ኢዛ ሶ ኣሳ ኣይሰ ሄሳፌ ኢታ ጌቴኔ!

26 «ሄሳ ጊሻሰ ኢሰታሰ ባቦፍቴ፤ ጌሜቲዳይ ቆንጮንታ ቆቴቲዳይ ጌሽ ከዞንታ ኣቴና።

10:14 ሃዋ 13:51 10:15 ማቶ 11:24 10:16 ሉቃ 10:3 10:17 ማር 13:9-11፤ ሉቃ 12:11-12፤ 21:12-15 10:22 ማቶ 24:9፤ ማር 13:13፤ ሉቃ 21:17 10:24 ሉቃ 6:40፤ ዮሃ 13:16፤ 15:20 10:25 ማቶ 9:34፤ 12:24፤ ማር 3:2፤ ሉቃ 11:15 10:26 ማር 4:22፤ ሉቃ 8:17

27 ታ ኢንቴስ ዱማራ ዮቲዳይሳ ፖኦን ሃሳይቴ፤ ሃይላን ሲዱዳይሳ ቆንጮን ሃሳይቴ።

28 አሾ ዋዲኮፌ አቲን ሼምፖ ዋዳናስ ዳንዳዮንታይታስ ባቦፍቴ፤ ሄሳፌ አሾኔ ሼምፖ ጋሊ ጋናሜ ታማን ዳይሳናስ ዳንዳይዛይሳስ ባቢቴ።

29 ኢሲ ሳንቴን ባይዘቲዛ ናምኡ ሲኔ ካፎታፔ ኢሲኒያካ ኢንቴ ሳሎ አዋ ሼኔይ ባይንዳ ጮ ኩንዳ አቱኩ። ‡

30 ሃራይ አቶሺን ኢንቴ ሁኤ ቢናናይካ ታይቦን ዴስ።

31 ሄሳ ጊሻስ ባቦፍቴ። ዳሮ ሲኔ ካፎታፔ ኢንቴ ዋጋይ አዲ ቦንቹቲዳዛ።

32 «አሳ ሲንላን ታስ ማርካቲዛዴስ ታኒካ ሳሎን ዲዛ ታ አዋ ሲንላን ኢዛዴስ ማርካታና።

33 ቃሴ አሳ ሲንላን ታና ካዲዳዴ ታኒካ ሳሎን ዲዛ ታ አዋ ሲንላን ኢዛ ካዳና።

34 «ታኒ ቢታ ቦላ ሳሮቴላ ኤሃናስ ዪዳ ኢንቴስ ሚሳቶፖ፤ ማሻ ኤሃናስ አቲን ሳሮቴላ ኤሃናስ ያቤኬ።

35 ታኒ ዪዳይ ና አዋቴ፤ ማጫ ና አይቴ፤ ና ማቾ ቦሎቲፔ ሻካናሳ።

36 አሳስ ሞርኬይ ሶ አሳ ጊዳና።

37 «ታፔ አሊዲ ባ አዋ ዎይኮ ባ አዮ ሲቁዛዴይ ታስ ጊዳናስ ቤሴና። ታፔ አሊዲ ባ አቱማ ና ዎይኮ፤ ማጫ ና ሲቁዛዴይ ታስ ጊዳናስ ቤሴና።

38 ባ ማስቃሌ ቶኪዲ ታና ካሎንታ አሲ ታስ ጊዳናስ ቤሴና።

39 ባ ሼምፖ አሻናስ ኮይዛዴይ ዳይሴስ፤ ባ ሼምፖ ታ ጊሻስ አሊ ኢሚዛዴይ አሼስ።

40 «ኢንቴና ሞኪ ኤኪዛዴይ ታናካ ሞኪ ኤኬስ። ታና ሞኪ ኤኪዛዴይ ታና ኪቲዳዴካ ሞኪ ኤኬስ።

41 ኢሲ ናቤ ናቤቴላን ሞኪ ኤኪዛዴይ ሄ ናቤዛ ዋጋ ዴማና። ጸሎ አስ ኢዛ ጸሎቴላ ጊሻስ ሞኪ ኤኪኮ ሄ ጸሎዛ ዋጋ ኤካና።

‡ 10:29 ሲኔ ካፎ፤ ሲኔ ካፎ ኢሲ ኢሲ ባጋ ጋሞላ ቃላን ሲኔ ጊዛይሲ ጋሼ ካፎ ጉሳ። 10:33 2ጸዎ 2:12 10:38 ማቶ 16:24፤ ማር 8:34፤ ሉቃ 9:23

10:39 ማቶ 16:25፤ ማር 8:35፤ ሉቃ 9:24፤ 17:33፤ ዮሃ 12:25 10:40 ማር 9:37፤ ሉቃ 9:48፤ ዮሃ 13:20

42 ሄሳ ገሻሰ ታ አንቴስ ቱሙ ጋይስ፤ ኦኒካ ሃይታ ጉላታፔ ታና ካሊዛዴ ጊዲዳ ገሻሰ ኢሲ ጹኣ ኢርጸ ሃል ኡሺኮ ሂኒሰካ ዋጋይ ጳዬና» ጊዴስ።

11

ጸማቂዛ ዮሃንሲ ከቲዳ አሳታ
(ሉቃ 7:18-35)

1 ዬሱሲካ ባና ካሊዛ ታማኔ ናምኡ አሳታሰ አዛዞ አሚ ወርሲዳፔ ጉዬ ታማርሳናሲኔ ሳባካናሰ ጋለላን ዲዛ ካታማታ ቢዴስ።

2-3 ዮሃንሲ ቃሾ ከላን ዲሼ ከርሰቶሲ ኦሊዛ ሃናታ ሲዬዲ ባና ካሊዛይታ ኢዛኮ ዬዲዲ፥ «እስ ኣሺዛዴይ ያና ጌቴቲዳይ ኔኔዬ? ሃራ ናጊኖ?» ጊዲ ኦይቺዴስ።

4 ዬሱሲካ ዛሪዲ፥ «ቢዲ አንቴ ሲዬዳይሳኔ አንቴ ቤኢዳይሳ ዮሃንሳስ ዮቲቴ።

5 ቆቂቲ ጸሌቴስ፤ ዋቤቲ ሄሜቴቴስ፤ አንቺራቻ ሃርጊዛይቲ ፓጾቴስ፤ ቱሌቲ ሲዬቴስ፤ ሃይቂዳይቲ ሃይቆፔ ፓጺ ዴንዴቴስ፤ ማንቆታስ ሚሺራች ቃላይ ዮቴቴስ።

6 ታናን ቆጶቶንታዴይ አንጃቲዳዴ» ጊዴስ።

7 ዮሃንሳ ካሊዛይቲ ቢዳፔ ጉዬ ዬሱሲካ አሳስ ዮሃንሳ ገሻሰ፥ «ኣይ ቤያናሰ ዲጌ ባዞ ቢዴቲ? ጫርኮይ ቃሊዛ ሾምቦቆ ቤያናሰ ዬዴቲ?

8 ዋይኮ ኣይ ቤያናሰ ከዚዴቲ? ሎኦ ማይኦ ማይኢ ዲዛይታ ቤያና ዬዴቲ? ሎኦ ማይኦ ማይኢዲ ሎኢዛይቲ ካዋታ ከላን ዴቴስ።

9 ሂሰቲን ኣይ ቤያና ከዚዴቲ? ናቤ ቤያና ከዚዴቲ? ኤ፥ ታ አንቴስ ጋይስ፥ ናቤፔ ኣጃዛይሳ ቤያናሳ።

10 « ኔ፥ ባና ኦጌ ኔስ ጊጊሳናዴ

ኔፔ ካሴታ ታ ኔስ ከታና

ጌቴቲዲ ኢዛ ገሻሰ

ካሴ ጸፊቲዳዴይ

ኢዛኮ!» ጊዴስ።

11 «ታ አንቴስ ቱሙ ጋይስ፤ ማጫሳፌ ዬሌቲዳ አሳፔ ጸማቂዛ ዮሃንሳ ሚሳቲዛ አሲ ቢታ ቦላ ዴንዲቤና። ጊዲኮካ ጸሳ ካዋቲላን አስ ኡባፌ ላፋ አሲ ዮሃንሳፔ ኣቆና።

12 «ጸማቂዛ ዮሃንሳ ዋዴፔ ሃ ሲሚን ሃኢ ጋካናሰ ሳሎ ካዋቲላያ ዳር ባጼ ቦላ ዳዉስ። ሚኖ አሳቲ ጸላ ኢዞ ዴማና።

13 ናቤቲካ ሙሴ ዋጋይካ ወሪ የሃኒሳ ዋዴ ጋካናሰ ቡሮፔ ሃናናይሳ የቲዳ።

14 ሂስቲኮ ኢንቲ ኤካና ኮይኮ ኢዚ ያና ጌቲቲዳ ኤላሲ ኢዛኮ!

15 ሲዪዛ ሃይሊ ዲዛ ኣሲ ሲዮ!

16-17 «ሃይሳ ሃ ዋዴ ኣሳ ኣዛን ለሚሶ? ጊያን ኡቲዲ ባ ላጌታ፥ ሉ ኢንቲስ ዲላ ዲጺን ኢንቲ ዱሪቤኬታ! ዬሆ ዚላሰ ዚላሊን ዬኪቤኬታ!» ጊዛ ናይታ ሚሳቲቲስ።

18 የሃኒሲ ሙሳፌኔ ኡሻፌ ናጌቲዲ ዪዳ ጊሻስ፥ ሉዚ ዳይዳንፋራ ዴስ) ጊዳ።

19 ታ ኣሳ ናይ ማሼኔ ኡያሼ ዪን፥ ሃይሲ ሚዲ ካሎንታ ኣሳ፥ ኡሻንቻ፥ ቃራጸ ሺሺዛይታሲኔ ናጋራንቻታሰ ላጌኮ!» ጊዳ። ጊዳ ኣቲን ጸሳ ኤራቴሊ ባ ኦሶን ጸላዲስ» ጊዴስ።

ኣማኖንታ ኢጲዳ ጊሻስ ዋላሴቲዳ ካታማታ
(ሉቃ 10:13-15)

20-21 ሄሳፌ ጉዬ ዬሱሲ ኢዚ ማላታታ ኦሊዳ ካታማ ኣሳይ ማርቲላን ጌሎንታ ኣጊዳ ጊሻስ፥ «ኩራዚኔኔ ቤቲሳይዳ! ኢንቲና ኣዬ ኣና! ኢንቲ ቦላ ኦሴቲዳ ማላታይ ጸረሴ ቦላኔ ሲዶና ቦላ ኦሴቲዳኮ ኢስቲ ማቃ * ማይኢዲኔ ቢዲንፋን ኡቲዲ ቤኒ ማርቲላን ጌላናኮሺን።

22 ሄሳ ጊሻስ ታኒ ኢንቲስ ጊዛይ ፒርዳ ጋላስ ኢንቲፌ ኣጲ ጸረሴሲኔ ሲዶናስ ቂጸቲይ ካዉያና።

23 «ሃኔ ቂፊርናሆሚ ፑዴ ሳሎ ቶቁ ቶቁ ጋናስ ኮያዲ? ጊዳ ኣቲን ኔኒ ዱጌ ሲኦሌ ዋጳንዳሳ፤ ኔ ቦላ ኦሴቲዳ ማላታይ ሶዶሚን ኦሴቲዳኮ ሶዶሚይ ሃች ጋካናሰ ዳናኮሺን።

24 ሄሳ ጊሻስ ታ ኔና ጊዛይ ፒርዳ ጋላስ ቂጸቲይ ኔፔ ሶዶሚስ ካዉያና» ጊዴስ።

ኪርሰቶሲ ኣሚዛ ሺምፖ
(ሉቃ 10:21-22)

25 ሄ ዋዴ ዬሱሲ፥ «ሳሎኔ ሳኣ ጎዶ! ታ ኣዋዉ! ሃይሳ ዳር ኤራንቻታፔኔ ጨንጫታፔ ቆታዳ ቄሪ ናይታሰ ኔ ቆንጨሲዳ ጊሻስ ታ ኔና ጋላታይስ።

26 ታ ኣዋዉ! ኤ ሃይሲ ኔ ሲንፋን ሎኦ ኔ ሺኔ ጊዲ ቤቲዴስ።

11:14 ማቶ 17:10-13፤ ማር 9:11-13
ኢሲ ኢሲ ባጋ ጋሞሶ ቃላን ዋር ጌቲቲስ።

* 11:20-21 ማቃ፥ ማቃ ጌቲቲዛይሲ
11:24 ማቶ 10:15፤ ሉቃ 10:12

27 «ወሪካ ታ አዋፔ ታስ ኢሜቲዳስ፤ አዋፔ አቲን ናዛ ጊሻስ ኤሪዛ አሲ ባ፤ ቃሴ ናዛፔኔ ናዚ ባ ሸኔን ቆንጪሲዳ አሳፔ ሃራይ አዋ ኤሪዛ አሲ ባ።

28 «ቶሆይ ዴዲዳይቶ፥ ዳቡርዳይቶ፥ ኢንቴ ወሪካ ታኮ ሃ ዪቴ፤ ታኒካ ኢንቴስ ሸምፖ ኢማና።

29 ታ ቃምባራ ቶኪቴ፤ ታፔካ ታማርቴ፤ ታኒ ታ ዎዚናን አዳኔ አሽኬ፤ ኢንቴ ሸምፖስ ኢንቴ ሸምፖ ዴማና።

30 ታ ቃምባራይ ሻይኮኔ ታ ቶሆይ ካወሻ» ጊዳስ።

12

ሳምባታ ጊሻስ ሸቂዳ ኦይሾ

(ማር 2:23-28፤ ሉቃ 6:1-5)

1 ሃሳፌ ጉዬ ዬሱሲ ሳምባታ ጋላስ ካላ ጊዶራ አጂ ቢዳስ። ኢዛ ካሊዛይቲካ ጋፊዳ ጊሻስ ቲያ ዱሊዲ ሸጌቹ ሙስ ኦይኪዳ።

2 ፋርሳዊቲ ሃሳ ቤኢዲ ዬሱሳ፥ «ሄኮ ኔና ካሊዛይቲ ሳምባታ ጋላስ ኦሴታናስ ቤሶንታይሳ ኦሴቴስ» ጊዳ።

3 ኢዚካ ኢስታስ ዛሪዲ፥ «ዳዊቲኔ ኢዛራ ዱዛ አሳቲ ጋፊዳ ዎዴ ኢዚ አይ ኦሊዳኮን ናባቢቤኬቲ?

4 ጸሳ ኬሌ ጌሊዲ ቄሴታፔ አቲን ዳዊቲኔ ኢዛራ ዱዛይቲ ቦቻናስ ቤሶንታ ዴማቲዳ ኡኬላ ሚዳስ።

5 ቃሴ ቄሴቲ ሳምባታ ሻሪዲ ጸሳ ኬላ ጊዶን ኦሶ ኦሊኮ ሞሮ ጊዶንታይሳ ሙሴ ዎጋፔ ናባቢቤኬቲ?

6 ጊዲኮካ ታ ኢንቴስ ጊዛይ ጸሳ ኬላፊ አጂዛዴይ ሃን ዳስ።

7 ታኒ ያርሾ ጊዶንታ ማሮቴላ ዳሳይስ» ጊዛ ቃላይ አይ ጉሳኮ ኢንቴ ኤሪዛኮ ጸሎታ ቦላ ፒርዴኬታኮሺን።

8 አሳ ናይ ሳምባታስ ጎዳ» ጊዳስ።

9 ሄፔ ኢዚ አጂ ቢሸ አይሁዳታ ዎሳ ኬላ ጌሊዳስ።

10 ሄንካ ኢሲ ኩሸ ሲሊዳዴይ ዳስ። ዬሱሳ ሞታናስ ጋሶ ኮዪዲ፥ «ሳምባታ ጋላስ ፓላናስ ቤሲዜ?» ጊዲ ኢዛ ኦይቹዳስ።

11 ኢዚካ ኢስታ፥ «ኢንቴፌ ኢሳዴ ዶርሲ ሳምባታ ጋላስ ኦላን ጌሊኮ ባ ዶርሳ ኢዚ ጌሊዲ ኦላፌ ጎቹ ኬሲ ኤሬኔ?

12 ሂሰቲኮ አሲ ዶርሳፌ ኬሂ አጄኔ? ሃሳ ጊሻስ ሳምባታ ጋላስ ሎኦ ኦሶይ ዲጌቴና» ጊዳስ።

13 ቃሴካ አዳዛ፥ «ኔ ኩሸ ፒዲሳ!» ጊዳስ፤ አዳዚካ ባ ኩሸ ፒዲሲን ሂንኮ ኩሼዛ ማላ ፓጻ ጊዲዳስ።

14 ጊዶ አቲን ፋርሳዌቲ ሄፔ ኬዚዲ፥ ዬሱሳ ዋስቲ ኦይኪ ዋቆናኮ ባ ጊዶን ዘሬቲዳ።

ጸሲ ዶሪዳ አሽካራ

15 ዬሱሲ ኢስታ ቆፋ ኤሪዲ ሄፔ ሃራሶ ሼርኢ ጊዴሰ። ዳሮ ዴሬይ ኢዛ ካሊዴሰ፤ ሃርጋንቻታካ ኡባ ፓሊዴሰ።

16 ኢዚ ኦናኮኔ አሳሰ ዮቶንታ ማላ ኢስታ አዛዚዴሰ።

17-21 ሄሲካ ሃኒዳይ ናቤ አሳያሳን፥

«ታ ዶሪዳይኔ

ታ ኢዛን ኡፋዬቲዛ

ታ ናይ ሃይሳኮ!

ታ አያና ታ ኢዛ ቦላ ዋላና፤

ኢዚካ አማኖንታ ዴሬታሰ

ቱሙ ፒርዳ አዋጃና፤

ማርሼቴና፤

ዋይኮ ዋሴና።

ኢዛሰ ቃላይካ

ካሬን ሲዬቴና፤

ሱሬ ፒርዳ ጸኖሰ

ጋላና ጋካናሰ

ዲንጨቲ ኡቲዳ ሾሞቦቆካ

ሜንሉናኔ ጨዋቲዛ

ሙቃዳካ ቶይሴና፤

አይዛቤቲ ኢዛ ኡፋይሳን ናጋና»

ጌቴቲ ዮቴቲዳ ቲንቢቲ

ቃላይ ፖሌታና።

ዬሱሳኔ ቢኤሊዜቡላ

(ማር 3:20-30፤ ሉቃ 11:14-23)

22 ሄሳፌ ጉዬ ዳይዳንሊ ኦይኪን ጸላናሲኔ ሃሳያናሰ ዳንዳዮንታ ኢሲ እሰ ዬሱሳኮ ኤኪ ዪዳ። ዬሱሲካ ኢዛ ፓሊን አዴዚ ጸላናሲኔ ሃሳያናሰ ዳንዳይዴሰ።

23 አሳይ ዉሪካ ማላሌቲዲ፥ «ሃይሲ አዴዚ ዳዊቲ ናሻ?» ጊዴሰ።

24 ጊዶ አቲን ፋርሳዌቲ ሄሳ ሲዪዲ፥ «ሃይሲ አዴዚ ዳይዳንሊ ኬሲዛይ ዳይዳንላ ሃላቃ ቢኤሊዜቡላ ዋልቃን ጸላ ጊዳናሰ ቤሴሰ» ጊዳ።

25 ዩሱሲካ ኢስታ ቆፋ ኤሪዲ፥ «ባ ጊደን ኢሶይ ኢሳፌ ቫኬቲዛ ካዎቴሊ ወሪካ ኩንዳና፤ ባ ጊደን ቫኬቲዛ ካታማይ ዎይኮ ኬፋ እሲ ሚኔና።

26 ጸላኤይ ጸላኤ ኬሲዛ ጊዲኮ ጸላኤይ ባ ጊደን ቫኬቲዳስ ጉሳ። ሄሳፉ ሃንኮ ኢዛ ካዎቴሊ ዋኒ ሚናና ዳንዳይዜ?

27 ታኒ ቢኤሊዜቡላ ዎልቃን ኬሲዛ ጊዲኮ ኢንቴ ናይቲ ኣዛ ዎልቃን ኬሳኔ? ሄሳ ገሻስ ኢንቴ ናይቲ ኢንቴ ቦላ ፒርዳና።

28 ጊደ ኣቲን ታኒ ዳይዳንል ኬሲዛይ ጸሳ ኣያናን ጊዲኮ ጸሳ ካዎቴሊ ኢንቴኮ ዪዴስ ጉሳ።

29 «ዎይኮ እሲ እሲ ዎልቃራ ዲዛዴ ኬል ጌሊዲ ሚሺ ቦንቃና ኮይኮ ካሴቲዲ ሄ ዎልቃራ ዲዛ ኣዴዛ ኦይኪ ቃቾንታ ዎስቲ ቦንቃኔ? ቃቾዳፔ ጉዬ ቦንቃና ዳንዳይዜ።

30 «ታናራ ጊደንታዳይ ታናራ ኤቄቴስ፤ ታናራ ኢሲፌ ሺሾንታ እሲ ወሪካ ላሌስ።

31 ሄሳ ገሻስ ታ ኢንቴስ ቱሙ ጋይስ፤ ናጋራ ኦሶይኔ ጫሺ ወሪ ኣሳስ ኣቶ ጌቴታና ሺን ጸሎ ኣያና ጫዲዳይዜ ማሪቴና።

32 ኣይ እሲካ ኣሳ ና ቦላ ሃሳይዛ ኢታ ቃላ ገሻስ ማሪታናሽን፤ ጸሎ ኣያና ቦላ ሃሳይዛ ኢታ ቃላይ ጊዲኮ ሃይሳ ሃ ዎዴን ጊዲን ዎይኮ ቡሮ ያና ዎዴን ጊዲን ማሮይ ዴና።

ሎኦ ሚሊ ሎኦ ኣይፌን ኤሬቴስ

(ሉቃ 6:43-45)

33 «ሚሊ ወሪ ኣይፌን ኤሬቴዛይሳ ማላ ኢንቴ ሎኦ ኣይፌ ዴማናስ ኢንቴስ ሎኦ ሚሊ ዶ፤ ኢንቴስ ኢታ ሚሊ ዲዛ ጊዲኮ ኢንቴ ኢታ ኣይፌ ኤካና።

34 ኢንቴኖ ማርዜራ ዲዛ ሸሻቶ! ኢንቴ ኢታታ ጊዲ ኡቲዲ ዋኒ ሎኦ ሃሳያናስ ዳንዳይቲ? ኡሎ ጊደን ኩሚዳዚ ዶናራ ሃሳይቴስ።

35 «ሎኦ እሲ ባ ዎዚናን ኩንሊ ዎሊዳ ሎኦ ቆፋፔ ሎኦ ሃሳይስ፤ ኢታ እሲካ ባ ዎዚናን ኩንሊ ዎሊዳ ኢታቴሳፌ ኢታ ዮኦ ኬሴስ።

36 ጊደ ኣቲን ታ ኢንቴስ ጊዛይ ኣሳይ ባ ሃሳይዳ ሃዳ ቃላ ኡባ ገሻስ ፒርዳ ጋላስ ወሪካ ኦይሼታና።

37 ጋሶይካ ኔ ቃላፔ ዴንዲዳይሳን ኔ ጸላዳ ኣታናኔ ኔ ቃላፔ ዴንዲዳይሳን ኔ ቦላ ፒርዴታና» ጊዴስ።

ማላታ ቤያናስ ሸቂዳ ኦይሾ

(ማር 8:11-12፤ ሉቃ 11:29-32)

38 ሄሳፌ ጉዬ ኢሲ ኢሲ ሙሴ ዋጋ ታማርሲዛይቲኔ ፋርሳዌቲ ይሱሳ፡ «ኣስታማሬ! ኑ ኔፔ ማላሊሲዛ ማላታ ቤያና ኮዮስ» ጊዳ።

39 ኢዚ ኢስታስ ዛሪዲ፡ «ሃ ኢታኔ ላይማ ዩሌታይ ማላታ ኦይቹስ፤ ጊዶ ኣቲን ናቤ ዮናሳ ማላታፔ ኣቲን ሃራ ማላታይ ኢሜቲና።

40 ዮናሲ ጌታ ሞሌ ኡሎ ጊዶን ሄሹ ቃማኔ ሄሹ ጋላስ ጋምኢዳ ማላ ኣሳ ናይካ ሄሹ ጋላሲኔ ሄሹ ቃማ ቢታ ጋርሳን ጋምኣና።

41 ናናዌ ኣሳይ ፒርዳ ጋላስ ሃይሳ ሃ ዩሌታራ ዴንዲዲ ሃ ዩሌታ ቦላ ፒርዳና፤ ጋሶይካ ናናዌ ኣሳይ ዮናሳ ማርካቴላን ማርቴላ ጌሊዳ ገሻሳ። ሄኮ ዮናሳፔ ኣጂዛይይ ሃን ዴስ።

42 ዱጌሃ ዴሬ ካዎያ ሶሎሞኔ ኤራቴላ ሲያናስ ቢታ ጋጽፔ ዴንዲዳ ዩዳ ገሻስ ፒርዳ ጋላስ ኢዛ ሃይሳ ሃ ዩሌታራ ዴንዲዳ ሃ ዩሌታ ቦላ ፒርዳና። ሄኮ ሶሎሞኔፔ ኣጂዛይይ ሃይሳን ዴስ።

43 «ቱና ኣያናይ ኣሳፔ ኬዚዲ ሸምፖ ዴማናስ ሃሊ ባይንዳ ሜላ ቢታን ዳቡሬስ። ጊዶ ኣቲን ባ ኮይዛ ሸምፖዛ ዴሜና።

44 ሄሳፌ ቃሴ ካሴ ታ ዲዛሶ ሲማ ባና ጊዲ ቤኒሶ ኢዚ ሲሚሺን ካሴ ኢዚ ዲዛሶይ ኣይኮይካ ባይንዳ ሜላ ኬሉ ጊዲዲ ጌዩዳይሳኔ ጊጌቲ ዲዛይሳ ዴሜስ።

45 ሄሳፌ ቢዲ ሃራ ባፔ ኢቲዛ ላፑን ኢታ ኣያናታ ባናራ ኤኪዲ ዩስ። ኢስቲካ ሄ ኣዴዛን ጌሊዲ ዴኣና። ሄ ኣዴዛስ ካሴ ዱሳፌ ጉዬ ዱሳይ ኢታ ጊዳና። ሃይሳ ኢታ ዩሌታስካ ሄሳ ማላ ሃናና» ጊዴስ።

ይሱሳ ኣዩዮኔ ኢዛ ኢሻታ

(ማር 3:31-35፤ ሉቃ 8:19-21)

46 ዩሱሲ ኣሳስ ዮቲሺን ኢዛ ኣዩያኔ ኢሻቲ ኢዛ ዮቻና ኮዩዲ ካሬን ኤቂዳ።

47 ኢሲ ኣሲ፡ «ሄኮ ኔ ኣያኔ ኔ ኢሻቲ ኔና ሃሳይሳናስ ካሬን ኤቂዲ ኔና ኮዩቴስ» ጊዴስ። *

48 ዩሱሲካ፡ «ታ ኣያ ኦኔ? ታ ኢሻቲቶ! ኢስቲ ኦናንቲ?» ጊዴስ።

12:38 ማቶ 16:1፤ ማር 8:11፤ ሉቃ 11:16 12:39 ማቶ 16:4፤ ማር 8:12

* 12:47 ኢሲ ኢሲ ጌሻ ማጻፋታን ታይቦ ኦይዲ ታማኔ ላፑና ቦላ ዲዛ ቃላይ ዴና።

49 ባ ኩሼራ ባና ካሊዛይታኮ ማላቲዲ፥ «ታ ኣያኔ ታ ኢሻቲ ሃይታንታ።

50 ሳሎን ዲዛ ታ ኣዋ ሼኔ ኦሊዛይቲ ወሪካ ታስ ኢሻ፥ ሚሻኔ ኣዮ» ጊዴሰ።

13

ዜሬል ዜሪዛዴ ለሚሶ

(ማር 4:1-9፤ ሉቃ 8:4-8)

1 ሄ ጋላስ ዬሱሲ ኬላፌ ካሬ ኬዚዲ ኣባ ላንቄን ኡቲዴስ።

2 ዳር ዴሬይ ኢዛ ዩዩ ኣዲ ጊዶሊዳ ጊሻስ ኣሳ ኣባ ጋጸን ኣጊዲ ዋጎሎ ጊዶ ጌሊ ኡቲዲ፥

3 ዳር ዮኦ ለሚሶራ፥ «ኢሲ ጎሻንቻይ ዜሬል ዜራናስ ኬዚዴሰ።

4 ኢዚ ዜሪሺን ኢሲ ኢሲ ዜሬሊ ኦጌ ዶናን ዋዲን ካፎቲ ዩዲ ማጺ ሚዲ።

5 ኢሲ ኢሲ ዜሬሊ ማላኔ ሹቻቲዛ ቢታ ቦላ ዋዲን ቢታይ ማላ ቢታ ጊዲዳ ጊሻስ ኤሌ ጫሪዴሰ።

6 ጊዶ ኣቲን ኣዋይ ኣዋቲን ሹሊዲኔ ጸጸ ዩዶንታ ኣጊዳ ጊሻስ ማሊዴሰ።

7 ኢሲ ኢሲ ዜሬላይ ኣጉንላ ጊዶን ዋዲዴሰ፤ ኣጉንላይካ ዲጪዲ ጫሬቻ ጩሊዴሰ።

8 ሃራ ዜሬሊካ ኣራዳ ቢታን ዋዲዲ ኣይፊካ ኣይፊዴሰ፤ ኢሶይ ጾቱ፥ ኢሶይ ኡሱፑን ታሙ፥ ኢሶይ ሄቩ ታሙ ኣይፊ ኢሚዴሰ።

9 ሲዩዛ ሃይሊ ዲዛዴይ ሲዮ!» ጊ ዮቲዴሰ።

10 ሃሳፌ ጉዬ ኢዛ ካሊዛይቲ ኢዛኮ ሺቂዲ፥ «ኔ ኣዛስ ለሚሶራ ዮታይ?» ጊዲ።

11 ኢዚካ ኢሰታስ፥ «ሳሎ ካዋቲላ ጵራ ኤርይ ኢንቴስ ኢማቲዴሰ፤ ኢሰታስ ጊዲኮ ኢማቲቤና።

12 ዲዛዴስ ዲዛይሳ ቦላ ጉጃታናኔ ዳራና ሺን ባይንዳዴፌ ሂና ዲዛራካ ኤኬታይቻና።

13 ታ ሃይሳላ ለሚሶራ ዮቲዛይ ኢሰቲ ሲዩሼ ኤዘጎንታ ጊሻሲኔ ዴሊሹ ዴዋንታ ጊሻሳ።

14-15 «ኢሳያሲ፥ ሓንቲ ሲስ ሲያና ሺን

ዩሺ ቆፔኬታ፤

ዴሎ ዴላና ሺን

ዎዚናን ዎሴኬታ፤
ዴሬዛ ዎዚናይ ሙሚዴስ፤
ኢስታ ሃይላይካ ሲዩና፤
ዴሎንታ ማላ
 ባ ኣይፌ ቂሊምኢዳ፤
ሄሳ ማላ ጊደንታኮ
 ኢስቲ ባ ኣይፌራ ቤኢዲኔ
 ባ ሃይላራ ሲዩዲ
 ባ ዎዚናን ዩሺ ቆፒዲ
 ታኮ ሃ ሲሚን
 ታ ኢስታ ፓላናሺን፤
 ጊዳ ቲንቢቲ ቃላይ
 ኢስታን ፖሌቲዴስ።

16 «ኢንቲ ኣይፌይ ዴሊዛ ጊሻሲኔ ኢንቲ ሃይላቲ ሲዩዛ ጊሻሲ ኢንቲ ኣንጃቲዳይታ።

17 ታ ኢንቲስ ቱሙ ጋይስ፤ ዳሮ ናቤቲኔ ዳሮ ዲሎ ኣሳቲ ሃኢ ኢንቲ ቤኢዛይሳ ቤያናሲኔ ሃኢ ኢንቲ ሲዩዛይሳ ሲያናስ ኣሞቲዳ ሺን ኢስታስ ሃኒቤና።

18 «ሂስቲኮ ሃኢ ዜሬላ ለሚሶዛ ቢርሼል ሲዩቲ።

19 ካዎቲል ቃላ ሲዩዲ ዩሺ ቆፖንታ ኣይ ኣሳ ዎዚናፔካ ጸላኤይ ዩዲ ዜሬቲዳ ዜሬላ ኤሶን ማጺቻና። ሄሲካ ኦጌ ቦላ ዎጲዳ ዜሬላ።

20 ሹቻ ቦላ ዜሬቲዳይሲ ቃላ ኡፋይሳን ሲዩዲ ሄራካ ኡፋይሳን ኤኪዛዴ ሚሳቲስ።

21 ጊዶ ኣቲን ጸጸ ዩዳናስ ዳንዳዮንታ ኣጊዳ ጊሻስ ዳሮ ጋሞኦንታ ቃላ ጋሶን ሜቶይኔ ጎዴቲል ዩዛ ዎዴ ኤሌሊ ቋጹቲስ።

22 ኣጉንላ ጊዶን ዜሬቲዳ ዜሬላይ ቃላ ሲዩዲ ሃይሳ ሃ ኣላሜዛስ ዳሮ ሜቶቲላኒኔ ዱሬቲል ቆፋን ባሌቲዲኔ ጩሌቲዲ ኣይፌ ኢሞንታ ኣሳ ማላ።

23 ሎኦ ቢታን ዜሬቲዳ ዜሬላይ ቃሴ ቃላ ሲዩዲ ዩሺ ቆፒዛዴ ሚሳቲስ፤ ሎኦ ኣይፌ ኣይፌስ፤ ኢሶይ ዴቲ፤ ኢሶይ ኡሱቸን ታሙ፤ ኢሶይ ሄሹ ታሙ ኣይፌ ኢሚዴስ» ጊዴስ።

ሌሻ ለሚሶ

24 ዩሱሲ ቃሴካ ሃራ ለሚሶ ኢስታስ፤ «ሳሎ ካዎቲል ባ ጎሻ ጋዴን ሎኦ ዜሬል ዜሬዳዴ ሚሳቲስ።

25 ጊደ ኣቲን ኣሲ ወሪ ኢቺዳ ዎዴ ሞርኬይ ዩዲ ገሰቴዛ ጊደን ሌሾ ዜሪዲ ቢዴስ።

26 ገሰቴዛ ዲጪዲ ኣይፌ ኣይፊዛ ዎዴ ሌሾይካ ኢዛራ ኢሲፌ ቤቴዴስ።

27 «ካላ ጎዳዛ ኣሸካራቲ ጎዳዛኮ ሸቆዲ፥ ሳዶ! ኔኒ ኔ ጎሻን ሎኦ ዜሬላ ዜሪቤኪ? ሃይሲ ሌሾይ ኣዋፔ ዩዴ?» ጊደ።

28 «ኢዚካ ኢሰታስ፥ ሓሳ ሞርኬይ ኦሊዴስ» ጊዴስ። ኣሸካራቲካ፥ ሓ ቢዲ ሌሾዛ ሾዳና ማላ ኮያይ?» ጊ ኦይቺዳ።

29 «ኢዚካ ኢሰታስ፥ ሓካይ ሃኔና፤ ጋሶይካ ኢንቴ ሌሾዛ ሾዲሼ ገሰቴዛራ ጋሊ ሾዳና፤

30 ኣጊቴ! ማጸ ዎዴይ ጋካናስ ኢሲፌ ዲጮ፤ ሄ ዎዴ ማጸዛይቲ ሌሾዛ ካሴቲዲ ቆሪ ማጸዲ ታማን ጸጋናስ ሚርቄን ሚርቄን ቃቺቲ፤ ገሰቴዛ ቃሴ ሺሺዲ ጎታራን ጌልሊቴ» ጋዳ ታ ኢንቴስ ዮታና» ጊ ዮቴዴስ።

ሚላ ኣይፌ ሌሚሶኔ ኢርሾ ሌሚሶ

(ማር 4:30-32፤ ሉቃ 13:18-19)

31 ሃራ ሌሚሶ ኢሰታስ፥ «ሳሎ ካዎቴሊ ኢሲ ኣሲ ባ ጋዴ ጊደን ዜሪዳ ባርዛፌ ሚላ ኣይፌ ማላ።

32 ባርዛፌ ሚላ ኣይፌይ ሃራ ሚላ ኣይፌ ኡባፌ ዳሮ ላፋ ጊዲኮካ ዲጫዳ ሚላ ኡባፌ ጊታ ጊዳዉስ። ሳሎ ካፎቲካ ኢዚ ሃጋ ቦላ ኬጸዲ ዳና ጋካናስ ጊታ ሚላ ጊዳዉስ» ጊዴስ።

33 ሃኢካ ሃራ ሌሚሶ ኢሰታስ፥ «ሳሎ ካዎቴሊ ማጫሲ ቡኬሶይ ዴንዳና ማላ ቡኬሶ ጊደን ጉጂዳ ጉላ ኢርሾ ሚሳታዉስ» ጊዴስ።

34 ዬሱሲ ሃይሳ ኡባ ኣሳስ ሌሚሶራ ዮቴዴስ። ሌሚሶይ ባይንዳ ኢሲኖካ ዮቴቤና።

35 ሄሲካ ካሴ ናቤ ዶናን፥

«ታ ዶና ሌሚሶን ታ ዶያና፤

ኣላሚይ ሜጴቶሶፔ

ሃ ሲሚን

ቆቴቲዳይሳ ታ ሃሳያና»

ጌቴቲ ዮቴቲዳይሲ ፖሌቲዴስ።

ሌሾ ሌሚሶዛ ቢርሼል

36 ሄሳፌ ዩሱሲ አሳ አጊዲ ሶ ጌሊዳስ። ኢዛ ካሊዛይቲ ኢዛኮ ሸቂዲ፥ «ካላ ጊደን ዲዛ ሌሸዛ ጊሻስ ኔ ዮቲዳ ሌሚሶዛ ቢርሼል ኑስ ዮታ» ጊዳ።

37 ኢዚካ ኢስታስ ዛሪዲ፥ «ሎኑ ዜሬል ዜሪዳይ አሳ ና።

38 ጎሻይ ሃይሳ አላሜዛ፤ ሎኑ ዜሬል ካዎቴላ ናይታ ጊዲዳይሳ ቤሴስ፤ ሌሸይ ቃሴ ጸላኤ ናይታ።

39 ሌሸዛ ዜሪዲ ቢዳ ሞርኬይ ዳቡሎሳ። ማጸ ዎዴይ አላሜ ወርሴል ጊዲሺን ማጸዛይቲ ጸሳ ኪታንቻታ።

40 «ሌሸይ ቆሬቲዲ ታማን ጸጌቲዛ ማላ አላሜ ወርሴላን ሄሳሶ ሃናና።

41 አሳ ናይ ባ ኪታንቻታ ኪታና፤ ኢስቲካ ናጋራስ ጋሶ ጊዲዳይታኔ ኢታ ኦሊዛይታ ኢዛ ካዎቴላ ጊዶፌ ኡባ ቆሪ ኬሳና።

42 ዩሆይ ዲዛሶኒኔ አች ጋርጨዛሶን ዳር ዎልቃማ ታማን ኢስታ ዩጋና።

43 ሄ ዎዴ ጸሎቲ ባ አዎ ካዎቴላን አርሼ ማላ ፖኣና። ሲዩዛ ሃይሊ ዲዛዴይ ሲዮ!

ቆታን ዲዛ ሃርኔ ኢንቁ ጌቲቲዛ ዎርቃ ሌሚሶ

44 «ሳሎ ካዎቴሊ ጋዴ ጊደን ቆቴቲዳ ሚሼ ሚሳቴስ። ኢሲ አሲ ሄ ሚሻዮ ዴሚዲ ዛሪ ቆቴዴስ። ኡፋይሳፌ ዴንዲዳይሳን ቢዲ ባስ ዲዛዝ ኡባ ባይዚዲ ሄ ሚሺያ ዲዛ ቢታ ሻሚዴስ።

45 «ሄሳሶካ ሳሎ ካዎቴሊ አልኦ ዎርቃ ኮይዛ ዛልኣንቻ ሚሳቴስ።

46 ዳር አልኦ ጊዲዳ ኢንቁ ጌቲቲዛ ሹች ዴሚዳ ማላ ቢዲ ባስ ዲዛ ኡባ ባይዚዲ ሻሚዴስ።

ሞሌ ጊቲ ሌሚሶ

47 «ቃሴካ ሳሎ ካዎቴሊ አባ ጊደን ዩጌቲዲ ዴማ ዴማ ሞሌ ኦይኪዳ ሞሌ ጊቲ ሚሳቴስ።

48 ሞሌ ኦይኪዛይቲ ጊቲይ ኩሚን ጎቹዲ አባ ላንቁ ኬሲዳ። ሄን ኡቲዲ ሎኑ ሎኑ ሞሌ ቆሪዲ ኬሼን ጉጂዳ። ኢታ ሞሊታ ዎራ ዩጊዳ።

49-50 አላሜ ወርሴላን ሄሳሶ ሃናና። ኪታንቻቲ ዩዲ ናጋራንቻታ ጸሎታፔ ሻኪዲ ዩኪዛሶኔ አች ጋርጨዛሶ ጌዴ ቶኦንታ ታማን ዩጋና።

51 «ዩሱሲ ኢስታ ሃይሲ ወሪ ኢንቲስ ጌሊዳ?» ጊዴስ። ኢስቲካ «ኤ» ጊዳ።

52 ኢዚካ ዛሪዲ፥ «ሄሳ ገሻሰ ሳሎ ካዋቱላ ጸራይ ጌሊዳ ሙሴ ዋጋ ታማርሲዛዳይ ኮኒካ ኢዛሰ ሚንጂ ዋሊዳ አልኦ ሚሻፌ ኦራሊኔ ጋልኦ ሚሽ ኬሲዛዳ ሚሳቲሰ» ጌዴሰ።

ናቤይ ባ ዳሬን ቦንቹቴና

(ማር 6:1-6፤ ሉቃ 4:16-30)

53 ዬሱሲካ ሃይታ ለሚሶታ ዮቲ ወርሲዲ ሄፔ ሃራሶ ቢዴሰ።

54 ባ ዳሬ ቢዲ አይሁዳታ ዋሳ ኬላን ኣሳ ታማርሶ ኦይኪዴሰ። ኢስቲካ ማላሌቲዲ፥ «ሃይሲ አዳዚ ሃይሳ ኤራቴላኔ ሃይታ ማላታታ ኦላና ዋልቃ አዋፔ ዳሚዴ?»

55 ሃይሲ አናጼዛ ና ዴኔ? ኢዛ አይይ ሱንሊ ማራዋ ጌዴኔ? ኢዛ ኢሻቲ ያቆቤ፥ ዮሴፌ፥ ሲዋናኔ የሁዳ ጌዴቴኔ?

56 ሚቹቲ ኦናራ ዲዛይታ ጌዴቴኔ? ሂስቲን ሃይሲ አዳዚ ሃይሳ ኡባ አዋፔ ኤኪዴ?» ጌዴ።

57 ሄሳ ገሻሰ ኢስቲ ኢዚ ገዛይሳ ኤኪቤቴና።

ዬሱሲካ ኢስታሰ፥ «ናቤይ ባ ዳሬኒኔ ባ ኬላን ቦንቹቴና ኣቲን ሃራሶን ቦንቹቴሰ» ጌዴሰ።

58 ኢስቲ አማኖንታ ኣጊዳ ገሻሰ ዳሮ ማላታታ ሄን ኦሊቤና።

14

ጸማቂዛ ዮሃኒሳ ሃይቆ

(ማር 6:14-29፤ ሉቃ 9:7-9)

1 ሄ ዋዴ ጋሊላ ዳሬ ሃሪዛ ሄርዶሲ ኣሳይ ዬሱሳ ናሺዛይሳ ሲዩዴሰ።

2 ሄርዶሲ ባ አሽካራታሰ፥ «ሄሳ ጌዲኮ ጸማቂዛ ዮሃኒሲ ሃይቆፔ ዴንዲዲ ዩዴሰ ጉሳካ! ሃይሲ ወሪ ጌታ ማላታይ ኢዛ ኩሺን ኦሴቲዛይ ሄሳሳ» ጌዴሰ።

3 ሄርዶሲ ባ ኢሻ ፒሊጶሳ ማቾ ሄርዲያዲ ጋሶን ዮሃኒሳ ኦይሊዲ ቃሾ ኬላን ዩጌዴሰ።

4 ጋሶይካ ዮሃኒሲ ሄርዶሳ፥ «ኔ ኢዞ ኤካና ማላ ዋጋ ጌዴና ጌዳ ገሻሳ» ጌዴሰ።

5 ሄርዶሲካ ዮሃኒሳ ዋፋናሰ ኮዩሺን ኣሳይ ዮሃኒሳ ናቤ ማላ ጸሊዛ ገሻሰ ባቢዴሰ።

6-7 ሄርዶሲ ባ ዬሌታ ጋላሰ ሄርዲያዲ ናያ ዬላን ኢዛ ኡፋይሲዳ ገሻሰ ናያ ኢዛ ኦይቹዳዝ ኡባ ኢማናሰ ኢዚሰ ጫቂዴሰ።

8 ናያካ አዬይ ዘሬን፤ «ጸማቂዛ የሃኒሳ ሁኔ ኬሬን ዋላዳ ሃኢ ሃኒን ታሰ አማ» ጋዲሰ።

9 ሄ ዋዴ ካዋዚ ኢዛሰ ሚሼቲዴሰ። ጌዶ አቲን ጫቂዳ ገሻሲኔ ኢዛራ ዲዛ አማላታ ገሻሰ ጌዲ ናዬ ኦይሻይ ፖሌታና ማላ ኣዛዚዴሰ።

10 ከቲዲኔ የሃኒሳ ዋይኔ ኬላን ዲሸን ቆጼ ቃንጸሲዴሰ።

11 ቃንጸቲዳ ሁኔዛ ኬሬን ዋሊዲ ናይሰ አሚዳ። ናያካ ኤካዳ ባ አዬይሰ አማዲሰ።

12 የሃኒሳ ካሊዛይቲ ኢዛ ኣሃ ኤኪዲ ሞጊዲኔ ሃኒዳይሳ ኡባ ዬሱሳሰ የቲዳ።

ዬሱሲ ኢቻሹ ሺ ኣሳ ሚዚዴሰ

(ማር 6:30-44፤ ሉቃ 9:10-17፤ ዮሃ 6:1-14)

13 ሄሳ ሲዬዳ ማላ ዬሱሲ ካሴ ባ ዲዛሶ ኣጊዲኔ ዋጎሎን ጌሊዲ ባርካ ሃራ ኣሲ ባይንዳሶ ቢዴሰ። ዴሬይካ ሄሳ ሲዬዲ ካታማይ ዲዛሶፕ ቶሆራ ኢዛ ካሊዴሰ።

14 ዬሱሲካ ዋጎሎዛፕ ዋጲሹ ዳር ኣሳ ቤኢዲ ኣሳሰ ሚሼቲዴሰ። ሳኬቲዛይታካ ፓሊዴሰ።

15 ጋዴይ ቃሚ ቃሚ ቢዛይሳ ቤኢዲ ኢዛ ካሊዛይቲ ኢዛኮ ሸቂዳ፤ «ሃይሲ ኑ ዲዛሶይ ባዞ፤ ጋዴይካ ቃሚ ቃሚ ቢዛ ገሻሰ ጌዴ ጉታታን ጉታታን ቢዲ ባሰ ማናዝ ሻማና ማላ ኣሳ ዬዳ» ጌዳ።

16 ጌዶ አቲን ዬሱሲካ ኢሰታ፤ «ኢንቴ ኣሳሰ ማናዝ አሚቴ አቲን ኣሳይ ባናሰ ኮሼና» ጌዴሰ።

17 ኢሰቲካ ኢዛሰ ዛሪዲ፤ «ሃይሳን ኑሰ ኢቻሹ ኡኬላፌኔ ናምኡ ሞሊፔ አቲን ሃራይ ባ» ጌዳ።

18 ኢዚካ ኢሰታ፤ «ኣኔ ሄይታ ዲዛይታ ሃ ታሰ ኤኪ ዩቴ» ጌዴሰ።

19 ቃሴካ ኣሳይ ማታ ቦላ ኡታና ማላ ኣዛዚዴሰ። ኢቻሹ ኡኬሊኔ ናምኡ ሞሊታ ባ ኩሼን ኦይኪዲ ባ ኣይፌ ፑዴ ሳሎ ጶቁ ሂሰቲ ጋላቲዲ፤ ኡኬላ ሚንሊ ባና ካሊዛይታሰ አሚዴሰ። ኢሰቲካ ኣሳሰ አሚዳ።

20 ኣሳይ ዉሪካ ሚዲ ካሊዴሰ። ሄሳፌ ጉዬ ኢዛ ካሊዛይቲ ኣሳፔ ሚሺን ኣቲዳይሳ ታማኔ ናምኡ ለማቴ ኩሚላ ሺሺዳ።

21 ሚዳ ኣሳይ ማጫሳቲኔ ጉላ ናይቲ ጉጃቶንታ ኣቲማሳይ ጸላ ኢቻሹ ሺ ጌዳናዛ።

ዬሱሲ ኣባ ቦላ ሄሚቲዴሰ

(ማር 6:45-52፤ ዮሃ 6:15-21)

22 ሄራካ ኢዛ ካሊዛይቲ ዋጎሎን ጌሊዲ ጌዴ ፒንል ኢዛፔ ካሰቲዲ ፒናና ማላ አዛዚዲ አሳ ሞይዛናስ ባስ ጉዬ አቲዴስ።

23 ዴሬዛ ሞይዚዳፔ ጉዬ ዋሳ ዋሳናስ ባርካ ዙማ ቦላ ኬዚዴስ። ጋዴይ ቋሚንካ ሄን ዙማ ቦላ ባርካ ዴስ።

24 ሄ ዋዴ ዋጎሎያ አባ ካንላ ቢሺን ዳምባላይ ዴንዲዲ ዳሮ ሜቶላ ኦይኪዴስ።

25 ኦማርስ ኮይሮ ኩቶይ ባቂሺን ዬሱሲ አባ ቦላራ ሄሜቲዲ ኢዛ ካሊዛይቲ ዲዛስ ዪዴስ።

26 ዬሱሳ ካሊዛይቲካ ኢዚ አባ ቦላራ ሄሜቲ ዪሺን ቤኢዲ ባቢዳ ገሻስ ኢዛ ሞይቲሌ ገዲኔ ዋሲዳ።

27 ዬሱሲ ሄራካ፥ «አይኮይ ባ! ታናኮ፤ ባቦፍቲ!» ገዴስ።

28 ጴጽሮሲ፥ «ጎዶ! ኔና ገዲኮ ታ አባ ቦላራ ሄሜታዳ ኔኮ ባና ማላ ታና አዛዛ» ገዴስ።

29 ዬሱሲ ኢዛ፥ «ሃ ያ!» ገዴስ። ጴጽሮሲካ ዋጎሎዛፔ ዋቋዲ ሃላ ቦላራ ሄሜቲዲ ዬሱሳኮ ዪዴስ።

30 ገዶ አቲን ጫርኮዛ ዋልቃ ቢዪዲ ባቢዳ ገሻስ ሃላን ማቴቲል ኦይኪዲ፥ «ጎዶ! ታና አሻ!» ገ ዋሲዴስ።

31 ዬሱሲ ሄራካ ባ ኩሼ ዬዲ ኦይኪዲ፥ «ኔኖ፥ አማኖይ ፓጪዳይሶ! አዛስ ሲቆዲ?» ገዴስ።

32 ዬሱሲኔ ጴጽሮሲ ዋጎሎዛን ጌሊዳ ማላ ጫርኮይ ሲርጺ ገዴስ።

33 ሂሳፌ ጉዬ ዋጎሎን ዲዛይቲ፥ «ቱሙ ኔኔ ጸሳ ና!» ገዲ ኢዛስ ጎይኒዳ።

ዬሱሲ ጌንሴሬጶን ሃርጋንቻታ ፓሊዴስ

34 ዬሱሲኔ ኢዛ ካሊዛይቲ አባ ፒኒዲ ጌንሴሬጶ ጌቴቲዛሶ ጋኪዳ።

35 ሄን ዲዛይቲ ዬሱሳ ገዲዳይሳ ኤሪዲ፥ ሄ ሄራን ዩዩ አቆናስ ዲዛ አሳስ ኪታ ዬዲዳ። አሳይካ ሃርጋንቻታ ኡባ ዬሱሳኮ ኤሂዴስ።

36 ሃርጋንቻቲ ኢዛ አፋላ ጶራ ጸላ ቦቻና ማላ ዬሱሳ ዋሲዳ። ቦቺዳይቲ ዉሪካ ፓጺዳ።

15

1 ቃሴካ ዬሩሳላሜፔ ዪዳ ፋርሳዌቲኔ ሙሴ ዋጋ ታማርሲዛይቲ ዬሱሳኮ ሸቂዲ፥

2 «ኔና ካሊዛይቲ ካሴ ኑ አዋታ ዋጋ አዛስ ቆይሲዞ? ቁማ ማናስ ኩሼ ሜጨቴቲና» ገዲ።

³ ዩሱሲካ ኢስታስ፡ «ኢንቴ ኢንቴ ዋጋስ ጊዲ ጸሳ አዛዙ አይሰሻፊት?

⁴ ጸሲ፡ «ኔ አዮኔ ኔ አዋ ቦንቻ፤ ባ አዋ ቦላ ዋይኮ ባ አዩ ቦላ ኢታ ቃላ ሃሳይዳይ ሃይቆ!» ጊ አዛዚደሰ።

⁵ ኢንቴ ጊዲኮ አይ አሲካ ባ አዋ ዋይኮ ባ አዮ፡ «ታ ኢንቴስ ኦላናስ ቤሲዛዝ አይ ሚሺካ ጸሳስ ያርሾ ኦላ ሺሻዲስ» ጊኮ፡

⁶ «ሄ አዳዚ ባ አዋ ዋይኮ ባ አዮ ቦንቹዴስ» ጌታ፤ ሄሳ ጊሻስ ኢንቴ ዋጋ ጊሻስ ጸሳ ቃላ ሻፊታ።

⁷⁻⁹ ኢንቴኖ ቆጵፔ ቆሞን ሃኒዛይቶ! ኢሳያሲ ኢንቴ ጊሻስ ዮቲሼ፡

« ሃይሲ ዳሬይ ታና
ደናን ጸላ ቦንቹስ፤
ዋዚናይ ጊዲኮ ታፔ ሃኒዴስ፤
ሚላ ሃዳ ታና ጎይኔስ፤
ኢስታ ተሚርቴይካ
አሲ ዋሊዳ ዋጋ)
ጊዲዲ ሲንፋፌ ሃናናይሳ
ዮቲዳይሲ ቱማ» ጊዴስ።

¹⁰ ዩሱሲ አሳ ባኮ ጸይጊዲ፡ «ሲዬቴ ዋዚናን ዋሊቴ።

¹¹ አስ ቱኒሲዛይ ኢዛዴ ደናራ ሃ ኬዚዛይሳፌ አቲን ደናራ ዲጌ ጌሊዛይ ቱኒሴና» ጊዴስ።

¹² ቃሴ ኢዛ ካሊዛይቲ ኢዛኮ ሺቂዲ፡ «ፋርሳዌቲ ኔ ጊዳይሳ ሲዩዲ ሃንቄቲዳይሳ ኤራዲ?» ጊዴ።

¹³ ኢዚ ኢስታስ፡ «ታ አዋ ሳሎይሲ ቶኮንታ ሚሊ ወሪካ ቶቃሌታና።

¹⁴ ኢስታ አጋጊቴ፤ ኢስቲ ቆቄቲ ካሌሊዛ ቆቄታ ጊዲዳ ጊሻስ፡ ቆቄቲ ቆቄ ካሌሊኮ ናሞአይ ኢሶይ ኢሳራ ኦይኬቲዲ አፎን ወላና» ጊዴስ።

¹⁵ ጴጽሮሲ ዩሱሳ፡ «ኔ ዮቲዳ ለሚሶዛ ኑስ ቢርሻ» ጊዴስ።

¹⁶ ኢዚካ፡ «ኢንቴ ሃኢ ጋካናሰካ ኤሪቤኬታ ጉሴ?

¹⁷ ደናራ ጌሊዛይ ወሪ ዲጌ ቃንሐ ካንሊዲ ጌዴ ካሬ ኬዚዛይሳ ኤሬኬቲ?

¹⁸ ደናራ ኬዚዛይ ጊዲኮ ዋዚናፔ ፑልቴስ። አስ ቱኒሲዛይ ሄሳ።

19 ኢታ ቆፋይ፥ ሼምፖ ዋዶይ፥ ላይማይ፥ ላይማታናስ ቃቃቶይ፥ ካይሶይ፥ ዋርዶ ማርካቴሌኔ ኣሳ ሱንሕ ሞርይ ወሪ ዋዚናፔ ፑልቴስ።

20 ኣስ ቱኒሲዛይ ሃይታንታፌ ኣቲን ኩሼ ሜጩቶንታ ሙሲ ኣስ ቱኒሴና» ጊዴስ።

ካናኔ ዴሬ ማጫሳይ ኣማኖ

(ማር 7:24-30)

21 ዬሱሲ ሄፔ ኬዚዲ ጸርሴኔ ሲዶና ጌቴቲዛ ዴሬ ቢዴስ።

22 ኢሲ ካናኔ ማጫሳ ዲዛራ ሄ ሄራፔ ኬዛዳ ዬሱሳኮ ያዳ፥ «ጎዶ፥ ደዊቴ ናወ! ታስ ሚሼታ! ታ ናያ ቱና ኣያናይ ኣይኪን ኬሃ ዋያወስ» ጋዳ ዋሳዱስ።

23 ጊዶ ኣቲን ኢዚ ኢሲ ቃላካ ኢዚስ ዛሪቤና። ሂስቲን ሄ ዋዴ ኢዛ ካለዛይቲ ኢዛኮ ሸቂዲ፥ «ኑና ካላ ካላ ዋዴሲዛ ጊሻስ ኔ ኢዞ ሞይዛ» ጊዲ ኢዛ ኦይቺዲ።

24 ኢዚካ ኢስታስ፥ «ታኒ ኢስራኤሌ ኬፋፌ ዳይዳ ዶርሳታኮ ጸላ ኪቴታዲስ» ጊዴስ።

25 ማጫሳያካ ዬሱሳ ቶሆ ቦላ ኩንዳዳ፥ «ጎዶ! ታና ማዳርኪ!» ጋዱስ።

26 ኢዚካ ኢዚስ ዛሪዲ፥ «ናይታ ካል ኤኪዲ ካና ቡቱላታስ ዬጋናስ ቤሴና» ጊዴስ።

27 ኢዛካ፥ «ኤ ጎዶ፤ ቡቱላቲካ ባ ጎዳ ማዳፌ ጋዴን ዋዳዳ ካል ማጸ ወጌቲስ» ጋዱስ።

28 ዬሱሲካ ማጫሳዮ፥ «ሃኔ ማጫሳዬ፥ ኔ ኣማኖይ ጌታ! ኔ ኮዱዳ ማላ ኔስ ሃኖ» ጊዴስ። ማጫሳይ ናያ ሄራካ ፓጸዱስ።

29 ዬሱሲ ሄፔ ዴንዲዲ ጋለላ ኣባ ላንቄ ቢዲ ሄን ዲዛ ኢሲ ዙማ ቦላ ኬዚ ኡቲዴስ።

30 ቆዳን ዳሮ ዴሬይ ዋቤታ፥ ቆቄታ፥ ሲላታ፥ ሃሳዮንታ ዲዴታ ሃራታካ ዳሮ ሃርጋንቻታ ኤሂዲ ኢዛ ሲንፋን ዋሊዴስ፤ ኢዚካ ኢስታ ፓሊዴስ።

31 ዲዴይ ሃሳይሺን፥ ቶሆ ሲላይ ፓጸሺን፥ ዋቤይ ሲቲ ጊ ሄማቲሺን፥ ቆቄይ ጼሊሺን ቤኢዲ ኣሳይ ማላሌቲዴስ፤ ኢስራኤሌ ጎዳካ ጋላቲዴስ።

ዬሱሲ ኦይዲ ሺ ኣስ ሚዚዴስ

(ማር 8:1-10)

32 ዬሱሲ ባና ካለዛይታ ጴይጊዲ፥ «ኣሳይ ታናራ ሄቡ ጋላስ ጋምኢዳ ጊሻሲኔ ማና ካሊ ባይንዳ ጊሻስ ኣሳይ ታና ሚቺስ።

ኦጌ ቦላን ጋፋን ዳቡርዲ ኩንዶንታ ማላ ሜላ ኡሎራ ዩዳና ኮይኬ» ጌደስ።

³³ ኢዛ ካሊዛይቲ፡ «ሃይሳን ኣይኮይካ ባይንዳ ባዞ ቢታን ሃይሳ ከና ዴሬ ሚዛናስ ጌዲዛ ቁማ ኑ ኣዋፔ ዳማኔ?» ጌዳ።

³⁴ ዩሱሲ ኢስታ፡ «ኢንቴስ ኣፑን ኡኬሊ ዲዜ?» ጌ ኦይቺን ኢስቲካ፡ «ላፑን ኡኬሊኔ ቂ ጉላ ሞሌቲ ዴቴስ» ጌዳ።

³⁵ ኢዚካ ዴሬዚ ጋዴን ኡታና ማላ ኣዛዚደስ።

³⁶ ላፑን ኡኬላኔ ሞሌዛ ባ ኩሼን ኦይኪዲ ጋላቲዳፔ ጉዬ ሜንሊዲ ባና ካሊዛይታስ ኢሚደስ፤ ኢስቲካ ዴራስ ጌሺዳ።

³⁷ ኣሳይ ወሪካ ሚዲ ካሊደስ፤ ዩሱሳ ካሊዛይቲ ኣሳፔ ኣቲዳይሳ ላፑን ለማፔ ኩሚል ሺሺዳ።

³⁸ ሚዳይቲካ ናይቲኔ ማጫሳይ ባይንዳ ኣዴቲ ጸላ ኦይዱ ሺ ጌዲዳ።

³⁹ ዩሱሲ ዴሬዛ ሞይዚዳፔ ጉዬ ዋጎሎን ጌሊዲ ሜጊዶኔ ጌቴቲዛሶ ቢደስ።

16

¹ ፋርሳዌቲኔ ሳዱቃዊ ጌቴቲዛይቲ ዩሱሳኮ ሸቂዲ ኢዛ ፓጫናስ «ሳሎፔ ኑና ማላታ ቤሳ» ጌዲ ኦይቺዳ።

² ኢዚካ ኢስታስ፡ «ኦማርሳ ዎዴ ሳሎይ ዞኢኮ፡ ርጋይይ ኣዋታና» ጌታ።

³ ዎንታ ቦላ፡ ሳሎይ ዴጺኮ ሃች ኢራይ ቡካና» ጌታ፤ ሳሎ ሜቆ ጸሊዲ ሻኪ ኤሬታ ሺን ታ ያና ዎዴ ማላታ ሻኪ ኤራናስ ዳንዳዩኬታ። *

⁴ ሃይሲ ኢታኔ ላይማ ዩሌታይ ማላታ ኮዩስ፤ ጌዳ ኣቲን ዮናሳ ማላታፔ ኣቲን ሃራ ማላታይ ኢዛስ ኢሜቴና» ጌደስ። ዩሱሲ ኢስታ ሄን ኣጊዲ ሃራሶ ቢደስ።

⁵ ኣባ ፒኒዳ ማላ ዩሱሳ ካሊዛይቲ ቁማ ኤኪ ባናይሳ ባሌቲዳ።

⁶ ዩሱሲካ፡ «ቆፒቴ፤ ፋርሳዌታ ኢርሾሬኔ ሳዱቃዊታ ኢርሾሬ ናጌቲቴ» ጌደስ።

⁷ ኢስቲ ቃሴ ባ ጌደን፡ «ኦኒ ካል ኦይኮንታ ጌሻስ ሄሳ ጌደስ» ጌዲ ኢሶይ ኢሳራ ሃሳዬቲዳ።

16:1 ሉቃ 11:38 * **16:3** ኢሲ ኢሲ ጌሻ ማጸፋታን ታይቦ ናምኣኔ ሄሻ ቦላ ዩሱሲ ሃሳይዳ ለሚሶዛ ጎኤቴቲና። **16:4** ማቶ 12:39፤ ሉቃ 11:29 **16:6** ሉቃ 12:1

8 ዩሱሲካ ኢስታ ቆፋ ኤሪዲ፡ «ኢንቴኖ አማኖይ ፓጪዲይቶ! ካል ኦይኮንታ ገሻስ አዛስ ኢሶይ ኢሳራ ሃሳዬቴት?

9 ኢቻሹ ኡኬሊ ኢቻሹ ሺ አሳስ ገዲዲ አፑን ለማቴይ ቲርፒን ኢንቴ ዴንሊዳኮ ዩሺ ቆፔኬት?

10 ሃሳሶካ ላፑን ኡኬሊ ኦይዲ ሺ አሳስ ገዲዲ አፑን ለማቴይ ቲርፒን ኢንቴ ዴንሊዳኮ ዋዚናን ዋሊቤኬታ ጉሴ?

11 ሂስቲን ታ ኢንቴስ ዮቲዳይ ካሳ ገሻስ ገደንታይሳ አይስ ዩሺ ቆፔኬት? ሃኢካ ፋርሳዌታ ኢርሾፌኔ ሳዱቃዌታ ኢርሾፌ ናጌቲቴ» ገዴስ።

12 ሃኢ ኢዚ ኢስታ ቆፍሲዛይ ቡኬሶ ዴንላናስ ጉጂዛ ኢርሾ ገሻስ ገደንታ ፋርሳዌታኔ ሳዱቃዌታ ቲሚርቴፌ ናጌታና ማላ ገዲዳይሲ ኢስታስ ጌሊዴስ።

ጴጽሮሲ ዩሱሲ ጸሳ ና ገደይሳ ዮቲዴስ

13 ዩሱሲ ቁሳሪያ ፒሊጲሲዮሴ ጌቲቲዛ ቢታ ጋኪዳ ዋዴ ባና ካሊዛይታ፡ «አሳይ ታና አሳ ና ኦና ገዜ?» ገዲ ኦይቺዴስ።

14 ኢስቲካ፡ «ኢሲ ኢሲ አሳይ፡ «ጸማቂዛ ዮሃኒሳ» ጌስ፤ ባጋ አሳይ፡ «ኤላሳ» ጌስ፤ ባጋይ፡ «ኤርማሳ ዋይኮ ናቤታፔ ኢሳ ገደንታ አጌና» ጌስ» ገዲ።

15 ኢዚካ ኢስታ፡ «ኢንቴ ታና ኦና ጌቲ?» ገዴስ።

16 ሲሞና ጌቲቲዛ ጴጽሮሲ፡ «ኔኒ ኪርስቶሳ ዴኦ ጸሳ ና ገዲኪ?» ገዲ ዛሪዴስ።

17 ዩሱሲ፡ «ዮና ና ሲሞና! ኔኒ አንጃቲዳዴ! ኔስ ሃይሳ ቆንጪሲዳይ ሳሎን ዲዛ ታ አዋፔ አቲን አሾኔ ሱላ ገዴና።

18 ኔኒ ዛላ፤ ሃይሳ ዛላ ቦላ ታኒ ታ ዋሳ ኬሌ ኬጻና፤ ጋናሜ ፔንጌቲካ ኢዞ ጸኔቴና።

19 ሳሎ ካዋቴሳ ቁልፔታ ታ ኔስ ኢማና፤ ኔኒ ቢታ ቦላ ሃኖ ገዛይ ዉሪ ሳሎንካ ሃናና። ቢታ ቦላ ኔ ሃኖ ገዳይሲ ዉሪካ ሳሎንካ ሃኔና» ገዴስ።

20 ቃሴካ ኢዚ ኪርስቶሳ ገዲዳይሳ ኢስቲ ኦናስካ ዮቶንታ ማላ ባና ካሊዛይታስ ሎኤሊ ዮቲዴስ። †

ዩሱሲ ባ ቦላ ጋካና ሜቶ ገሻስ ናምኢንሶካ ዮቲዴስ

21 ሄሳፌ ሃ ሲሚን ዩሱሲ ዩሩሳላሜ ባናይሳ፡ ሄን ዴሬ ጨማታን፡ ቂሴታ ሃላቃታኒኔ ሙሴ ዋጋ ታማርሲዛይታ ኩሼን

16:9 ማቶ 14:17-21 16:10 ማቶ 15:34-38 16:14 ማር 6:14-15፤ ሉቃ 9:7-8 16:16 ዮሃ 6:68-69 16:19 ማቶ 18:18፤ ዮሃ 20:23 † 16:20 ኪርስቶሳ ጉሲ ጸሳፌ ቲዬቲዳዴ ጉሳ።

ዋዬ ኤካናይሳ፥ ሃይቃናይሳኔ ሄሻንሉ ጋላስ ሃይቆፔ ዴንዳናይሳ
ባና ካሊዛይታስ ቆንጪሲ ዮተዴስ።

22 ጴጽሮሲ ዬሱሳ ጌዴ ኢሲ ባጋ ዛሪዲ፥ «ጎዶ! ሃይሲ ኔ
ቦላ ጋኮፎ!» ጌዲ ሃንቂዴስ።

23 ዬሱሲ ጴጽሮሳኮ ሸቂዲ፥ «ሃይሶ ጸላኤ! ሃይሳፌ ኪቻ!
ኔኒ አሳዛፔ አቲን ጸሳ ዮኦይ ኔ ዋዚና ጌዶን ባይንዳ ጊሻስ ኔ
ታስ ቆጴ ጊዳዳሳ» ጌዴስ።

24 ቃሴካ ዬሱሲ ባና ካሊዛይታስ፥ «ታና ካላናስ ዶሲዛ አሲ
ባና ካዶ፤ ባ ማስቃሌ ቶኪዲ ታና ካሎ። †

25 ባ ሸምፖ አሻና ኮይዛ አሲ ዉሪ ቆይሳና፤ ጌዶ አቲን ባ
ሸምፖ ታ ጊሻስ ቆይሲዛይይ አሻና።

26 አሲ አላሜን ዲዛዝ ኩሜል ሃሪዲ ባ ሸምፖ ቆይሲኮ ኢዛ
አይ ማዳኔ? ዋይኮ አሲ ባ ሸምፖ ጊሻስ ቃንጸና ዳንዳይዛዚ
አዜ?

27 አሳ ናይ ባ አዋ ቦንቾራኔ ሳሎ ኪታንቻታራ ያና፤ ኢሳስ
ኢሳስ ኢዛ ኦሶ ማላ ኢዛይ ዋጋ አማና።

28 ታ ኢንቴስ ቱሙ ጋይስ፤ ሃይሳን ኤቂዳ አሳታ ጌዶፌ አሳ
ናይ ባ ካዋቴላራ ዩሺን ቤያና ጋካናስ ሃይቆይ ኢስታ ቦቾንታ
አሳቲ ዴቴስ» ጌዴስ።

17

ዬሱሳ ሜዳ ላሜቴል (ሉቃ 9:28-36)

1 ኡሱፑን ጋላሳፌ ጉዬ ዬሱሲ ጴጽሮሳኔ ያቆቤ ቃሴካ ያቆቤ
ኢሻ ዮሃንሳ ባናራ ኤኪዲ ኢስታራ ጸላ ቆቃ ዙማ ቦላ ኬዚዴስ።

2 ኢስቲ ሄን ዲሺን ዬሱሳ ሜዳ ላሜቴዴስ፤ ኢዛ አይፌሶይ
አዋ አርሼ ማላ ፖኢዴስ፤ ኢዛ ማይኦይካ ፖኦ ማላ ጸልቂዴስ።

3 ሄራካ ሙሴይኔ ኤላሲ ዬሱሳራ ሃሳይሼ ኢስታስ ቤቴዴስ።

4 ጴጽሮሲ ዬሱሳ፥ «ጎዶ! ኦ ሃኒን ዲዛኮ ኦስ ሎኦኮ! ኔ ሼኔ
ጊዲኮ ኢሲ ዳሴ ኔስ፥ ኢሲ ዳሴ ሙሴስ፥ ኢሲ ዳሴ ኤላሳስ
ሄሹ ዳሴ ኦሶኒ?» ጌዴስ።

† 16:24 ማስቃሌ ጉሲ ሜቶ ጉሳ። 16:25 ማቶ 10:39፤ ሉቃ 17:33፤ ዮሃ
12:25 16:27 ማቶ 25:31፤ ማዛ 62:12፤ ኦሮ 2:6 17:1 2ጴጽ 1:17-18

5 ኢዚ ቡሮ ሃሳያን ዲሺን ፖኢዛ ሻራይ ኢስታ ካሚዴስ፤ ሻራ ጋላራ፡ «ታኒ ኢዛን ኡፋዬቲዛ ታ ዶሲዛ ታ ናይ ሃይሳ፤ ኢዚ ጊዛይሳ ሲዪቲ» ጊዛ ቃላ ጊሪስ ሲዪቲ።

6 ኢዛ ካሊዛይቲካ ሄሳ ሲዪዳ ማላ ዳጋሚዲ ቢታ ቦላ ጉፋኒዳ።

7 ዬሱሲ ኢስታኮ ሸቂዲ ኢስታ ባ ኩሼን ቦቺዲ፡ «ዴንዲቲ፤ ባቦፍቲ!» ጊዴስ።

8 ኢስቲ ቶቁ ጊ ጸሊሺን ዬሱሳፕ ኣቲን ኢዛራ ሃራ ኣስ ኦናካ ቤኢቤቲና።

9 ኢስቲ ዙማዛ ቦላፌ ዎጂሺን ዬሱሲ፡ «ኣሳ ናይ ሃይቆፔ ዴንዳና ጋካናስ ኢንቲ ቤዮይሳ ኦናስካ ዮቶንታ ማላ» ጊ ኣዛዚዴስ።

10 ዬሱሳ ካሊዛይቲ፡ «ሂስቲን ሙሴ ዎጋ ታማርሲዛይቲ፡ ኤላሲ ካሴቲዲ ያና ቤሴስ ኣዛስ ጊዛ?» ጊ ኦይቺዳ።

11 ኢዚካ ኢስታስ፡ «ቱማኮ፤ ኤላሲ ዪዲ ዉርሲካ ጊጊሳና።

12 ታ ኢንቲስ ጊዛይ ኤላሲ ዪዴስ፤ ጊዶ ኣቲን ኣሳይ ባ ኮዪዳ ማላ ኢዛ ቦላ ኦሊዴስ ኣቲን ኢዛ ኤሪቤና፤ ሄሳሶካ ኣሳ ናይ ኢስታ ኩሼን ዋዬ ቤያና» ጊዴስ።

13 ሄ ዎዴ ዬሱሳ ካሊዛይቲ ዬሱሲ ኢስታስ ዮቲዛይሲ ጸማቂዛ ዮሃኒሳ ጊሻስ ጊዲዳይሳ ኤሪዳ።

ዳይዳንሐ ኦይኪዳ ኢሲ ና ዬሱሲ ፓሊዴስ

(ማር 9:14-29፤ ሉቃ 9:37-43)

14-15 ዬሱሲኔ ኢዛ ካሊዛይቲ ኣሳኮ ሲሚዳ ማላ ኢሲ ኣሲ ዬሱሳኮ ሸቂዲ ኢዛ ሲንፋን ጉልባቲዲ፡ «ጎዶ! ታ ና ዳይሳ ቦላፌ ዬጊዛ ሃርጌይ ዳሮ ዋዪሲዛ ጊሻስ ታስ ማራርኪ! ዳሮ ዎዴ ታማን ኩንዴስ፤ ሃፋንካ ጌሌስ።

16 ታኒ ናዛ ኔና ካሊዛይታኮ ኤሃዲስ ሺን ኢስቲ ኢዛ ፓፋና ዳንዳይቤቲና» ጊዴስ።

17 ዬሱሲ፡ «ኢንቲኖ ኣማኖንታ ጌላ ዬሌታቶ! ኣይዴ ጋካናስ ታ ኢንቲናራ ዳኔ? ቃሴ ኣይዴ ጋካናስ ታ ኢንቲና ዳንዳያኔ? ኣኔ ናዛ ሃ ታኮ ኤሂቲ» ጊዴስ።

18 ሄሳፌ ጉዬ ዬሱሲ ዳይዳንፋዛ ሴሪዲ ናዛፔ ኬሲዴስ፤ ናዚካ ሄ ሳቲፔ ሲሚዲ ፓጺዴስ።

19 ዬሱሳ ካሊዛይቲ ጸላላ ኢዛኮ ሸቂዲ፡ «ኦኒ ዳይዳንሐ ኬሳናስ ኣዛስ ዳንዳይቤኒ?» ጊዲ ኦይቺዳ።

20 ኢዚካ ኢስታስ፥ «ኢንቴስ አማኖይ ፓጩ ጊዲዳ ጊሻስ ዳንዳይቤኬታ፤ ታ ኢንቴስ ቱሙ ጋይስ፤ ቁሪ ጋሼ አይፌ ማላ አማኖይ ኢንቴ ቦላ ዲዛኮ ሃይሳ ዙማ፥ ሃይሳፌ ዳንዳዳ ጌዴ ባ!» ኢንቴ ጊዳኮ ኢዚ ኢንቴስ ባና። ኢንቴና ጸናናይ ዴና።

21 ሃይሳ ማላይ ጊዲኮ ጸማኒኔ ዋሳን አቲን ሃራን ኬዜና» ጊዴስ። *

22 ኢስቲ ጋሊላን ኢሲፌ ዲሺን ዩሱሲ ኢስታስ፥ «ታና አሳ ና አሳስ አሊ አማና።

23 ኢስቲካ ኢዛ ዋዳና፤ ኢዚካ ሄሻንሶ ጋላስ ዳንዳና» ጊን ኢዛ ካሊዛይቲ ኬሄ ሚሼቲዳ።

ጸሳ ኬላ ጊራ ቃንጸ

24 ዩሱሲኔ ኢዛ ካሊዛይቲ ቂፊርናሆሜ ጌቲቲዛሶ ጋኪዳ፤ ጉዬ ጸሳ ኬላ ጊራ ኤኪዛይቲ ጴጽሮሳኮ ሸቂዲ፥ «ኢንቴ ኣስታማሬይ ጸሳ ኬላ ጊራ ናሞኤ ዲናሬዛ † አይስ ቃንጴኔ?» ጊዳ።

25 ኢዚካ ኢስታስ፥ «ቃንጴስ» ጊዴስ። ጴጽሮሲ ሶ ጌሊዳ ማላ ዩሱሲ ካሴቲዲ፥ «ሲሞና ዴሬ ካዋቲ ጊራ ጊዲን ዋይኮ ቃራጸ ጊዲን ባ ናይታፔ ኤኪዛዬ? ሃራታፔ ኤኪዛ ሚሳቲዜ?» ጊዴስ።

26 ጴጽሮሲካ፥ «ሃራታፔ ኤኬቴስ» ጊዴስ። ዩሱሲ፥ «ሂስቲኮ ናይታ ቦላ አጮይ ባ ጉሳካ!

27 ሂስቲኮካ ኢስታ ኑ ጴጴሶንታ ማላ ኔ ሞሌ ኦይኪዛ ጊቲ ኤካ ባዳ አባን ዩጋ፤ ኮይሮ ኦይኪዳ ሞሌዛ ዶና ፖቃዳ ኔ ዴሚዳ ሚሻ ኤካዳ ታ ሱንሳራ ኔ ሱንሳራ ጊራ ቃንጸ» ጊዴስ።

18

ሳሎ ካዋቲላን ኡባፌ አዳናይ ኦኔ?

(ማር 9:33-37፤ ሉቃ 9:46-48)

1 ሄ ዋዴ ዩሱሳ ካሊዛይቲ ኢዛኮ ሸቂዲ፥ «ሳሎ ካዋቲላን ኑ ጋርሳን ኡባፌ አዳናዴይ ኦኔ?» ጊ ኦይቺዳ።

17:20 ማቶ 21:21፤ ማር 11:23፤ 1ቆሮ 13:2 * 17:21 ኢሲ ኢሲ ጊሻ ማጸፋታን ታይቦ ናሞኤ ታማኔ ኢሳ ቦላ ዲዛ ቆፋይ ጉጃቲቤና፤ ቃላይካ ማር 9:29 ዲዛይሳ ማላ። † 17:24 ኢሲ ዲናሬይ ሄ ዋዴ ኢሲ አሳስ ናሞኤ ጋላሳ ዳሞዛ ላኔ። 17:24 ኬላ 30:13-15፤ 38:26 18:1 ሉቃ 22:24

2-3 ዩሱሲ ኢሲ ና ዳይጊ ኤሄዲ ኢስታ ጊደን ኤሲዲ፥ «ታ ኢንቴስ ቱሙ ጋይስ፤ ኢንቴ ሲሞንታ ኢጲኮኔ ጉላ ናይታ ማላ ሃኖንታ ኢጲኮ ሙሌካ ሳሎ ካዎቴሰ ጌሌኬታ።

4 ሄሳ ጊሻስ ሃ ናዛ ማላ ባና ዚቂሲዛዳይ ሳሎ ካዎቴላን ኡባፌ አቆና።

5 ሃይሳ ማላ ጉላ ና ታ ሱንላን ኤኪዛዳይ ታና ኤኬስ።

6 «ጊዶ አቲን ታና አማኒዛ ጉላታፔ ኢሳዳ ቆጶሊዛይ ዳጾ ዋጸ ሹቺ ኢዛ ቆጶን ቃሼቲን አባ ጨማን ዩጌቲዲ ሚቴቲኮ ኢዛስ ሎኦ ጊዳና።

7 ሃና አላሚያ አስ ቆጶና ጋሶ ጊዲዳ ጊሻስ ኢዚስ አዬ አና! ቆጶይ ዩስ አጌና ሺን ቆጶዛስ ጋሶ ጊዲዛዳስ አዬ አና!

8 ኔ ኩሼይ ዋይኮ ኔ ቶሆይ ኔና ቆጶናስ ጋሶ ጊዲኮ ኔፔ ቃንጾ ዲጋ! ኔኒ ናሞኡ ኩሼራ ዋይኮ ናሞኡ ቶሆራ ጌዴ ሚርና ታማን ዩጌታናፔ ዋቤ ዋይኮ ቶሆ ሲላ ጊዳዳ ሄ ጌዴ ዴክይ ዲዛሶ ጌሎይ ኔስ ሎኦና።

9 ሄሳሶካ ኔ አይፌይ ኔስ ቆጶ ጊዲኮ ኔፔ ኬሳ ዩጋ! ናሞኡ አይፌራ ጌዴ ጋናሚ ታማን ኔ ዩጌታናፔ ኢሲ አይፌራ ዴክይ ዲዛሶ ኔ ጌሊዛይሲ ኔስ ሎኦ።

10 «ሃይታ ጉላታ ጊዶፌ ኢሲኔዮካ ኢንቴ ካቶንታ ማላ ናጌቲቲ! ታ ኢንቴስ ቱሙ ጋይስ፤ ሳሎን ዲዛ ኢስታ ኪታንቻቲ ሳሎን ታ አዋ አይፌሶ ኡባ ጋላስ ዴሌቴስ።

11 አሳ ናይ ቆይዳይታ አሻናስ ዩዴስ። *

ቆይዳ ደርሳ ለሚሶ
(ሉቃ 15:3-7)

12 «አኔ ታስ ዮቲቲ፥ ኢሳዳስ ዴቲ ደርሲ ዲኮ ቃሴ ኢስታፌ ኢሲና ቆይኮ፥ ሃንኮ ኡዱፋን ታማኔ ኡዱፋናታ ዙማ ቦላ ዩጊዲ ቆይዳሮ ኮያና ቢ ኤሬኔ?

13 ታ ኢንቴስ ቱሙ ጋይስ፤ ሃንኮ ቆዮንታ አቲዳ ኡዱፋን ታማኔ ኡዱፋን ደርሳታፔ አሊዲ ቤቲዳ ደርሳይን ኡፋዬቴስ።

14 ሄሳሶካ ሃ ጉላታ ጊዶፌ ኢሶይ ቆያና ማላ ሳሎን ዲዛ ኢንቴ አዋ ሺኔ ጊዳና።

ቆሂዳዴስ አይ ኦላና ቤሲዛኮ

18:2-3 ማር 10:15፤ ሉቃ 18:17 18:5 ማር 9:42-48፤ ሉቃ 17:1-2 18:9

ማቶ 5:29 18:11 ሉቃ 19:10 * 18:11 ኢሲ ኢሲ ጌሻ ማጸፋቲ ታይሶ ታማኔ ኢሳ ቦላ ዲዛ ቆፋ ጉጃቴስ፤ ኢዚካ ሉቃሳ ሺሞፖ 10 ቦላ ዲዛይሳ ማላ።

15 «ኔ አሻይ ኔና ቆሂኮ ኢዛኮ ባዳ ኢዛ ጸላላ ኔናራ ኤካዳ ኢዛ ሞሮ ኢዛሰ ዮታ፤ ኢዚ ኔ ጊዛ ሲጹኮ ኔ አሻ ኔ ኣሰ ሂሰታሳ።

16 ኢዚ ኔ ጊዛይሳ ሲዮንታ ኢጲኮ ዮኦይ ወሪ ናሞኡ ማርካን ወይኮ ሄዡ ማርካን ላጲዛ ጊሻሰ ኢሳዴ ወይኮ ናሞኡ ኣሰ ኔናራ ኤካ ባዳ ኢዛ ሃሳይሳ።

17 ኢዚ ኢሰታካ ሲዮንታ ኢጲኮ ዋሳ ኬላሰ ዮታ፤ ዋሳ ኬላዮካ ሲዮንታ ኢጲኮ ኢዛዴ ኔ ኣማኖንታዴ ማላኔ ዮቲን ሲሞንታ ኢታ ኣሳ ማላ ቆዳ።

18 «ታ ኢንቴሰ ቱሙ ጋይሰ፤ ቢታ ቦላ ኢንቴ ቃቺዳይ ወሪ ሳሎንካ ቃሼቲዳ ጊዳና፤ ቢታ ቦላ ኢንቴ ቢርሺዳዚ ሳሎንካ ቢርሺቲዳይሳ ጊዳና።

19 ቃሴካ ታ ኢንቴሰ ቱሙ ጋይሰ፤ ቢታ ቦላ ኢንቴ ናሞኡ ጊዲዲ ኣይ ሚሺካ ኢሲፌ ዶሳን ኢንቴ ኦይቺኮ ሳሎን ዲዛ ታ ኣዋይ ኢንቴሰ ኢማና።

20 ናሞኡ ወይኮ ሄዡ ጊዲዲ ታ ሱንላን ኢንቴ ሺቂዛሶን ሄን ኢንቴ ጊዶን ታ ዳና» ጊዴሰ።

ማር ጊሻሰ

21 ሄ ወዴ ጴጽሮሲ ዬሱሳኮ ሺቂዲ፥ «ጎዶ! ታ አሻይ ታና ቆሂኮ ታ ኢዛሰ ኣፑንቶ ኣቶ ጎ? ላፑንቶ ኣቶ ጎ?» ጊዴሰ።

22 ዬሱሲካ ኢዛሰ ዛሪዲ፥ «ላፑን ታሙቶ ላፑን ኣቲን ላፑንቶ ጸላ ጋ ጊኬ፤

23 «ሄሳ ጊሻሰ ሳሎ ካዎቴሊ ባ ኣሽካራታ ቦላ ዲዛ ሚሼ ሺሻና ኮጹዳ ካዎ ሚሳታወሰ።

24 ሚሻ ቆዳ ኦይኪዳ ማላ ኢዛ ኣሽካራታፔ ዳሮ ሚሎኔ ቢራ ተ ኣጮይ ኢዛ ቦላ ዲዛዴ ኤኪ ዬዳ።

25 ኣሽካራዚካ ባ ቦላ ዲዛ ኣጮዛ ቃንጾይ ጸኒዳ ጊሻሰ ኢዚካ ኢዛ ማቺያካ ኢዛ ናይቲኔ ኢዛሰ ዲዛዚ ወሪ ባይዘቲዲ ሚሻይ ቃንጾታና ማላ ኢዛ ጎዳይ ኢዛ ኣዛዚዴሰ።

26 ሄ ወዴ ኣሽካራዚ ጎዳዛ ቶሆ ቦላ ኩንዲዲ፥ «ታኒ ታ ቦላ ዲዛ ኣጮዛ ወርሳ ኔሰ ቃንጻና ጋካናሰ ታሰ ጉላ ወዴ ኢማርኪ!» ጊዲ ዋሲዴሰ።

18:15 ሉቃ 17:3

18:16 ዛሬ 19:15

18:18 ማቶ 16:19፤ ዮሃ 20:23

18:21 ሉቃ 17:3-4

18:22 ሜጴ 4:24

† 18:24 ዳሮ ሚሎኔ ቢራ፡ ዳሮ

ሚሎኔ ቢራ ጌቲቲዛይሲ ኣማራላ ማጸፋን፥ «ሜክሊቲ» ጌሰ፤ ኢሲ ሜክሊቲይ ሄ ወዴ ኢሲ ኣሳሰ ታማኔ ኢቻሹ ላይላ ዳሞዛፔ ቦላ ጊዲዳይሳ ቤሴሰ።

27 ኢዛ ጎዳይካ ኢዛሰ ሚሹቲዲ ኢዛ አጮዛ ኡባ ማሪዲ ዬዲዴሰ።

28 «ሄ አሽካራዚካ ባ ጎዳ አቻፌ ኬዚዳ ማላ ጉላ አጮይ ቶ ኢዛ ቦላ ዲዛ ባ ላጌ ዳሚዲኔ፥ ሓ ቦላ ዲዛ ታ ሚሻዮ ሃኢ ሃኒን ቃንጸ፥ ጊዲ ጩሊ ኦይኪዴሰ።

29 ሄ ኢዛ ላጌ አሽካራይ፥ ታሰ ጉላ ዋዴ ኢማርኪ! ታ ኔሰ ቃንጸና፥ ጊዲ ኢዛ ቶሆ ቦላ ኩንዲዲ ዋሲዴሰ።

30 «ጊዴ አቲን ኢዛሰ ጉላ ዋዴ ኢማናሰ ኮዮንታ ኢጲዲ ኢዛ ላጌዚ ባ ቦላ ዲዛ አጮዛ ቃንጸና ጋካናሰ ቃሾ ኬላን ዩጊዴሰ።

31 ኢዚ ሄሳ ኦላሺን ቤኢዳ አሳይኔ ሃንኮ ኢዛ ላጌ አሽካራቲ ዳሮ ሚሹቲዲ። ቢዲካ ሃኒዳይሳ ኡባ ባ ጎዳሰ ዮቲዳ።

32-33 «ሄ ዋዴ ጎዳዚ ሄ አሽካራ ጴይጊሲ ኤሂዲ፥ ሃይሶ ኔኖ! ኢታዞ፥ ኔ ታና ዋሲን ኔ ቦላ ዲዛ አጮዛ ታ ኔሰ አጋዲሲ ሺን ታ ኔና ማሪዳ ማላ ኔኒካ ኔ ላጌዛ ማራናሰ ቤሴኔ?

34 ጊዲ ኢዛ ቦላ ዲዛ አጮዛ ኢዚ ኡባ ቃንጸና ጋካናሰ ቃቻና ማላ ቃቸዛይታሰ አላ ኢሚዴሰ።

35 ሄሳ ጊሻሰ ኢንቲ ኢሶይ ኢሳ ዋዚናፔ ማሮንታ አጊኮ ሳሎን ዲዛ ታ አዋይካ ኢንቲና ማሪና» ጊዴሰ።

19

ዬሱሲ ኤኮ ጊሻሲኔ ጌሎ ጊሻሰ ታማርሲዴሰ
(ማር 10:1-12)

1 ዬሱሲ ዮቲ ዉርሲዳፔ ጉዬ ጋለላ አጊዲ ዮርዳኖሴ ፒንላን ዲዛ ዩሁዳ አዉራጃ ቢዴሰ።

2 ዳሮ ዳሬይ ኢዛ ሄን ካሊን ኢዚካ ሃርጋንቻታ ፓሊዴሰ።

3 ፋርሳዌቲ ኢዛ ፓጫናሰ ኢዛኮ ሸቂዲ አይ ጋሶንካ፥ «አሲ ባ ማቾ አንጂ ዬዳና ቤሲዜ?» ጊ ኦይቺዳ።

4 ኢዚካ ኢሰታሰ፥ «ጸሲ ኮይሮፔ ማጫኔ አዴ ሜጲዳይሳ ናባቢቤኬቲ? ጊዴሰ።

5 ቃሰካ፥ ሓሲ ባ አዋኔ ባ አዮ አጊዲ ባ ማቺራ ኢሲፌ ጊዴሰ። ናዎአይካ ኢሲ አሾ ጊዴቲሰ፥ ጌቲቲዳይሲ ሃይሳ ጋሶን ጊዴኔ? ጊዴሰ።

† 18:28 ጉላ አጮይ፥ ጉላ አጮይ ጊዛይሳ አማራሶ ማጻፋን፥ «ጴቲ ዲናሬ» ጌሰ፤ ሄ ዋዴ ኢሲ አሳሰ ኢሲ ጋላሳ ኦሶ ዳዎዛ ቤሴሰ። 19:4 ሜዴ 1:27፤ 5:2

19:5 ሜዴ 2:24

6 ናሞኣይ ኢሲ ኣሾ ኣቲን ሲንፋፌ ናሞኡ ጊዴቴና። ሄሳ ጊሻሰ ጸሲ ጋሊ ዋጺዳይሳ ኣሲ ሻኮፎ» ጊዴሰ።

7 ኢስቲካ ኢዛሰ፡ «ሂስቲን ሙሴይ፡ ሓሲ ባ ማቸ ኣንጂ ዬዲዳ ኣንጂ ዋራቃታ ኢዚሰ ኢሚ ዬዶ» ጊዲ ኣዛሰ ኣዛዚዴ?» ጊዴ።

8 ዬሱሲካ ኢስታሰ፡ «ሙሴይ ኢንቴ ዋዚና ሙሜቴል ቤኢዲ ማቸታ ኢንቴ ኣንጃና ማላ ፒቃዴ ኢንቴሰ ኢሚዴሰ ኣቲን ኮይሮፔ ሄሳ ማላ ጊዴና።

9 «ታ ኢንቴሰ ቱሙ ጋይሰ፤ ባ ኣዚናፔ ሃራራ ላይማቶንታ ዲሺን ባ ማቸ ኣንጂ ዬዲዳ ሃራ ማቸ ኤኪዛዴይ ዉሪ ላይማቴሰ። ኣንጃቲዳሮካ ኤኪዛዴይ ኢዚራ ላይማቴሰ» ጊዴሰ።

10 ዬሱሳ ካሊዛይቲ ኢዛሰ፡ «ማቸ ዋጋይኔ ኣዚና ዋጋይ ሃይሳ ማላ ጊዲኮ ማቸ ኤኮንታ ኣጎይ ሎኦ» ጊዴ።

11 ጊዶ ኣቲን ዬሱሲ ኢስታሰ፡ «ኢሲ ኢሲ ዲማ ኢሞታይ ዲዛ ኣሳታፔ ኣቲን ሃይሳ ቲሚርቴዛ ኦኒካ ኤካናሰ ዳንዳዬና።

12 ጋሶይካ ኢሲ ኢሲ ኣጎይ ባ ኣዬ ኡሎፔ ዬሌቲሼ ሹፋ ጊዲ ዬሌቴሰ፤ ኢሲ ኢሲ ኣጎይ ኣጎ ኩሼን ቃራቴቲዲ ጉንዱሌሰ፤ ኢሲ ኢሲ ኣጎይ ሳሎ ካዋቴሳሰ ጊዲ ባና ባርካ ጉንዱላ ኦሊዛ ኣሲካ ዴሰ። ሃይሳ ኤካናሰ ዳንዳይዛዴይ ኤኮ» ጊዴሰ።

ዬሱሲ ጉላ ናይታ ኣንጂዴሰ

(ማር 10:13-16፤ ሉቃ 18:15-17)

13 ሄ ዋዴ ዬሱሲ ኢስታ ቦላ ባ ኩሼ ዋሊዲ ዋሳና ማላ ጉላ ናይታ ኢዛኮ ኤኪ ኤሂዳ፤ ጊዶ ኣቲን ኢዛ ካሊዛይቲ ናይታ ኤሂዳ ኣሳታ ቦላ ሃንቄቲዳ።

14 ዬሱሲ፡ «ናይቲ ሃ ታኮ ዬቶ፤ ዲጎፍቴ፤ ሳሎ ካዋቴሊ ሃይታንታ ማላሳ!» ጊዴሰ።

15 ባ ኩሼ ናይታ ቦላ ዋሊዲ ኣንጂዳፔ ጉዬ ሄፔ ዴንዲ ቢዴሰ።

ዲሬ ጊዲዳ ናቴላ ኣዴዛ ኦይሻ

(ማር 10:17-31፤ ሉቃ 18:18-30)

16 ሄሳፌ ጉዬ ኢሳዴይ ዬሱሳኮ ሺቂዲ፡ «ኣስታማሬ! ሜርና ዴኦ ዴማናሰ ታኒ ሎኦ ኦሶ ኣይ ኦሶ?» ጊ ኦይቺዴሰ።

17 ዩሱሲካ፡ «ታና አዛሰ ሎኦ ገሻሰ ኦይቻይ? ሎኦይ ኢሲ ጸሳ ጸላ፤ ዴኦይ ዲዛሶ ኔ ጌላና ኮይኮ አዛዘታ ናጋ» ጌዴሰ።

18-19 አዴዚ፡ «አዛዘቲ አዋይቲ?» ጌዲ ኦይቹዴሰ። ዩሱሲካ ዛሪዲ፡ «አሰ ዎጵፓ፤ ላይማቶፓ፤ ካይሶቶፓ፤ ዎርዶ ማርካቶፋ፤ ኔ አዋኔ ኔ አዮ ቦንቻ፤ ኔ ሾር ኔ ማላ ሲቃ» ጌዴሰ።

20 ናቴላዚ ዛሪዲ፡ «ሃይሳ ወርሳ ታ ናጋዲሰ፤ ሃራይ አዚ ታሰ ፓጪዴ?» ጌዴሰ።

21 ዩሱሲካ ዛሪዲ፡ «ኔ ሙሌ ጸላና ኮይኮ ባዳ ኔ ሃሪዳዝ ኡባ ባይዛዳ ሚሻ ወርሳ ማንቆታሰ ኢማ፤ ኔኒ ሳሎን ሚሽ ዴማንዳሳ፤ ሄሳፌ ጉዬ ሲማ ያዳ ታና ካላ» ጌዴሰ።

22 አዴዚ ሄሳ ሲዬዲ ኢዛሰ ዳር ሚሺ ዲዛ ገሻሰ ኬሂፔ ሚሼቲሼ ቢዴሰ።

23 ዩሱሲ ባና ካሊዛይታ፡ «ታ ኢንቴሰ ቱሙ ጋይሰ፤ ዱሬቲ ሳሎ ካዎቴል ጌላናይሲ ዳር ሜቶ።

24 ቃሴካ ታኒ ኢንቴሰ ገዛይ ዱሬይ ሳሎ ካዎቴል ጌላናይሳፌ ጋሜላይ * ናርፔ ሉኮራ አጼል ካወያና» ጌዴሰ።

25 ሄሳ ሲዬዲ ኢዛ ካሊዛይቲ ዳር ቆፒዲ፡ «ሂሰቲን ኦኒ አታናሰ ዳንዳይዜ?» ጌዲ ዩሱሳ ኦይቹዴ።

26 ዩሱሲካ ኢሰታ ጸሊዲ፡ «ሃይሲ አሳ አቻን ዳንዳይቴና፤ ጸሳ አቻን ጌዲኮ ወሪካ ዳንዳይቴሰ» ጌዴሰ።

27 ጴጽሮሲ ኢዛሰ ዛሪዲ፡ «ኑ ኡባካ አጌዲ ኔና ካሊዶሰ፤ ሂሰቲን ሃኢ ኑ አይ ዴማኔ?» ጌዴሰ።

28 ዩሱሲካ ኢሰታሰ፡ «ታ ኢንቴሰ ቱሙ ጋይሰ፤ አሳ ናይ ቡር ያና ኦራላ አላሜን ባ ቦንቻ አራታ ቦላ ኡቲዛ ዎዴ ኢንቴ ታና ካሊዳይቲ ታማኔ ናምኡ አራታታ ቦላ ኡቲዲ ታማኔ ናምኡ ኢሰራኤል ናይታ ቦላ ፒርዳና።

29 ታ ሱንሳ ገሻሰ ጌዲ ባ ኬፌ፡ ባ ኢሻታ፡ ባ ሚቹታ፡ ባ አዋ፡ ባ አዮኔ ባ ናይታ፡ ዎይኮ ባ ቢታ አጌዛ አሲ ወሪ ጴቱ ኩሼ ዳኮ ኤካና፤ ሜርና ዴኦካ ሳታና።

30 ጌዶ አቲን ዳር ሲንፌ ጌዲዳ አሳቲ ጉዬ ጌዳና፤ ዳር ጉዬን ዲዛ አሳቲ ሲንሳታና።

19:18-19 ኬሳ 20:13-16፤ ዛሬ 5:17-20፤ ለዌ 19:18 * 19:24 ጋሜላይ፡ ጋሜላይ ገዛይሳ ኢሲ ኢሲ ባጋ ጋዋሉ ቃላን ጋሌ ጌቱሰ። 19:28 ማቶ 25:31፤ ሉቃ 22:30 19:30 ማቶ 20:16፤ ሉቃ 13:30

20

ዎይኔ አታኪልቴ አሳንቻታ ሌሚሶ

¹ «ሳሎ ካዎቴሊ ባ ዎይኔ አታኪልቴ ጊደን አሊዛ አሳንቻታ ቃጸራናሰ ማላዶራ ኬዚዳ ኢሲ አታኪልቴይ ዲዛ ጋዳዴ ሚሳታዉሰ።

² ኢሲ ጋላሳ ዳሞዛ ጊዲዛዝ ሃሳዬቲዲ ገጊዳፔ ጉዬ አሳንቻታ ዎይኔ አታኪልቴ ኦሶ ኦይሊዴሰ።

³ «ማላዶ ሄቹ ሳቴን ኬዚዲ ኦሶይ ባይንዳ ሜላ ጊያይ ኤቁዛሶን ኤቁዳ ሃራ አሳታ ዴሚዴሰ።

⁴ «ኢንቴ ቢዲ ታ ዎይኔ ጊደን አሊቴ፤ ታ ኢንቴሰ ቤሲዛ ሚሼ ኢማና» ጊዴሰ።

⁵ ኢሰቲካ ቢዴ። ቃሴካ ጋላሳፌ ኡሱፑን ሳቴኒኔ ኡዴፉን ሳቴ ቦላ ኬዚዲ ሃራ አሳንቻታ ኦሶን ጌልሊዴሰ።

⁶ አማርሳ ዎዴ ታማኔ ኢሲ ሳቴ ጊዲሺን ኬዚዲ ጮ ኤቁዳይታ ሃራታ ዴሚዲ፤ «ኢንቴ ኩሜላ ጋላሰ ኦሶይ ባይንዳ አዛሰ ሃይሳን ኤቁዴቲ?» ጊ ኦይቺዴሰ።

⁷ «ኢሰቲካ፤ ሱና ኦሲሲዛ አሲ ጳይዳ ገሻሰ ኤቁዶሰ» ጊዴ። ኢዚካ ኢሰታ፤ «ኢንቴካ ቢዲ ታ ዎይኔ አታኪልቴ ጊደን አሊቴ» ጊዴሰ።

⁸ «ጋዴይ ቃሚሺን ዎይኔ አታኪልቴዛ ጎዳይ አሳንቻታ አላፌዛሰ፤ ሱዬፔ ዪዳይታፔ ዶማዳ ኮይሮ ዪዳይታ ጋካናሰ ዲዛ አሳንቻታ ኡባ ዴይጋዳ ኢሰታ ኦሶ ጋቴ ቃንጸ» ጊዴሰ።

⁹ ታማኔ ኢሲንሳ ሳቴ ቦላ ኦሶን ጌሊዳይቲ ዪዲ ኢሶይ ኢሶይ ኩሜላ ጋላሳ ጋቴ ኤኪዳ።

¹⁰ «ኮይሮ ኦሶን ጌሊዳይቲ ዪሼ ባ ዎዚናራ ሂንኮይታፔ ቦላራ ዳሮ ዴማና ጊ ቆፒሺን ኢሰታሰካ ሂንኮይታራ ገና ኢሚዴሰ።

¹¹⁻¹² ሚሻ ኤኪሼ ቃንጸዛዴ ቦላ፤ «ሃይቲ ዉርሴላን ኦሶን ጌሊዲ ኢሲ ሳቴ ጸላ አሊዳይቲ ኩሜላ ጋላሰ ኦሶን ዳቡርዲኔ አዋን ጽጌቲዲ ፔኢዳ ኮሲኔ ኢሰታሰ ዋሰታ ኢሲ ገና ቃንጸይ?» ጊዴ።

¹³⁻¹⁴ «ኢዚካ ኢሰታፌ ኢሳዴሰ፤ «ታ ጃላዞ! ኔና ቆሃቤኬ፤ ኢሲ ጋላሳሰ ጊዲዛ ዳሞዛን ኦላናሰ ታናራ ጊጋቤኪ? ሃኢ ሄይ ኔ ገሻ ኤካዳ ባ፤ ኔሰ ኢሚዳይሳ ማላ ዉርሴላን ዪዳይሳሰካ ታ ኢማና ኮያይሰ።

15 ሂስቲን ታ ሚሻን ታ ዶሲዳዝ ኦፋናስ ዳንዳይኪና? ዋይኮ ታ ኪያ ጊዲዳይሲ ኔና ቃናቲሲዜ?»

16 «ጉዬን ዲዛይቲ ሲንፊ፥ ሲንፊን ዲዛይቲ ጉዬ ኦቆና» ጊዴስ።

ዩሱሲ ባ ሃይቆ ጊሻስ ሄሻንሶ ዮቲዴስ

(ማር 10:32-34፤ ሉቃ 18:31-34)

17 ዩሱሲ ዩሩሳላሜ ቢሼ ባና ካሊዛ ታማኔ ናሞኦታ ዲማ ሻኪ ኤኪዲ፥

18 «ሂያ ኮኒ ዩሩሳላሜ ባና ጎሰ፤ አሳ ናይ ቁሴታ ሃላቃሲኔ ሙሴ ዋጋ ታማርሲዛይታስ ኦቂ ኢማታና፤ ኢስቲካ ኢዚ ሃይቃና ማላ ኢዛ ቦላ ፒርዳና።

19 ኢዛ ቦላ ቂቂ ካኦናሲኔ ጋራፋና ማላ፥ ዋቆና ማላካ ዴሬታስ ኣሉ ኢማና፤ ሄሻንሶ ጋላስ ኢዚካ ሃይቆፔ ዴንዳና» ጊዴስ።

ዛብዶሳ ናይታ ኣዬይ ኦይሻ

(ማር 10:35-45)

20 ሄሳፌካ ዛብዶሳ ናይታ ኣያ ባ ናይታራ ዩሱሳኮ ሺቃዳ ኢዛ ሲንሳን ጉልባታዳ ዩሱሲ ኢዚስ ኢሲ ሚሽ ኦፋና ማላ ዋሳዱስ።

21 ኢዚካ ኢዘ፥ «ኣይ ኮያይ?» ጊዴስ፤ ኢዛካ፥ «ሃይቲ ታ ና ናሞኦቲ ኔ ካዋቴላን ኢሶይ ኔ ኡሻቻራ፥ ኢሶይ ኔ ሃዲርሳራ ኡታና ማላ ኦፋርኪ!» ጋዴስ።

22 ዩሱሲካ ዛሪዲ፥ «ኢንቴ ዋሲዛዝ ኤሬኬታ፤ ታኒ ኡዪዛ ጹኣ ኢንቴ ኡያና ዳንዳያኔ?» ጊዴስ። ኢስቲካ፥ «ኤ ዳንዳዮስ» ጊዴስ።

23 ኢዚካ፥ «ታ ጹኣፔ ቱሙ ኢንቴ ኡያናሺን ታ ኡሻቻኒኔ ታ ሃዲርሳን ኡቴሉ ታ ኣዋይ ገግሲዳዴንታስ ኣቲን ታኒ ኢሚዛዝ ጊዴና» ጊዴስ።

24 ታማቲ ሄሳ ሲዩዲ ናሞኡ ኢሻታ ቦላ ሃንቄቲዳ።

25 ዩሱሲ ኢስታ ኢሲ ቦላ ጾይጊዲ፥ «ኣይዛቤ ሃላቃቲ ባ ሃሪዛ ዴሬ ቦላ ጎዳቲዛይሳ ማላ ጎዳቴሉ ዲዛይቲ ዋልቃራ ሃሪዛይሳ ኢንቴ ኤሬታ።

26 ኢንቴ ጊዶን ሄሳ ማላ ሃናናስ ቤሴና፤ ኢንቴፌ ጊታ ጊዳና ኮይዛዴይ ኢንቴስ ኦሊዛዴ ጊዶ።

27 ኢንቴፌ ቦላ ጊዳናስ ኮይዛዴይ ኢንቴፌ ጋርስ ጊዶ።

28 አሳ ናይ ኣሳይ ኢዛስ ኦፋና ማላ ጊዶንታ ኢዚ ኣሳስ ኦፋናሲኔ ባ ሼምፖ ዳርታ ጊሻስ ኣሉ ኢማናናስ ዩዴስ» ጊዴስ።

ዩሱሲ አይፌ ቆቄ አስ ናምኣታ ፓሊዳስ

(ማር 10:46-52፤ ሉቃ 18:35-43)

29 ዩሱሲ ባና ካሊዛይታራ ኢያርኮፌ ኬዚ ቢሺን ዳሮ ዳሬይ ኢዛ ካሊዳስ።

30 ሄን አይፌይ ቆቄዳ ናምኡ አሳቲ ኦጌ ዶናን ኡቲ ዳቴስ። ዩሱሲ አፂ ቢዛይሳ ሲዪዲ፥ «ጎዶ! ዳዊቲ ናዉ፥ ኑና ማራ!» ጌዲ ዋሲዳ።

31 ዳሬዚ፥ «ሃይዚቲ!» ጌዲ ሃንቂዳስ፤ ጌዶ አቲን ኢስቲ ዳርሲ ዋሲሺ፥ «ጎዶ! ዳዊቲ ናዉ፥ ኑና ማራ!» ጌዳ።

32 ዩሱሲካ ኤቂ ኢስታ ዳይጌዲ፥ «ታ ኢንቴስ አይ ኦፋና ማላ ኮዬቲ?» ጌዳስ።

33 ኢስቲካ፥ «ኑ አይፌይ ዳላና ማላ ኮዮስ» ጌዳ።

34 ዩሱሲ ኢስታስ ሚሺቲዲ ኢስታ አይፌታካ ባ ኩሺራ ቦሽቺን ሄራካ ዳሊዲ ኢዛ ካሊዳ።

21

ዩሱሲ ጌታ ቦንቾን ዩሩሳላሜ ጌሊዳስ

(ማር 11:1-11፤ ሉቃ 19:28-38፤ ዮሃ 12:12-19)

1 ኢስቲ ዩሩሳላሜ ማታን ዳብራዛይቲ ዙማ ቦላ ዲዛ ቤቴፋጌ ጌቲቲዛሶ ጋኪዳ ማላ ዩሱሲ ባና ካሊዛይታፔ ናምኣታ ከቲዳስ።

2 «ሃኖ ኢንቴ ማታን ዲዛ ጉታዮ ቢዲ ኢንቴ ሄ ጋኪዳ ማላ ኢሲ ሃሬ ዲዛራ ባ ጉቴይራ ቃሺታ ዲሺን ኢንቴ ዳማና። ቢርሺዲ ሃ ታኮ ኤኪ ዪቴ።

3 ኦኒካ ኢንቴና፥ «አይስ ሃይሳላ ኦፊቲ?» ጌኮ፥ «ጎዳይ ኢስታ ኮዬስ» ጌቲ፤ ኢንቴና ኦይቺዛዳይ ሄራካ ዩዳና።

4-5 «ሃይሲካ ሃኒዛይ ካሴ ናቤን

ጸዮኒስ ሂዝጌቲ፥

«ሄኮ! ኔ ካዎይ አሽኬ ጌዲዲ

ሃሬዮኔ ሃሬይ ጉቴዮ ቶጌዲ

ኔኮ ያና

ጌቲቲዳይሲ ፖሌታናሳ» ጌዳስ።

6 ኢዛ ካሊዛይቲ ዩሱሲ ኢስታስ ዮቲዳ ማላ ኦሊዳ።

7 ሃሬዮ ኢዚ ጉቴይራ ኤሂዲ ባ ማይኦ ኢስታ ቦላ ዋሊን ኢዚካ ሃሬታ ቶጌዳስ። *

21:4-5 ዛካ 9:9 * 21:7 ሃሬታ ቶጌዳስ፡ ሃሬታ ቶጌዳስ ገዛይሲ ንኢሸ ጋርሳን ዳስ፤ ሃራይ ቃሴ ቲንቢቴይ ፖሌታና ማላ ሃሬ ጉቴ ቦላ ኡቲዳስ ጌስ ባጋ ጌሻ ማጸፋይ።

8 ዳራፔ ዳሪዛ ባጋይ ባ ማይኦ ኦጌ ቦላ ሚጨዳስ፤ ባጋ ኣሳይ ሚላ ቦንጮ ዱሊ ዱሊ ኦጌ ቦላ ኣሊ ኣሊ ዩጌዴስ።

9 ኢዛፔ ሲንሓራ ቢዛ ዳሬይኔ ጉዬራ ካሊዛ ዳሬይካ ባ ቃላ ቶቁ ሂስቲዲ።

«ሆሳኢና! ዳዊቱ ናይ ጋላቲቶ!

ጎዳ ሱንሓን

ዩዳይ ኣንጃቲዳዳ!

ጸሲ ጋላቲቶ!» ጌዳ። †

10 ኢዚ ዩራሳላሚ ጌሊዳ ማላ ካታማ ኣሳይ ዉሪ፥ «ሃይሲ ኦኔ?» ጌዱ ያርክ ያርኪዴስ።

11 ኢዛ ካሊዱ ዩዳ ዳሬዚካ፥ «ሃይሲ ጋሊላ ጌዶን ዲዛ ናዚሬቴፔ ዩዳ ናቤ ዩሱሳ ጌዴኔ?» ጌዴስ።

ዩሱሲ ጸሳ ኬላን ዛልኤ ዛልኢዛ ኣሳ ጎዲዴስ

(ማር 11:15-19፤ ሉቃ 19:45-48፤ ዮሃ 2:13-22)

12-13 ሄሳፌ ጉዬ ዩሱሲ ጸሳ ኬላ ጌሊዱ ጸሳ ኬላ ካሬ ጌዶን ጋላን ባይዚዛይታኔ ሻሚዛይታ ጎዲዴስ። ሚሽ ላሚዛይታ ጸራጸዛታኔ ሃራጸ ባይዚዛይታ ኦይዴ ሺሪ ሺሪ ዩጌዲ፥ « ነታ ኬላይ ዋሳ ኬሌ ጌቲቲስ) ጌቲቲዲ ጸፊቲዴስ፤ ኢንቲ ቃሴ ቦንቁዛይታ ጎንጎሎ ሂስቲዴታ» ጌዴስ።

14 ኣይፌ ቆቂታኔ ቶሆይ ሲሊዳ ኣሳታ ዩሱሳኮ ጸሳ ኬሌ ኤሂዳ። ኢዚካ ኢስታ ፓሊዴስ።

15 ጌዶ ኣቲን ቄሴታ ሃላቃቲኔ ሙሴ ዋጋ ታማርሲዛይቲ ኢዚ ኦሊዳ ማላታታ ቤኢዳይሳኒኔ ጉላ ናይቲ፥ «ዋዜ ካዎ፥ ጋላታይ ዳዊቲ ናስ ጌዶ!» ጌዱ ዋሲዛይሳ ሲዩዳ ጌሻስ ዳር ሃንቄቲዳ።

16 ኢስቲካ ዩሱሳ፥ «ሃይቲ ናይቲ ጌዛይሳ ሲያይ?» ጌዳ፤ ዩሱሲካ ኢስታስ፥ «ኤ ሲያዲስ፤ ናይታ ዶናኒኔ ቆሚዛ ቄሪ ናይታ ዶናን ታኒ ጋላታ ጌጌሳዲስ ጌዛሶ ሙሌራካ ናባቢ ኤሬኬቲ?» ጌዴስ።

17 ኢስታ ዩጌ ኣጌዱ ሄ ካታማፔ ኬዚዱ ቢታኒያ ጌቲቲዛሶ ቢዱ ሄን ኣቂዴስ።

ኣይፌይ ባይንዳ ባላሴ ሚሊዮ

(ማር 11:12-14፥20-24)

18 ዩሱሲ ዋንቴላ ጋላስ ማላዶ ጉዬ ካታማ ሲሚሺን ኢዛ ጋፊሲዴስ።

† 21:9 ሆሳኢና ኢብራዊታ ቃላራ ሆሳኢና ጉሲ፥ «ኣቶቱላ» «ኦና ኣሻርኪ!» ጉሳ።

21:12-13 ኢሳ 56:7፤ ኤር 7:11

19 እጌ ማታን ኢሲ ባላሴ ጌቴቲዛ ሚሐ በኢዲ ጌዳ ኢዚኮ ሸቂሽን ሃይሐ ጸላላፔ ኣቲን ኣይፌይ ባይንዳይሳ በኢዲ፡ «ሂያፔ ጉዬ ኔ ቦላ ኣይፌይ ዶፖ!» ጊን ባላሴ ሚሓያ ሄራካ ሚላዲሰ።

20 ዬሱሳ ካሊዛይቲ ሄሳ በኢዲኔ ማላሌቲዲ፡ «ሃና ባላሴያ ዋናዳ ሄራካ ሚላዲ?» ጊዳ።

21 ዬሱሲካ ኢሰታ፡ «ታ ኢንቴሰ ቱሙ ጋይሰ፤ ኢንቴሰ ኣማኖይ ዲኮኔ ኢንቴ ሲቶንታ ኣጊኮ ባላሴ ሚሓይ ቦላ ሃኒዳይሳ ማላ ጸላላ ጊዶንታ ሃይሳ ዙማ፡ ሃይሳፌ ቶቃሌታዳ ዱጌ ኣባን ጌላ ኢንቴ ጊዳኮካ ኢዚ ጌላና» ጊዳሰ።

22 ኢንቴሰ ኣማኖይ ዲኮ ኢንቴ ዋሳን ኦይቺዳ ሚሽ ኡባካ ኤካና።

ዬሱሳ ጎዳቴላ ጊሻሰ ሸቂዳ ኦይሻ

(ማር 11:27-33፤ ሉቃ 20:1-8)

23 ዬሱሲ ጸሳ ኬሌ ጌሊዲ ታማርሲሽን ቄሴታ ሃላቃቲኔ ዳሬ ጨማቲ ኢዛኮ ሸቂዲ፡ «ሃይሳ ዉርሳ ኦና ሼኔን ኦላይ? ሃይሳ ኦላናሰ ሼኔ ኔሰ ኦኒ ኢሚዳ?» ጊዲ ኢዛ ኦይቺዳ።

24 ዬሱሲካ ኢሰታሰ ዛሪዲ፡ «ታኒካ ኢንቴና ኢሲ ሚሽ ኦይቻይሰ፤ ኢንቴ ታሰ ዛሪኮ ታኒካ ሃይታ ኦና ሼኔን ኦሊዛኮ ኢንቴሰ ዮታና።

25 ዮሃኒሳ ጸንቃታይ ኣዋፔ ዪዳ? ሳሎፔ ዪዳዬ? ኣሳፔ?» ጊዳሰ። ኢሰቲካ፡ «ኦ፡ ሳሎፔ ዪዳሰ» ጊኮ፡ ሃሰቲን ኣዛሰ ኣማኒበኬቲ?» ጋና ጊዲ ባ ጊዶን ኢሶይ ኢሶይ ኢሳራ ዞሬቲዳ።

26 ቃሴ ኦ፡ ሳሳፔ» ጊኮ፡ ኣሳይ ዉሪካ ዮሃኒሳ ናቤ ጊዲ ኣማኒዛ ጊሻሰ ኦ ባቦሰ» ጊዳ።

27 ሄሳ ጊሻሰ ዬሱሳሰ፡ «ኦ ኤርኮ» ጊዲ ዛሪዳ። ኢዚካ ኢሰታሰ፡ «ሃይታ ታ ኦና ሼኔን ኦሊዛኮ ታኒካ ኢንቴሰ ዮቲኬ» ጊዳሰ።

ናምኡ ናይታ ለሚሶ

28 ዬሱሲ ኢሰታ፡ «ኢንቴሰ ኣይ ሚሳቲዜ? ናምኡ ኣቱማ ናይ ዲዛ ኢሳዳይ ዳሰ፤ ኢዚካ ኮይሮ ናዛኮ ቢዲ፡ ሓ ናዛ! ሃቕ ጌዳ ዋይኔ ሚሓሶ ባዳ ኦላ» ጊዳሰ።

29 ናዚ ቃሴ፡ «ቢኬ!» ጊዲኔ ጉዬፔ ሙዙቲዲ ቢዳሰ።

30 «ናምኣንሶ ናዛካ ካሴይሳሶካ፡ «ባ!» ጊን ናዚ፡ «ኤር!» ጊዲ ቦንታ ኣጋጊዳሰ።

31 ሃይታ ናምኣታፔ ኣዋ ሼኔ ፖሊዳይ ኣዋይሴ?» ጊዲ ኦይቺዳሰ። ኢሰቲካ፡ «ኮይሮ ናዛ!» ጊዳ። ዬሱሲካ ኢሰታሰ፡

«ታ ኢንቴስ ቱሙ፡ ጋይስ፤ ቃራጸ ቃንጸሲዛይቲኔ ላይማቲዛይቲ ሳሎ ካዋቴል ኢንቴፌ ሲንፋን ጌላና።

32 «ጸማቂዛ የሃኒሲ ኢንቴና ጸሎቴላ ኦጌ ቤሳናስ ኢንቴኮ ዪዴስ ሺን ኢንቴ ኢዚ ገዛይሳ ኣማኒቤኬታ፤ ጊዶ ኣቲን ቃራጸ ቃንጸሲዛይቲኔ ላይማቲዛይቲ ጊዲኮ ኣማኒዳ፤ ኢዚ ሃኒዳይሳ ኢንቴ ቤዪ ሲሚዲካ ማሮቴላን ጌሊዲ ኣማኒቤኬታ» ጊዴስ።

ዎይኔ ሚላ ጊዶን ኦሊዛ ጎሻንቻ ሌሚሶ

(ማር 12:1-12፤ ሉቃ 20:9-19)

33 «ሃራ ሌሚሶካ ሲዪቴ፤ ዎይኔ ሚሊ ቶኪዛሶሆይ ዲዛዴይ ሄ ዎይኔዛስ ቢርዳ ዩሺ ኣሊዲ ዎይኔዛ ኣይፌ ጉሞኣናስ ኦላ ቦኪዴስ። ዎይኔዛ ናጋናስ ሚላ ቦላ ሻኮ ተ ገግሲዴስ። ሄሳፌ ጉዬ ጋዴዛ ዎይኔ ሚላራ ጎዪዛይታስ ኪራ ኢሚዲ ሃራ ዴሬ ቢዴስ።

34 ቦኔይ ጋኪሺን ዎይኔ ሚላዛ ኣይፌ ኤካናስ ባ ኣሽካራታ ጋዴዛ ጎዪዛይታኮ ዩዲዴስ።

35 ጋዴዛ ጎዪዛይቲ ኣሽካራታ ኦይኪዲ ኢሳ ዎዲዳ፤ ኢሳ ቃሴ ሹቻን ጫዲዳ።

36 ጋዲ ጎዳይ ካሴይታፔ ኣዲዛ ሃራ ኣሽካራታ ዩዲዴስ። ጎዪዛይቲ ሃኢካ ካሴይታ ቦላ ኦሊዳይሳ ማላካ ኢስታ ቦላካ ፖሊዳ።

37 ዉርሴላን ኦኔ ኤሪዛይ፥ «ኢስቲ ኢዛ ቦንቻናኮ» ጊዲ ባ ና ኣሊ ዩዲዴስ።

38 ጊዶ ኣቲን ጋዲ ጎዪዛይቲ ናዛ ቤኢዳ ማላ፥ «ሃይሲ ኢዛ ላታናይሳኮ! ኣኔ ሃ ዪቴ፤ ኢዛ ዎዲዲ ጋዲ ላቶስ» ጊዳ።

39 ናዛ ኦይኪዲ ዎይኔይ ቶኬቲዳሶዛፔ ካሬ ኬሲዲ ዎዲዳ።

40 «ኤር! ዎይኔዛ ጎዳይ ዪዛ ዎዴ ሄ ጋዲ ጎዪዛ ኣሳታ ዎስታና ኢንቴስ ሚሳቲዜ?» ጊዴስ።

41 ኢስቲካ፥ «ሄይታ ኢታታ ዳር ዋዪሲ ዎዲዲ ዎይኔይ ቶኬቲዛ ጋዲፔ ቤሲዛ ዎይኔ ኣይፌ ዎዴራ ኢዛስ ኢሚዛ ሃራ ጎሻንቻታስ ጋዲ ኪራሳና» ጊ ኢዛስ ዛሪዳ።

42 ዩሱሲካ ኢስታስ፥ «ጌሻ ማጸፋን፥

ገሞቤ ኬጸዛይቲ ኢታ ጊዲ

ዎራ ዩጊዳ ሹቻይ

ኬላስ ጉላ ቦላ

ዎዲዛ ሹቻ ጊዲዴስ፤

ጸሲ ሃይሳ ኦሊዴስ፤

ኢዛ ኦሶይካ
ኑ ኣይፌሰ ማላሊሲዛዝ
ጌቴቲ ጸፊቲዳይሳ
ናባቢቤኬቲ?

⁴³ «ሄሳ ጊሻሰ ታ ኢንቴሰ ጸሳ ካዎቴሉ ኢንቴፌ ኤኬታዳ ኣይፌ ኣይፊዛ ዴፊታሰ ኢሚታና።

⁴⁴ ሃይሳ ሹቻ ቦላ ኩንዲዛይ ሜቃና፤ ሹቻይ ኢዛ ቦላ ዋዲዛይካ ሊቃና» ጌዴሰ። §

⁴⁵ ቄሱታ ሃላቃቲኔ ፋርሳዌቲ ኢዛ ለሚሶይ ኢሰታ ጊሻሰ ጌዲዳይሳ ኤሪዳ።

⁴⁶ ጌዶ ኣቲን ኢሰቲ ኢዛ ኦይኪ ቃቾንታ ማላ ኣሳይ ዬሱሳ ናቤ ማላ ጸሊዛ ጊሻሰ ባቢዳ።

22

ሳርጌስ ጸይጌቲዳ ኣሳታ ለሚሶ
(ሉቃ 14:15-24)

¹ ቃሴካ ዬሱሲ ሃራ ለሚሶ፤

² «ሳሎ ካዎቴሉ ባ ናሰ ሳርጌ ገግሲዳ ኢሲ ካዎ ሚሳታዉሰ።

³ ካዎይካ ዲጊሳሰ ዮቲዳይታ ጸይጋናሰ ባ ኣሽካራታ ዬዲዴሰ፤ ጸይጌቲዳይቲካ፤ ሱ ቦኮ» ጌዳ።

⁴ «ቃሴካ ሃራ ኣሽካራታ፤ ሳሴ ኢሰታሰ ዮቲዳይታ ሄኮ ታ ሳንጋ ቦራታኔ ዋዲዳ ሚሄታ ሹካዳ ዲጊሳ ገጊሳዲሰ፤ ዉሪካ ጊጌቲዳ ጊሻሰ ሳርጌሶ ሃ ዪቴ!» ጌዲ ዮቲቴ።

⁵ ጸይጌቲዳይቲ ጌዲኮ ኢዛ ጸይሳ ዉዳን ዬጎንታ ኣጊዲ ኢሶይ ባ ጎሻሶሆ፤ ኢሶይ ባ ዛልኤሶ ቢዴሰ።

⁶ ሃንኮ ኣቲዳይታ ኣሽካራቲ ኦይኪዲ ዳር ዋዪሲዲ ዋዲዳ።

⁷ «ካዎይካ ሃንቄቲዲ ዋታዳራታ ዬዲዲ ኣሽካራዛ ዋዲዳይታ ዳይሲዴሰ፤ ኢሰታ ካታማ ጸጊዴሰ።

⁸ ባ ኣሽካራታካ፤ ሳርጌዛ ዲጊሳይ ገጊዴሰ፤ ጌዶ ኣቲን ሳርጌዛሶ ጸይጌቲዳይቲ ሳርጌስ ቤሲዛይታ ጌዲቤቴና።

⁹ ጌዴ ኦጌ ቦላ ኬዚዲ ኢንቴ ዴሚዳ ኣሰ ኡባ ሃ ዲጊሳሰ ጸይጊቴ» ጌዴሰ።

21:42 ማዛ 118:22-23 § **21:44** ኢሲ ኢሲ ገሻ ማጻፋቲ ታይቦ ኦይዱ ታማኔ ኦይዱ ቦላ ዲዛይሳ ጉጃቲስ፤ ቆፋዚካ ሉቃሳ ሺምፖ 20:18 ዲዛይሳ ሚሳቲስ።

10 አሽካራቲካ ኦጌ ቦላ ከዚሁ ላ ዳሚዳይታ ሎኦታካ ኢታታካ ኡባ ሺሺዲ ሳርጌዛሶ አማላ ኩንሉዳ።

11 «ካዎይካ ዳይጌቲዳ አማላ ቤያናስ ሶ ጌሊዛ ዎዴ ሳርጌ ማይኦ ማይኦንታ አስ ዳሚዳስ።

12 «ሃይሶ! ሳርጌ ማይኦ ማይኦንታ ዋናዳ ሃ ጌላናስ ዳንዳያዲ?» ጌ ኦይቺን ኣዳዛስ ዛራና ቃላይ ቆይደሰ።

13 ካዎይካ ሳ አሽካራታ፡ «ሃይሳ ኣዳዛ ቶሆኔ ኩሼ ሺሺ ቃቺዲ ሄን ካሬን ዲዛ ቆማን ኬሲ ኦሊቲ፤ ሄን ዬሆኔ ኣቻ ጋርጩኹ ጌዳና።»

14 «ዳይጌቲዳይቲ ዳርታ፤ ዶሬቲዳይቲ ጌዲኮ ጉላታ» ጌ ዮቲዳስ።

ጌራ ቃንጻናስ ሺቂዳ ኦይሾ

(ማር 12:13-17፤ ሉቃ 20:20-26)

15 ሄሳፌ ጉዬ ፋርሳዌቲ ከዚ ቢሼ፡ «ኢዛ ዶናፔ ባላ ቃላ ዎስቲ ዳሚ ኦይኪና?» ጌዲ ዘሬቲዳ።

16 ባና ካሊዛይታ ሄርዶሳ ኣሳታራ ኢዛኮ ኪቲዲ፡ «ኣስታማሬ! ኔጌ ቱማንቻኔ ጸሳ ኦጌ ቱማፔ ታማርሲዛዴ ጌዲዳይሳኔ ኦናስካ ዲማ ማዶ ኦሶንታ ኡባካ ኢሲ ማላ ኔ ዳሊዛይሳ ኦ ኤርስ።

17 ኔስ ኣይ ሚሳቲዛኮ ኣኔ ኦስ ዮታ፤ ቁሳሬስ ጌራ ቃንጻናስ ቤሲዜ? ቤሲኔ?» ጌዳ።

18 ዬሱሲካ ኢስታ ጌኔ ቆፋ ኤሪዲ፡ «ኣንቴኖ ቆጵፔ ቆሞን ሃኒዛይቶ! ታና ዮኦን ባሌሉ ኦይካናስ ኣዛስ ኮዬቲ?»

19 ኢንቲ ጌራ ቃንጸዛ ሚሻ ኣኔ ታና ቤሲቲ» ጌን ኢስቲካ ኢሲ ዲናሬ ጌቲቲዛ ሚሻ ኢዛስ ኤሂዳ።

20 ኢዚካ፡ «ሃይሳ ሚሻ ቦላ ዲዛ ሚስሌይኔ ጸፊቲዳ ሱንላይ ኦናይሴ?» ጌዳስ።

21 ኢስቲካ ኢዛስ፡ «ቁሳሬይሳ» ጌዳ። ኢዚካ ኢስታስ ዛሪዲ፡ «ቁሳሬይሳ ቁሳሬስ፡ ጸሳይሳ ጸሳስ አሚቲ» ጌዳስ።

22 ሄሳ ሲዬዲ ኢስቲ ማላሌቲዲ ኢዛ ኣጌ ቢዳ።

ሃይቂዳይታ ዳንላ ጌሻስ ሺቂዳ ኦይሾ

(ማር 12:18-27፤ ሉቃ 20:27-40)

23 «ሃይቂዳይታስ ዳንዶይ ባ» ጌዲ ኣማኒዛ ሳዱቃዌቲ ሄ ጋላስ ዬሱሳኮ ሺቂዳ።

24 «አስታማሬ! ሙሴይ፥ ሐሳዳይ ማች ኤኪዲ ና ዩሎንታ ሃይቂኮ ኢዛ አሻይ ሃይቂዳይሳ ማች ኤኪዲ ባ አሻ ላቲዛ ና ኢዛስ ዩሎ» ጌዴስ።

25 ኑ አቻን ላፑን አሻቲ ዴቴስ ሺን ኮይሮ አሻይ ማች ኤኪዲ ና ዩሎንታ ሃይቂዳ ገሻስ ካሎ አሻይ ኢዛ ማቼዮ ኤኪዴስ።

26 ናምኣንሶ አሻይካ ሃይቂዳ አሻሶ ና ዩሎንታ ሃይቂዴስ፤ ሄሳሳካ ሃኒሺን ማጫሳያ ላፑንሳ አሻ ጌላዱስ።

27 ወርሴሳን ማጫሳያ ሃይቃዱስ።

28 ሄሳ ገሻስ ላፑናቲ ወሪካ ኢዛ ኤኪዳሺን ሃይቆፔ ዴንላ ጋለስ ማጫሳያ ላፑናታፔ አዋይሳ ማች ጌዴኔ?» ጌዴ።

29 ዩሱሲካ ኢስታስ ዛሪዲ፥ «ጌሻ ማጻፋታኔ ጸሳ ዋልቃ ኢንቴ ኤርንታ ገሻስ ባሌቲታ።

30 ሃይቆፔ ዴንዲዳፔ ጉዬ አሳይ ሳሎ ኪታንቻታ ማላ ጌዳና አቲን ኤኬቴቴናኔ ጌሌቴና።

31-32 ሃይቂዳይታ ዴንላ ገሻስ ጌዲኮ ጸሲ፥ ሐታኒ አብራሃሜ ጸሳ፥ ዪሳቃ ጸሳ፥ ያቆቤ ጸሳ፥ ጌዲ ኢንቴስ ዮቶይሳ ናባቢቤኬቲ? ጸሲ ፓጸታ ጸሳ አቲን ሃይቂላታ ጸሰ ጌዴና» ጌዴስ።

33 ዴሬዚካ ሄሳ ሲዪዲ ኢዛ ቲሚርቴዛን ማላሌቲዴስ።

ኡባፌ አጂዛ አዛዘ

(ማር 12:28-34፤ ሉቃ 10:25-28)

34 ዩሱሲ ሳዱቃዊታ ጮኡ ሂስቲዳይሳ ሲዪዲ ፋርሳዌቲ ኢሲ ቦላ ሸቄቲዴ።

35-36 ኢስታ ጌዴፌ ኢሲ ሙሴ ዋጋ ሎኤሊ ኤሪዛዴይ ዩሱሳ ፓጫናስ ኮዪዲ፥ «አስታማሬ! ሙሴ ዋጋታ ጌዴን ኡባፌ አጂዛይ አዋይሴ?» ጌዲ ኦይቺዴስ።

37 ኢዚካ ዛሪዲ፥ « ኔ ጎዳ ጸሳ ኔ ኩሜላ ዋዚናፔ፥ ኔ ኩሜላ ሸምፖፌ፥ ኔ ኩሜላ ቆፋፔ ደሳ።»

38 ሃይሲ ኮይሮኔ ኡባፌ አጂዛ አዛዘ።

39 ናምኣንሶይካ ኢዛ ሚሳቴስ፥ ሄሲካ፥ ኔ ሾሮ ኔ ሁኤ ማላ ደሳ፥ ገዛይሳ።

40 ሙሴ ዋጋይኔ ናቤታ ቲሚርቴይ ወሪካ ሃይታ ናምኤ አዛዘታን ቃሼቴስ» ጌዴስ።

ከርሰቶሳ ገሻሰ ሸቂዳ ኦይሾ
(ማር 12:35-37፤ ሉቃ 20:41-44)

⁴¹ ፋርሳዌቲ ኢሲ ቦላ ሸቂቲ ዲሺን ዩሱሲ ኢሰታ፡

⁴² «ከርሰቶሳ ገሻሰ ኢንቲ ኣይ ጌቲ? ኢዚ ኦና ና?» ጌ
ኦይቺዳሰ፤ ኢሰቲካ ኢዛሰ ዛሪዲ፡ «ኢዚ ዳዊቲ ና» ጌዳ።

⁴³⁻⁴⁴ ኢዚካ ኢሰታሰ፡

«ሂሰቲን ዳዊቲ

ጸሎ ኣያና ዋልቃን፡

፤ጸሳይ ታ ጎዳ፤

ጌዲ ዋኒ ጸይጌዴ?

፤ታ ኔ ሞርኬታ ኔ ቶሆ ጋርሳን

ጉልባቲሳና ጋካናሰ

ኔ ታ ኡሻቻን ኡታ!፤ ጌዴሰ።

⁴⁵ ሄሳ ገሻሰ ዳዊቲ ኢዛ፡ ፤ታ ጎዳ፤ ጌዲ ጸይጌኮ ዋኒዲ ኢዛሰ
ና ጌዳና ዳንዳይዜ?»

ጌዴሰ።

⁴⁶ ኢዛሰ ኢሲ ቃላ ዛራና ዳንዳይዳ ኣሲ ዋይኮ ሄ ጋላሳፌ ሲሚን
ኢዛ ኦይሾ ኦይቻና ጸሊዳ ኣሲ ኦኒካ ቤቲቤና።

23

ዩሱሲ ፋርሳዌታኔ ሙሴ ዋጋ ታማርሲዛይታ ካጂዴሰ
(ማር 12:38-39፤ ሉቃ 11:43-46፤ 20:45-46)

¹ ቃሴካ ዩሱሲ ዴሬዛሲኔ ባና ካሊዛይታሰ፡

² «ሙሴ ዋጋ ታማርሲዛይቲኔ ፋርሳዌቲ ሙሴ ዋምቦራ ቦላ
ኡቲዳ።

³ ሄሳ ገሻሰ ኢሰቲ ኢንቲሰ ዮቲዛይሳ ኡባ ኦፊቲኔ ናጌቲ፤ ጌዶ
ኣቲን ኢሰቲ ዶናን ሃሳይዛይሳ ማላ ኦሶን ቤሶንታ ገሻሰ ኢንቲ
ኢሰታ ኦሶ ካሎፍቲ።

⁴ «ሂሳፉካ ኣሲ ቶካናሰ ዳንዳዮንታ ዴጾ ቶሆ ቃቺዲ ኣሳ ሃሼ
ቦላ ዋፊቲሰ፤ ባሰ ጌዲኮ ቢራጂ ዴራንካ ቦቼቲና።

⁵ ኢሰታ ኦሶ ኡባ ኣሲ ቤያና ማላ ኦፊቲሰ፤ ባ ኣሼንኪታቤ ጌሻ
ማጸፋ ጌዶፌ ጸፊ ኤኪዳ ኢሲ ኢሲ ጸቂሴታ ኪታቤ ሲኪዲ
ሊጴ ቦላ ዋይኮ ኩሼን ቃቺዛዝ ኦፊቲሰ። ባ ማይኦ ማጫራ
ኣዲሴቲሰ።

6 ዲጊሳይ ዲዛሶን ቦንሾሶ አይሁዳ ዋሳ ኬላንካ ሲንላራ ኡታና ዶሴቴስ።

7 ሄሳፉካ ጊያ ጊዶን ሳሮ ጌቴታናሲኔ አሳይ ኢስታ፡ (አስታማሬ!) ጋና ማላ ኮዬቴስ።

8 «አንቴ ጊዲኮ፡ (አስታማሬ) ጌቴቲ ጴይጌቶፍቴ፤ አንቴ አስታማሬይ ኢሳ ጸላላ ጊዲሺን አንቴ ወሪካ ኢሶይ ኢሳስ ኢሻንታ።

9 ሳሎን አንቴስ ኢሲ አዋይ ጸላላ ዲዛ ጊሻስ ቢታ ቦላ ኦናካ፡ (አዋዉ!) ጊ ጴይጎፍቴ።

10 አንቴ አስታማሬይ ኢሲ ከርስቶሳ ጸላ ጊዲዳ ጊሻስ አንቴ፡ (አስታማሬንቶ!) ጌቴቶፍቴ።

11 አንቴ ጊዶን ኡባፌ አጂዛዴይ አንቴስ ኦሴዛዴ ጊዳና።

12 ባና ቶቂሲዛዴይ ካዉያና፤ ባና ካዉሺዛዴይ ቦንቼታና።

13 «አንቴኖ ቆጼፔ ቆሞን ሃኒዛይቶ፡ ሙሴ ዋጋ ታማርሲዛይቶ! አንቴኖ ፋርሳዌቶ! አሳይ ጸሳ ካዎቴላ ጌሎንታ ማላ አሳ ቦላ አንቴ ፔንጌ ጎርዲዛ ጊሻስ አንቴና አዬ አና! አንቴ አንቴስ ጌሌኬታኔ ጌላናስ ኮይዛይታካ ጌልሌኬታ።

14 አንቴኖ ቆጼፔ ቆሞን ሃኒዛይቶ! ሙሴ ዋጋ ታማርሲዛይቶ፡ ቃሴካ ፋርሳዌቶ! አንቴስ አዬ አና! አዚናይ ባይንዳ ማጫሳታ ኬላ ካሎሲሽ አሳ አይፌ ሲንላን ኦዲሳ ዋሳ አንቴ ዋሲዛ ጊሻስ አንቴ ኢታ ፒርዳ ፒርዴታና። *

15 «አንቴኖ ቆጼፔ ቆሞን ሃኒዛይቶ! ሙሴ ዋጋ ታማርሲዛይቶ! ቃሴካ ፋርሳዌቶ! ኢሲ አስ አይሁዳ አማኖን ጌልላናስ አባ ቦላራኔ ቢታ ቦላራ ዩዩ ዳቡርዲኔ አማንሊዳ አሳ አንቴፌ ናሞኡ ኩሼ አሊዲ ጋናሜ ና አንቴ ኬሲዛ ጊሻስ አንቴስ አዬ አና!

16 «አንቴኖ አንቴስ ቆቂ ኡቲዲ ሃራታ ካሌሊዛይቶ! አንቴስ አዬ አና! (ኦኒካ ጸሳ ኬላን ጫቂኮ አይኮይ ባ) ጊዶ አቲን፡ (ጸሳ ኬላ ጊዶን ዲዛ ዋርቃን ጫቂኮ ጫቆ ጎሜይ ጋካና) ጌታ።

17 አንቴኖ ቆቂዳይቶ! ባሌቲዳይቶ! ዋርቃፌኔ ዋርቃ ዲማሲዳ ጸሳ ኬላፌ አዋይሲ አጂዜ?

23:11 ማቶ 20:26-27፤ ማር 9:35፤ 10:43-44፤ ሉቃ 22:26 23:12 ሉቃ 14:11፤ 18:14 * 23:14 ኢሲ ኢሲ ጌሻ ማጸፋቲ ታይቦ ታማኔ ኦይዱ ቦላ ዲዛ ቆፋ ጉጃቴስ፤ ቆፋዚካ ማርቆሳን ሺምፖ 12:40 ዲዛይሳ ሚሳቴስ።

18 ሄሳሶካ፡ ሉኒካ ያርሾ ተ ያርሺዛሶ ሶላ ጫቂኮ አይኮይ ባ፤ ጊዶ ኣቲን ያርሺዛሶን ዲዛ ያርሾዛ ሶላ ጫቂኮ ጫቆይ ጎሜሰን ጌታ።

19 ኢንቴኖ ቆቄቶ! ያርሾፌኔ ያርሾ ሺሺዛሶፔ አዋይሴ አፏዛይ?

20 ሄሳ ጊሻሰ ያርሾ ሺሺዛሶ ሶላ ጫቂዛዴይ ያርሾሶዛ ሶላኔ ያርሺዛሶ ሶላ ዲዛ ኡባ ሚሻን ጫቁሰ።

21 ሄሳሶካ ጸሳ ኬላዛ ሶላ ጫቂዳይ ጸሳ ኬላኒኔ ኢዛ ጊዶን አቂዛይሳን ጫቁሰ።

22 ሳሎን ጫቂዛዴይካ ጸሳ አልጋኒኔ አልጋ ሶላ ኡቲዳይሳን ጫቁሰ።

23 «ኢንቴኖ ቆጵፔ ቆሞን ሃኒዛይቶ፡ ሙሴ ዎጋ ታማርሲዛይቶ፡ ፋርሳዌቶ! ኢንቴሰ አዬ አና! አሱታፔ፡ አነጋፔኔ ካትካልአፌ ታማፌ ኢሲኖ አሜታ፤ ጊዶ ኣቲን ዎጋታፔ ዋናቲዛይታ ሄይቲካ ቱማ ፒርዳ፡ ማርቴሴኔ አማኔቴላ ጊዲኮ ካፏዴታ። ሄይታ አጎንታ ዲሺ ሃይታንታ ኢንቴ ኦላናሰ ኢንቴሰ ቤሴሰ ሺን ኣጊዴታ።

24 ኢንቴኖ ቆቂ ኡቲዲ ካሌሊዛይቶ! ኡኤ ጋጪዲ ኡዬታ ሺን ጋሚላ ሙማ ሚቲታ!

25 «ኢንቴኖ ቆጵፔ ቆሞን ሃኒዛይቶ፡ ሙሴ ዎጋ ታማርሲዛይቶ፡ ፋርሳዌቶ! ኢንቴሰ አዬ አና! ጹኣሲኔ ኬሬሰ ሶላ ባጋ ቁጩታ ሺን ኢዛ ጊዶን ዲዛይሳ ኢንቴ ቦንቃኒኔ ኡዜቴላን ሺሺዴታ።

26 ኔኖ ቆቂ ፋርሳዌዙ! ኮይርታዳ ጹኣሲኔ ኬሬሰ ጊዶ ባጋ ጌሻ! ሄሳፌ ጉዬ ካሬ ባጋይ ጌሽ ጊዳና።

27 «ኢንቴኖ ቆጵፔ ቆሞን ሃኒዛይቶ፡ ሙሴ ዎጋ ታማርሲዛይቶ፡ ቃሴ ፋርሳዌቶ! ሶላ ባጋይ ኖራን ሚሹቴዲ ሎኢዛይቲ ጊዶይ ጊዲኮ ሃይቂዳይታ ሚቁሴኔ ዳር ቱናቴላን ኩሚዳ ዲፎታ ሚሳቲዛ ጊሻሰ ኢንቴሰ አዬ አና!

28 ኢንቴካ ሶላ ባጋራ አሳሰ ጲሎ አሳታ ሚሳቲታ፤ ኢንቴ ጊዶይ ጊዲኮ ጨሞኒኔ ኢታቴላን ኩሚዴሰ።

29 «ኢንቴኖ ዶናን ጨሚዛይቶ! ሙሴ ዎጋ አሰታማሬቶ፡ ቃሴካ ፋርሳዌቶ! ኢንቴሰ አዬ አና! ናቤታ ዲፎ ሎኤሊዛይቶ! ጲሎ አሳታ ዲፎ ሃዉልቴራ ግግሲዛይቶ!

† 23:18 ያርሾ፡ ያርሾ ኣሲ ባ ጎዳሰ ጊዲ ኣሊዛ ኣሶይ ዉሪ ያርሾ ጌቴሰ።

23:22 ኢሳ 66:1፤ ማቶ 5:34

23:23 ሊዌ 27:30

23:27 ሃዋ 23:3

30 ኑ አዋቲ ናቤታ ዋዲዛ ዋዴ ኑ ዲዛኮ ኢስታራ ዙፔቶኮ ሺን፤

31 ኢንቴ ናቤታ ዋዲዳ አሳታ ናይታ ጊዲዳይሳ ኢንቴ ዶናራ ኢንቴርካ ኢንቴ ኢንቴ ቦላ ማርካቲታ።

32 ሂስቲኮ ኦሴቲዲ ፖሌቶንታ ኦጌ ቦላ ዲዛ ኢንቴ አዋታ ኦሶ ፖሊቲ።

33 «ኢንቴኖ ዱኪዛ ኢታ ሾሻ ናይቶ! ጋናሜ ታማ ፒርዳፌ ኢንቴ ዋኒ አታኔ?»

34 ሄሳ ጊሻስ ናቤታኔ ኤራንቻታ አስታማሬታካ ታ ኢንቴስ ዬዳና። ኢንቴ ኢስታ ጊዶፌ ኢሲ ኢሲ አሳታ ዋዳና። ባጋይታ ኢንቴ ካቃና፤ ባጋይታ ኢንቴ ኣይሁዳ ዋሳ ኬላን ጋራፋናኔ ሄ ካታማፔ ሃራ ካታማ ኢንቴ ጎዳና።

35 ሄሳ ጊሻስ ጸሎ ኣቤሌ ሱላፌ ሃ ሰሚን ጸሳ ኬላኒኔ ያርሾ ያርሺዛሶ ጊዶን ኢንቴ ዋዲዳ ባራኪዮ ና ዛካራሳ ሱላ ጋካናስ ቢታ ቦላ ጉኪዳ ጸሎታ ሱላ ኡባስ ኢንቴ ኦይሼታና።

36 ታ ኢንቴስ ቱሙ ጋይስ፤ ካሴ ኣዲዳ ዮኑ ኡባስ ሃይሲ ሃ ዬሌታይ ኦይሼታና።

37 «ሃኔ ዬሩሳላሚ! ናቤታ ዋዲዛሬ! ኔኮ ከቲቲዳይታ ሹቻራ ጫዲዛሬ! ሃኔ ዬሩሳላሚ፤ ኩቶ ኣያ ባ ጨዌታ ባ ቄፌ ጊዶ ሸሺዛ ማላ ታ ኔ ናይታ ሸሻናስ ኣፑን ዋዴ ኮያዲናሺን ኔ ጊዲኮ ኮያቤካ።

38 ሄኮ ኢንቴ ኬሊ ካይስ ጊዲ አታና።

39 ታ ኢንቴስ ቱሙ ጋይስ፤ ኢንቴ ጎዳ ሱንላን ዪዛዳይ ኣንጃቲዳዴ ጋና ዋዴይ ጋካናስ ናምኣንሶ ታና ቤዬኬታ» ጊዴስ።

24

ዋዴ ወርሴላ ማላታታ

(ማር 13:1-2፤ ሉቃ 21:5-6)

1 ዬሱሲ ጸሳ ኬላፌ ኬዚ ቢሺን ኢዛ ካሊዛይቲ ጸሳ ኬላዚ ሹቻን ኬዴቲዳይሳ ቤሳና ኮዬዲ ዬሱሳኮ ሸቂዳ።

2 ኢዚካ ኢስታስ፤ «ሃይሳ ኡባ ጸሌቲ? ታ ኢንቴስ ቱሙ ጋይስ፤ ሃይሲ ኢንቴ ቤኢዛ ኢሶይ ኢሳ ቦላ ዲዛ ሹቻይ ላሌቶንታ ኢሲ ሹቺካ ሃይሳዳ ዴና» ጊዴስ።

23:33 ማቶ 3:7፤ 12:34፤ ሉቃ 3:7 23:35 ሜጴ 4:8፤ 2ታሪ 24:20-21

23:38 ኤር 22:5 23:39 ማዛ 118:26

3 ኢዚ ዲብራዛይቲ ጌቴቲዛ ዙማ ቦላ ኡቲ ዲሺን ኢዛ ካለዛይቲ ጸላላ ኢዛዙ ሸቂዲ፥ «ኣኔ ኩስ ዮታ፤ ሃይሲ ኔ ጊዛይሲ ኣይዴ ሃናኔ? ኔ ዩሳሲኔ ዎዴ ወርሴላስ ማላታይ ኣዜ?» ጊ ኦይቺዳ።

4 ዬሱሲካ ዛሪዲ፥ «ኦኒካ ኢንቴና ባሌጶንታ ማላ ናጌቲቴ።

5 ቡሮ ዳርቲ፥ ታ ኪርሰቶሳ) ጊሼ ታ ሱንላን ያና፤ ዳርታካ ባሌላና።

6 ኦላኔ ኦላ ጊሻስ ሃሳዬቲዛ ዎሬ ኢንቴ ሲያና። ሃ ዮኦቲ ወሪካ ዎልቃራ ፖሌታና ሺን ወርሴላ ቡሮ ጊዲዳ ጊሻስ ኢንቴ ሃይሳን ዳጋዎንታ ማላ ናጌቲቴ።

7 ዴሬይ ዴሬ ቦላ፥ ካዎይ ካዎ ቦላ ዴንዳና፤ ዲማ ዲማ ዴሬን ኮሻይኔ ቢታ ቃሊ ሃናና።

8 ሄሲ ወሪካ ሚጸስ ሌሶ ማላ።

9 ሄ ዎዴ ኢንቴና ዎዬስ ኣሊ ኢማና፤ ኢንቴና ዎላና፤ ታ ሱንላ ጋሶን ዴሬ ኡባን ኢንቴ ኢጼቲዳይታ ጊዳና።

10 «ሄ ዎዴ ዳር ኣሳይ ቋጾታና፤ ኢሶይ ኢሳ ኣሊ ኢማናኔ ባ ጊዶን ኢጾታና።

11 ዳር ዎርዶ ናቤቲ ዴንዳናኔ ዳርታ ባሌላና።

12 ኢታቲሊ ዳሪዛ ጊሻስ ዳርታፔ ሲቆይ ኢርጸና።

13 ወርሴላ ጋካናስ ሚኒዳዴይ ኣታና።

14 ዴሬ ኡባስ ማርካ ጊዳና ማላ ሃይሲ ካዎቲላ ሚሺራች ቃላይ ኩማላ ኣላሜን ዮቴታና፤ ሄሳፌ ጉዬ ወርሴላ ያና።

15 «ሄሳ ጊሻስ ናቤ ዳኔላን ዮቴቲዳይሳ ማላ፥ (ሃራሲዛ ቱናቴላ) ኣንጃቲዳሶን ኤቂዳይሳ ኢንቴ ቤኢዛ ዎዴ ናባቢዛዴይ ዎዚናን ዎሶ፤

16 ሄ ዎዴ ዩሁዳን ዲዛይቲ ፑዴ ዙማ ቦላ ጋንጌቶ።

17 ኬላ ካራ ቦላ ዲዛዴይ ኦኒካ ባ ሚሽ ኬላፌ ኬሳና ጊዲ ዲጌ ዎጵፎ።

18 ጋዴ ጊዶን ዲዛዴይ ኦኒካ ባ ማይኦ ኤካና ጊዲ ሶ ሲሞፎ።

19 ሄ ጋላሳታን ቃንላራ ዲዛ ማጫሳታሲኔ ና ቋንጢ ኣዬታስ ኣዬ ኣና!

20 ሄሳ ጊሻስ ኢንቴ ጋንጎይ ባልጎ ዎይኮ ሳሞባታ ጋለስ ጊዶንታ ማላ ዎሲቴ።

21 ሄ ዎዴ ኣላሜይ ሜጴቶሶፔ ሃኙ ጋካናስ ሃኒ ኤርንታ ሚሺ ሲንላፌካ ኢዛ ሚሳቲዛይ ባይንዳ ዎልቃማ ሜቶይ ሃናና።

22 ሄ ጋላሳቲ ቃዋንታኮ አሾ ማይኢዳ አሲ ወሪ አቴና ሺን ደሬቲዳይታ ገሻሰ ሄ ጋላሳቲ ቃማና።

23 «ሄ ዋዴ ኦኒካ፥ ሄኮ ኪርሰቶሲ ሃይሳን ዴሰ!» ዋይኮ፥ ሄሳን ዴሰ፥ ገዛዴ አማኖፒቲ።

24 ዋርዶ ኪርሰቶሲኔ ዋርዶ ናቤቲ ቡሮ ዴንዲዲ ኢስታሰ ዳንዳይቲኮ ደሬቲዳይታ ባሌፋናሰ ገዲ ዋልቃማ ማላታታኔ ካሴ ኦሴቲ ኤሮንታ ሚሽ አፋና።

25 «ሄኮ ሃይሳ ታ ኢንቴሰ ካሴታ ኮታይሰ።

26 ሄሳ ገሻሰ፥ ሄኮ ሂርኪ ባዘን ዴሰ፥ ገዲ ኢንቴሰ ኮቲኮ ሄ ኬዘፒቲ፤ ሄኮ ኢልፒኒን ዴሰ፥ ገኮ አማኖፒቲ።

27 ዋልቃንሐ ኣርሼይ ሞኪዛሶራ ዋልቃሚዲ ኣርሼይ ወሊዛሶ ጋካናሰ ፖኢዛይሳ ማላ አሳ ና ዩሳይካ ሄሳላ ሃናና።

28 አሃይ ዲዛሶ አንኮይ ሸቄሰ።

29 «ሄራካ ሄ ኢታ ሜቶ ጋላሳታፔ ጉዬ

ኣርሼይ ቆማና፤

ኣገናይ ባ ፖኦ ዲጋና፤

ጸለንቴቲ ሳሎፔ ቆቆፌታና፤

ሳሎ ዋልቃማቲካ ቃጸና።

30 «ሄ ዋዴ አሳ ና ማላታይ ሳሎ ቦላ ቤታና። ቢታ ቦላ ዲዛ ዴሬይ ወሪ ዩካና፤ አሳ ናይካ ሳሎ ሻራ ቦላ ዳሮ ዋልቃራኔ ገታ ቦንቾራ ዩሺን አሳይ ቤያና።

31 ኪታንቻታካ ዳሮ ዋልቃማ ጹሩምባ ገሪሳራ ዩዳና። ኢስቲካ ደሬቲዳይታ ኦይዱ ጉላፔ ሳሎሰ ሃ ጋጸፔ ሄ ጋጸ ጋካናሰ ኡባ ኢሲሶ ሺሻና።

32 «ባላሴ ጌቴቲዛ ሚፋፌ ሃይሳ ታማርቲ፤ ባላሴ ሚፋይሰ ኡንቁሎይ ጨሊሊዛ ዋዴ ኢዛ ሃይሳ ኬሲሺን ቦኔይ ማቲዳይሳ ኢንቴ ኤሬታ።

33 ሄሳላካ ሃይታ ኢንቴ ቤኢዛ ዋዴ ኢዚ ፔንጌ ማቲዳይሳ ኢንቴ ኤራና።

34 ታ ቱሙ ጋይሰ፤ ሃይሲ ወሪ ፖሌታና ጋካናሰ ሃ ዩሌታይ ኣጴና።

35 ሳሎይኔ ሳኣይ ኣቆና ሺን ታ ቃላይ ገዲኮ ሙሌካ ኣጴና።

ጎዳይ ያና ጋላሰ ኦኒካ ኤሬና

(ማር 13:32-37፤ ሉቃ 17:26-30፥34-36)

36 «ሄ ጋላሳዮኔ ሄ ሳቴዮ አዋፔ ኣቲን ሳሎ ኪታንቻታ ጊዲንካ ናዛ ጊዲንካ ኦኒካ ኤሬና።

37 ኖሄ ዋዴ ሃኒዳይሳ ማላ ኣሳ ና ዩሲ ሄሳ ማላ ጊዳና።

38 ቆይሲዛ ሃላፌ ካሴ ኖሄይ ማርካቤን ጌሊዛ ጋላስ ጋካናስ ኣሳይ ሚሺኔ ኡዩሺ፥ ኤኪሺኔ ጌልሺ ጋምኢዴስ።

39 ሄ ዋዴይ ጋካናስ ኣዚ ሃናናኮ ኣሳይ ኤርንታኔ ቆፖንታ ባሻ ሃሊ ዩዲ ሚቲዳይሳ ማላ ታ ኣሳ ናይ ዩዛ ዋዴይካ ሄሳሉ ሃናና።

40 «ሄ ዋዴ ናምኡ ኣሳቲ ኢሲፌ ጎሻን ፔኣና ሺን ኢስታፌ ኢሳዴይ ኤኬታና፤ ኢሳዴይ ኣታና።

41 ናምኡ ማጫሳቲ ዋጸን ኢሲፌ ጋጫና ሺን ኢስታፌ ኢሲኔያ ኤኬታና፤ ኢሲኔያ ኣታና።

42 «ሂስቲኮ ኢንቴ ጎዳይ ያና ጋላሳ ኢንቴ ኤርንታ ጊሻስ ቤጊዲ ናጊቴ።

43 ሃይሳ ዋዚናን ዋሊቴ፤ ካይሶይ ቃማፌ ኣፉንላ ሳቴ ቦላ ያናኮን ኤሪዛኮ ኢዛ ሚሽ ካይሶይ ኤኮንታ ማላ ኬላ ኣዋይ ቤጊዲ ናጋና።

44 ኣሳ ናይካ ኢንቴ ቆፖንታ ሳቴ ቦላ ያና፤ ኢንቴካ ሄሳሉ ጊቴዳይታ ጊዲቴ።

45 «ዋዴራ ሶ ኣሳ ቁማ ሚዛና ማላ ጎዳይ ባ ኬላ ኣሳ ቦላ ሹሚዳ ኣማኔቲዛ ጨንጫ ኦሳንቻይ ኦኔ?

46 ኬላ ኣዋይ ሲሚዲ ዩዛ ዋዴ ኢዛስ ኢሚዳ ሃዳራ ኦሊ ፖሊሺ ቤቲዳ ኦሳንቻይ ኣንጃቲዳይሳ።

47 ታ ኢንቴስ ቱሙ ጋይሰ፤ ጎዳይ ኢዛ ባ ሃሪዳ ኡባ ቦላ ሹማና።

48 ጊደ ኣቲን ሄ ኦሳንቻይ ኢታ ጊዲዲ፥ ታ ጎዳይ ጋምኢዲ ያና ጊ ቆፒዲ።

49 ዴንዲ ሃንኮ ኦሳንቻታ ዋቆ ኦይኪኮ ማሖቲዛይታራ ሚኮኔ ኡዩኮ።

50 ኢዚ ቆፖንታ ጋላሳኒኔ ኤርንታ ሳቴን ኢዛ ጎዳይ ዩዲ።

51 ኢዛ ቃንጾሊ ካኣና፤ ኢዛ ኤጸ ቆቆፔ ቆሞን ሃኒዛይታራ ኦላና። ሄንካ ዬሆይኔ ኣቻ ጋርጬቹ ሃናና።

25

ታሙ ጌላኦታ ሌሚሶ

1 «ሄ ዋዴ ሳሎ ካዋቴሉያ ሚሺራ ሞካናስ ጸምፔ ኦይኪዲ ኬዚዳ ታሙ ጌላኦታ ሚሳታወስ።

2 ሄ ታማታፔ ኢቻሹ ጌላኦታ ኤያታ፤ ሃንኮ ኢቻሻቲ ጨንጫታ።

3 ኤያቲ ኩራዜ፥ ጸምፔ ኦይኪዳ ሺን ወሪኮ ጉጃና ሃራ ናጌ ላምባ ኦይኪቤቴና።

4 ጨንጫቲ ጊዲኮ ባ ኩራዜዛራ ወሪኮ ጉጃና ላምባ ሃራ ጸርሙሴን ኦይኪዳ።

5 ማቺዮ ኤካና ሚሺራይ ዮንታ ጋምኢን ጴስኮይ ዳጸን ኣሳይ ወሪካ ጴስኪዳስ።

6 «ሌላ ጊደል ጊዲሺን፥ «ሚሺራዚ ዬስ! ኬዚዲ ሞኪ ኤኪቲ!» ጊዛ ጳይሳ ቃላይ ሲዬቲዳስ።

7 ሄ ዋዴ ጌላኦቲ ወሪካ ዴንዲዲ ባ ጸምፔ ጸምፔ ኦይሴሶኔ ጊጌቴል ኦይኪዳ።

8 ኤያቲ ጨንጫታ፥ ሱ ጸምፔይ ቶኣና ጊዛ ጊሻስ ኢንቴ ላምባፌ ኩስ አሚቲ» ጊዳ።

9 «ጨንጫ ጌላኦቲ ኢስታስ ዛሪዲ፥ ሱስ ዲዛ ላምባይ ኩሳራኔ ኢንቴሳራ ጊደንታ ጊሻስ ቢዲ ላምባ ባይዚዛይታፔ ኢንቴስ ሻሚቲ» ጊዳ።

10 ኢስቲ ላምባ ሻማና ቢ ከቺን ሚሺራዚ ጋኪ ዋዴዳስ። ካሴ ጊጌቲ ኡቲዳ ጌላኦቲ ቡላቻሶ ኢዛራ ጌሊዳ፤ ካሬይካ ጎርዴቲዳስ።

11 «ጉል ጋምኢሼ ሃንኮ ጌላኦቲ ዪዲ፥ ሳዶ! ጎዶ! ካሬ ኩስ ዶያ!» ጊዳ።

12 ኢዚካ ዛሪዲ፥ ሱ ኢንቴስ ቱሙ ጋይስ፤ ታ ኢንቴና ኤሪኬ!» ጊዳስ።

13 ሄሳ ጊሻስ ያና ጋላሳ ዋይኮ ሳቴዛ ኢንቴ ኤርንታ ጊሻስ ጊጌቲዲ ናጌቲ።

ሄቭ ኦሳንቻታ ለሚሶ

(ሉቃ 19:11-27)

14 «ጸሳ ካዋቴሉ ባስ ዲዛዝ ኡባ ባ ኣሽካራታስ ሃዳራ አሚዲ ሃራ ዳሬ ባና ዴንዲዳ ኢሲ ኣስ ሚሳቴስ።

15 ኣሽካራታስ ኢሳስ ኢሳስ ኢስታ ዋልቃ ማላ ጊግሲዲ ኢሳስ ኢቻሹ ሺ ቢራ፥ ኢሳስ ናምኡ ሺ ቢራ፥ ሃንኮይሳስ ቃሴ ኢሲ ሺ ቢራ አሚዲ ቢዳስ።

16 ኢቻሹ ሺ ቢራ ኤኪዳ አዳዚ ሄራካ ሚሻን ዛልኤ ኦይኪዳ ሃራ ኢቻሹ ሺ ቢራ ዋዲሲዳስ።

17 ቃሴካ ናምኤ ሺ ቢራ ኤኪዳይሲ ሃራ ናምኤ ሺ ቢራ ዋዲሲዳስ።

18 ኢሲ ሺ ቢራ ኤኪዳይሲ ባ ጎዳ ቢራ ቢታን ሞጊዳ ቆቲዳስ።

19 «አሽካራታ ጎዳይ ባ ቢዳሶን ዳሮ ዋዴ ጋምኢ ሲሚዳ ሚሻ ኢስታራ ሳላኤቲዳስ።

20 ኢቻሹ ሺ ቢራ ኤኪዳ አሽካራይ ሃራ ኢቻሹ ሺ ቢራ ዋዲሲዳይሳ ኤኪ ዪዳ፥ ሳዶ! ኔ ታስ ኢቻሹ ሺ ቢራ አማዳሳ ሺን ሄኮ ሃይሳ ታ ሃራ ኢቻሹ ሺ ቢራ ዋዲሳዲስ) ጊዳስ።

21 ኢዛ ጎዳይካ፥ (ሎኦ ኦላዳሳ፤ ኔኖ ሎኦ አማኔቲዳ አሽካራዘ! ኔኒ ጉላ ሚሻን አማኔቲዳ አስ ጊዳዳ ጊሻስ ታ ኔና ዳሮ ሚሻ ቦላ ሹማና፤ ጌዴ ኔ ጎዳ ኡፋይሳሶ ጌላ) ጊዳስ።

22 «ሃሳሶካ ናምኤ ሺ ቢራ ኤኪዳይሲ ጎዳዛኮ ሸቂዳ፥ ሳዶ! ኔ ታስ ናምኤ ሺ ቢራ አማዳሳ ሺን ሄኮ ሃራ ናምኤ ሺ ቢራ ዋዲሳዲስ) ጊዳስ።

23 ጎዳዚካ፥ (ሎኤላዳሳ፤ ሃይሶ ሎኦኔ ታስ አማኔቲዳ አሽካራዘ! ኔኒ ጉላን አማኔቲዳዴ ጊዳዳ ጊሻስ ታ ኔና ዳሮ ሚሻ ቦላ ሹማይስ፤ ጌዴ ኔ ጎዳ ኡፋይሳሶ ጌላ) ጊዳስ።

24 «ኢሲ ሺ ቢራ ኤኪዳ አሽካራዚ ሸቂዳ፥ ሳዶ! ኔኒ ዜሮንታሶፔ ማጺዛዴኔ ላሎንታሶፔ ሺሺዛ ሜንጼ ኢታ አስ ጊዳዳይሳ ታ ኤራይስ።

25 ሄሳ ጊሻስ ታ ባባዳ ቢታ ቦካዳ ኔ ቢራ ቦኪዳ ኦላን ሞጋዳ ቆታዲሲ፤ ኔ ሚሽ ሄሳ ቤያ!) ጊዳስ።

26 «ኢዛ ጎዳይ ዛሪዳ፥ (ሃይሶ ኢታ አዛላ አሽካራዘ! ታኒ ዜሮንታሶፔ ማጺዛዴ ላሎንታሶፔ ሺሺዛዴ ጊዳዳይሳ ኔ ኤራይ?

27 ሂስቲን ታ ሲማ ዪዛ ዋዴ ታ ሚሻ ዬሎራ ታ ኤካና ማላ ቲርፒሲ ዛልኢዛ አሳስ ኔ አማናስ ቤሴሲሺን) ጊዳስ።

28 « ሳኔ ሃኢ ኢዛፔ ሺ ቢራ ኤኪዳ ታሙ ሺ ቢራይ ዲዛዴስ አሚቲ።

29 ዲዛዴስ ጉጃታና ኔ ዳሪ ዳሪ ባና፤ ባይንዳዴፌ ሄ ዲዛ ጉላያካ ኢዛፔ ኤኬታይቻና።

30 ሃይሳ ጎኣይ ባይንዳ አሽካራ ጌዴ ዩኪዛሶኔ ኣቼይ ጋርጩቲዛሶ ሄን ካሬን ዲዛ ጳማን ከሲ ዩጌቱን ጌዴሰ።

ወርሴላ ፒርዳ

31 «ኣሳ ናይ ባ ኪታንቻታ ኡባራ ቦንቸን ዪዛ ዋዴ ባ ቦንቸ አልጋ ቦላ ኡታና።

32 ዴሬይ ወሪ ኢዛ ሲንሊ ሺቃና፤ ኢዚካ ሜሄ ሄሚዛዴይ ዴይሽ ዶርሳፌ ቆሪ ሻኪዛ ማላ ኣሳ ኢሳ ኢሳፌ ቆሪ ሻካና።

33 ዶርሳታ ባ ኡሻቻ ባጋራ፥ ዴይሻታ ሃዲርሳ ባጋራ ኤሳና።

34 ሄ ዋዴ ካዋይ ኡሻቻ ባጋራ ዲዛይታ፥ ሓንቴኖ! ታ ኣዋይ ኢንቴና ኣንጂዲይቲ ሃ ዪቴ! ኣላሜይ ሜዴቶሶፔ ኢንቴሰ ጊጌቲዳ ካዋቴላ ላቲቴ! ጋና።

35 ጋሶይካ ታኒ ጋፊን ታና ሚዚዴታ፤ ታ ሳሜቲን ታና ኡሺዴታ፤ ታ ኢማላ ጊዳዳ ዪን ታና ሞኪ ኤኪዴታ።

36 ታ ካሎቲን ታና ማይዚዴታ፤ ታ ሳኬቲን ታና ሃርጊሲዴታ፤ ታ ቃሼቲን ታና ኦይቺዴታን ጋና።

37 «ጸሎቲካ ዛሪዲ፥ ሳዶ! ኔ ጋፊን ኑ ኔና ኣይዴ ሚዚዶኒ? ዋይኮ ኔ ሳሜቲን ኣይዴ ቤኢዲ ኑ ኔና ኡሺዶኒ?

38 ኑ ኣይዴ ኔና ቤኢዲ ኢማላቴላ ሞኪዶኒ? ዋይኮ ኣይዴ ኔ ካሎቲን ቤኢዲ ኔና ማይዚዶኒ?

39 ሄሳሶካ ኔ ሳኬቲን ዋይኮ ቃሼቲን ኣይዴ ቤኢዲ ኔና ኦይቺዶኒ?» ጋና።

40 ካዋይካ ዛሪዲ፥ ታ ኢንቴሰ ቱሙ ጋይሰ፤ ሃይታ ላፋ ጊዳዳ ታ ኢሻታፔ ኢሳዴሰ ኦሊዳይሲ ኢንቴ ታሰ ኦሊዳ ማላን ጋና።

41 «ቃሴካ ሃዲርሳ ባጋራ ዲዛይታሰ፥ ሓንቴኖ ቃንጌቲዳይቶ! ታፔ ሻኬቲዲ ዳቡሎሳሲኔ ኢዛ ኪታንቻታሰ ጊጌቲዳ ሜርና ታማን ቢቴ ጋና።

42 ጋሶይካ ታ ጋፊን ታና ሚዚቤኬታ፤ ታ ሳሜቲን ታና ኡሺቤኬታ፤

43 ታና ኢማላቴላ ሞኪቤኬታ፤ ታ ካሎቲን ታና ማይዚቤኬታ፤ ታ ሳኬቲኔ ቃሼቲን ታና ኦይቺቤኬታን ጋና።

44 «ኢሰቲካ ዛሪዲ፥ ሳዶ! ኔ ጋፊን ዋይኮ ኔ ሳሜቲን ዋይኮ ኔ ኢማላ ጊዳን ዋይኮ ኔ ካሎቲኔ ኔ ሳኬቲን ዋይኮ ኔ ቃሼቲን ኑ ኔና ቤኢዲ ኣይዴ ኔኮ ጋኪቤኮኒ?» ጋና።

45 «ሄ ዎዴ ኢዚካ ኢስታስ ዛሪዲ፥ ቀታ ኢንቴስ ቱሙ ጋይስ፤ ሃይታ ላፋ ታ ኢሻታፔ ኢሳዴስ ኢንቴ ኦሶንታ ኦጊዳይሲ ታስ ኢንቴ ኦሶንታ ኦጊዳ ማላ፤ ጋና።

46 ሄይቲ ጌዴ ሜርና ፒርዳን ባና፤ ጸሎቲ ጊዲኮ ሜርና ዴኦኮ ባና» ጊዴስ።

26

አይሁዳቲ ዬሱሳ ዎቶናስ ማቄቴል

(ማር 14:1-2፤ ሉቃ 22:1-2፤ ዮሃ 11:45-53)

1-2 ዬሱሲ ሄሳ ሃሳዪ ዉርሲዳፔ ጉዬ ባና ካሊዛይታስ፤ «ናሞኡ ጋላሳፌ ጉዬ ፓዚጋ ጊዲዳይሳ ኤሬቲ? አሳ ናይ ካቄታናስ አጲ አሜታና» ጊዴስ።

3-4 ሄሳፌ ጉዬ ቄሴታ ሃላቃቲኔ ዴሬ ጨማቲ ቃያፋ ጌቴቲዛ ቄሴታ ሃላቃ ጊቤን ሸቂዲ ሂላራ ዬሱሳ ኦይሊዲ ዎቶናስ ማቄቴዳ።

5 ጊዶ አቲን፤ «አሳ ጊዶን ኦሺ ዴንዶንታ ማላ ባኣሌ ጋላስ ጊዶፖ» ጊዲ ቃቺዳ።

ዬሱሳ ሺቶ ቲይዳ ማጫሳዮ

(ማር 14:3-9፤ ዮሃ 12:1-8)

6 ዬሱሲ ቢታኒያን ኢንቺራቻ ሃርጌራ ዲዛ ሲሞና ጌቴቲዛዴ ሶን ዲሺን፤

7 ኢሲ ማጫስ ዲዛራ ጋቴይ ከሂ አልኦ ጊዲዳ አልባስጺሮሴ * ሺቶ ቢልቃጼ ኩሜል ኦይካዳ ዬሱሳኮ ሺቃዳ ኢዚ ማዳን ኡቲ ዲሺን ኢዛ ሁኤ ቦላ ሺቶዛ ጉሳዲስ።

8 ኢዛ ካሊዛይቲ፤ «ሄሳ ቤኢዲ ሃይሲ አዛስ ሜላ ሞሬቲዜ?

9 ሺቶዚ ዳሮ ጋቴስ ባይዜቲዲ ሚሻይ ማንቆታስ አሜቲዛኮቺ?» ጊዳ።

10 ዬሱሲ ሄሳ ኤሪዲ፤ «ሃኖ ማጫሳዮ አዛስ ዋዪሴቲ? ኢዛ ታስ ሎኦ ኦሳዲስ።

11 ማንቆቲ ኡባ ዎዴ ኢንቴናራ ዴቴስ፤ ታ ጊዲኮ ኡባ ዎዴ ኢንቴናራ ዲኬ።

12 ኢዛ ሺቶዛ ታ ቦላ ጉሲዳይሲ ታና ሞጎስ ጊጊሳናሳ።

25:46 ዳኔ 12:2 26:1-2 ከሳ 12:1-27 * 26:7 አልባስጺሮሴ፤ አልባስጺሮሴ ቦንቾ ሚሽ ኢዛፔ ኦሴቲዛ ቦላ አልኦ ሹቻ። 26:7 ሉቃ 7:37-38

13 ታ ኢንቴስ ቱሙ ጋይስ፤ ሃይሲ ሚሺራች ቃላይ ሳባኬቲዛ አላሜ ዩሾን ኣዋንካ ኢዛ ኦሌዳይሲ ኢዞ ቆፍሲዛዝ ጊዲዲ ሃሳዬታና» ጊዴስ።

ዩሱሳ ኣሉ ኢማናስ ዩሁዳ ጊጌቴላ
(ማር 14:10-11፤ ሉቃ 22:3-6)

14 ሃሳፌ ጉዬ ታማኔ ናምኣታፔ ኢሶይ ኣስቆሮንቶ ዩሁዳ ጌቴቲዛይሲ ቄሴታ ሃላቃታኮ ቢዲ፤

15 «ታ ኢንቴስ ኢዛ ኣላ ኢሚኮ ኢንቴ ታስ ኣይ ኢማኔ?» ጊዴስ። ኢስቲካ ኢዛስ ሄዙ ታሙ ቢራ ኢዛ ኩሼን ታይቢ ኢሚዳ።

16 ሄ ጋላሳፌ ሲሚዲ ዩሁዳይ ዩሱሳ ኢስታስ ኣሉ ኢማናስ ኢንጃ ዋዴ ናጊሼ ጋምኢዴስ።

ጎዳ ካዎ

(ማር 14:12-21፤ ሉቃ 22:7-13፤ ዮሃ 13:21-30)

17 ኡኬላ ባኣሌ ጌቴቲዛ ባኣሌ ጋላስ ኢዛ ካሊዛይቲ ዩሱሳኮ ሸቂዲ፤ «ኔ ፓዚጋ ማናሶ ኣዋን ጊጊሳና ማላ ኮያይ?» ጊዳ።

18 ኢዚካ ኢስታስ ዛሪዲ ጌዴ ካታማ ቢዲ ኤቤሎ ጌቴቲዛ ኣስ፤ «ኣስታማሬይ፤ ት ዋዴይ ማቲዳ ጊሻስ ታና ካሊዛይታራ ፓዚጋ ታ ኔ ኬላን ቦንቻና ጊዴስ» ጊ ዮቲቴ» ጊዴስ።

19 ኢዛ ካሊዛይቲካ ዩሱሲ ኢስታ ኣዛዚዳ ማላ ፓዚጋ ካዎ ጊጊሲዳ።

20 ጋዴይ ኦማርሲሺን ዩሱሲ ታማኔ ናምኣታራ ማዳን ኡቲዴስ።

21 ኢስቲ ሙሳን ዲሺን ኢዚ ኢስታስ፤ «ታ ቱሙ ጋይስ፤ ኢንቴፌ ኢሶይ ታና ኣሉ ኢማና» ጊዴስ።

22 ኢስቲካ ኬሂ ሙዞቲዲ ታራን ታራን፤ «ጎዶ ታኔሻ?» ጊዳ።

23 ኢዚካ ዛሪዲ፤ «ታና ኣሉ ኢማናዴይ ኬሬን ታናራ ኩሼ ዩዲዛዴ።

24 ኢዛ ጊሻስ ካሴ ጻፌቲዳይሳ ማላ ኣሳ ናይ ባና፤ ጊዶ ኣቲን ኣሳ ና ኣሉ ኢሚዛዴስ ኣዬ ኣና! ሃሳዴይ ዩሌቶንታ ኣቲዳኮ ኢዛስ ሎኦኮሺን» ጊዴስ።

25 ኢዛ ኣሉ ኢማና ዩሁዳይ፤ «ኣስታማሬ! ታኔሻ?» ጊዴስ። ኢዚካ፤ «ኤ፤ ኔ ጊዳ ማላ» ጊዴስ።

26 ኢስቲ ሙሳን ዲሺን ዩሱሲ ሚዛ ቁማፔ ኤኪዲ ኣንጂዴስ። ሜንሉዲኔ ባና ካሊዛይታስ ኢሚዲ፤ «ሄኢቴ ሚቴ፤ ሃይሲ ታ ኣሾኮ» ጊዴስ።

27 ቃሴካ ኡሻ ዴንሊዲ ጋላቲዲኔ ባና ካሊዛይታስ ኢሚዲ፥
«ወሪካ ሃይሳፌ ኡዩቲ፤

28 ዳሮ ኣሳ ናጋራፔ ማራና ጉኪዛ ታ ኦራላ ጫቆ ሱላይ ሃይሳ።

29 ታ ኢንቴስ ጊዛይ ታ ኣዋ ካዎቲላን ታ ኢንቴናራ ኦራላ
ዎይኔ ኡሻ ኡያና ጋካናስ ሃይሳፌ ጉዬ ሃይሳ ዎይኔ ኡሻ ኢንቴናራ
ኡዩኬ» ጊዴስ።

30 ዬላ ዬዲዳፔ ጉዬ ፑዴ ዳብራዛይቲ ጌቲቲዛ ዙማ ቦላ
ኬዚዳ።

ጴጆርሲ ኢዛ ካዳናይሳ ዬሱሲ ካሴቲ ዮቲዴስ

(ማር 14:27-31፤ ሉቃ 22:31-34፤ ዮሃ 13:36-38)

31 ዬሱሲ ኢስታስ፥ «ኢንቴ ወሪ ሃች ኦማርሲ ታናን ቆጶቲዲ
ታና ዬጊ ባና፤ «ሂሚዛይሳ ታ ሾጫና፤ ሜሄቲ ላሌታና» ጌቲቲዲ
ካሴ ጸፊቲዴስ።

32 ጊዶ ኣቲን ታኒ ዴንዲዳፔ ጉዬ ኢንቴፌ ሲንላታዳ ጋለላ
ባና» ጊዴስ።

33 ጴጆርሲ ዛሪዲ፥ «ሃንኮይቲ ወሪ ኔ ጋሶን ቆጶቲኮካ ታኒ
ሙሌካ ቆጶቲኬ!» ጊዴስ።

34 ዬሱሲካ ኢዛስ ዛሪዲ፥ «ቱሙ ጋይስ፤ ሃች ኦማርስ ኩቶይ
ዋሶንታ ካሴታዳ ሄቩቶ ኔ ታና ካዳና» ጊዴስ።

35 ጴጆርሲ ቃሴ፥ «ኔናራ ታ ሃይቃና ኮሺኮካ ሙሌካ ታ ኔና
ካዲኬ!» ጊዴስ። ዬሱሳ ካሊዛ ሃንኮይቲካ ኩሜላ ኢዛይሳላካ
ጊዳ።

ጌቲሴማኔን ዬሱሳ ዎሳ

(ማር 14:32-42፤ ሉቃ 22:39-46)

36 ሄሳፌ ጉዬ ዬሱሲ ባና ካሊዛይታራ ጌቲሴማኔ ጌቲቲዛሶ
ቢዴስ። ኢስታካ፥ «ሄ ባዳ ታ ዎሲሺን ኢንቴ ሃይሳን ኡቲሺቲ»
ጊዴስ።

37 ጴጆርሳራ ዛብዶሳ ናይታ ናምኣታ ባናራ ኤኪ ቢዲ
ሙዙቴላኔ ዳሮ ቆፊቲላ ኦይኪዴስ።

38 ሄሳፊካ፥ «ታ ሸምፖያ ሃይቃና ጋካናስ ዳሮ ሙዙታዲስ፤
ታናራ ሚኒዲ ሃኒን ታኪቲ» ጊዴስ።

39 ኢስታፌ ጉላ ጌዴ ሃኪ ቢ ጉፋኒዲ፥ «ታ ኣዋዉ! ኔስ
ዳንዳዬቲኮ ሃይሲ ሜቶይ ታፔ ኣጵ፤ ጊዶ ኣቲን ታኒ ኮዩዳ ማላ
ጊዶንታ ኔኒ ኮዩዳ ማላ ሃኖ» ጊ ዎሲዴስ።

40 ሄሳፌ ሲሚዱ ባና ካሊዛይታኮ ዩዱ ኢስቲ ሷስኪሺን ዴሚዴስ። ጴጽሮሳካ፡ «ሃይቶ አሳቶ! ኢንቴ ታናራ ኢሲ ሳቴካ ሚናናስ ጸኒዴ?»

41 ፓጩን ኢንቴ ጌሎንታ ማላ ሚኒዱ ዋሲቴ፤ አያናይ ጊጌቲዴስ ሺን አሾይ ጊዲኮ ዳቡራንቻ» ጊዴስ።

42 ቃሴካ ናምአንሶ ቢዱ፡ «ታ አዋፊ! ታ ሃይሳ ኡያናይሲ ታስ አቶንታ ሚሽ ጊዲኮ ኔ ሸኔይ ፖሌቶ» ጊዱ ዋሲዴስ።

43 ቃሴካ ኢዚ ዩሺን ኢስታ አይፌን ሷስኮይ ዴዲዳ ጊሻስ ኢቺዳይታ ቤዩዴስ።

44 ኢስታ አጊዱ ቃሴካ ቢዱ ሄሻንሶ ካሴ ዋሲዳ ቃላ ዛሪ ዋሲዴስ።

45 ሄሳፌ ባና ካሊዛይታኮ ሲሚዱ፡ «ሃኢካ ሸምፒ ሷስኪዴቲ? ሄኮ ሃኢ ሳቴይ ማቲዴስ፤ አሳ ናይ ናጋራንቻታ ኩሺን አሷ ኢሚታና።

46 ዴንዲቴ አኔ ቦስ! ታና አሏ ኢሚዛዴይ ዩሳ ቦላ ዴስ» ጊዴስ።

ዬሱሳ ኦይኬቴስ

(ማር 14:43-50፤ ሉቃ 22:47-53፤ ዮሃ 18:3-12)

47 ኢዚ ሃሳይሺን ታማኔ ናምአታፔ ኢሶይ ዩሁዳይ ዩዴስ። ቄሴታ ሃላቃቲኔ ዴሬ ጨማቲ ዩዲዳ ዳሮ አሳይ ቶራኔ ዱርቃ ኦይኪዱ ዩሁዳራ ኢሲፌ ዴስ።

48 ዩሁዳይካ፡ «ታ ዩሪዛዴይ ኢዛ ጊዲዳ ጊሻስ ኦይኪቴ» ጊዱ ካሴ ዮቲ ዋሏዴስ።

49 ሲቲ ጊ ዩሱሳኮ ቢዱ፡ «አስታማሬ! ሳሮ» ጊሼ ዩሱሳ ዩሪዴስ።

50 ዩሱሲካ፡ «ታ ላጌ! ኔ ዩዳ ቆፋ ፖላ» ጊዴስ። ሄራካ አሳይ ሸቂዱ ዩሱሳ ኦይኪ ቃቺዴስ።

51 ዩሱሳራ ዲዛይታፔ ኢሶይ ጊላ ማሻ ሾዲዱ ቄሴታ ሃላቃዛ አሽካራ ሃይሶ ቃንጺዴስ።

52 ዩሱሲካ፡ «አኔ ኔ ማሻ ኮሆን ዛራ ጌልላ፤ ማሻ ሾዲዛይቲ ማሻን ጳያና።

53 ኮሺኮ ታኒ ታ አዋ ኦይቺዛኮ ዳሮ ሺያን ቆዴቲዛ ኦሊዛ ኪታንቻ ታስ ዩዴንታ አጋና ኔስ ሚሳቲዜ?»

54 ሄሳላ ኦሊኮ ቃሴ ጌሻ ማጻፋታን ሃናና ጌቲቲዳይሲ ዋኒ ፖሌታኔ?» ጊዴስ።

55 ሄ ዎዴ ዬሱሲ አሳ፡ «ፓንጋ ኦይኪዛ አሳሉ ማሻኔ ዱርቃ ኤኪዱ ታና ኦይካና ዪዴቲ? ዎንቲን ዎንቲን ጸሳ ኬላን ኡታዳ ታ ታማርሲሺን ካሴ ኦይኪቤኬታ ሺን።

56 ጊዶ አቲን ሃይሲ ወሪካ ሃኒዳይሲ ካሴ ናቤቲ ጌሻ ማጸፋታን የቲዳይሲ ፖሌታናሳ» ጊዴሰ። ሄ ዎዴ ዬሱሳ ካሊዛይቲ ኢዛ ዩጊዱ ጳይዳ።

ፒርዳ ዱላታ ሲንሐ ዬሱሳ አዴሐ

(ማር 14:53-65፤ ሉቃ 22:54-55፤63-71፤ ዮሃ 18:13-14፤19-24)

57 ሄ ዎዴ ዬሱሳ ኦይኪዱ አሳቲ ሙሴ ዎጋ አስታማሬቲኔ ዴሬ ጨማቲ ኢሲፌ ሺቂዳሶን ቄሴታ ሃላቃ ቃያፋኮ ኤፊዳ።

58 ጊዶ አቲን ጴጽሮሲ ቄሴታ ሃላቃ ጊቤ ጋካናሰ ሃሆራ ዬሱሳ ካሊዴሰ። ጊቤ ጊዶ ጌሊዱ ሃኒዛይሳ ወርሴሐ ቤያናሰ። ጊቤ ናጊዛይታራ ኡቲዴሰ።

59 ሄ ዎዴ ቄሴታ ሃላቃቲኔ አይሁዳታ ዱላታይ ኩሜሐ ዬሱሳ ዎጲሳናሰ ዎርዶ ማርካ ኮዪዴሰ።

60-61 ዳሮ ዎርዶ ማርካቲ ሺቂኮካ ቤሲዛ ማርካቴሐ ዴሚቤቴና፤ ጊዶ አቲን ጉዬፔ ናምኡ አሰ ዳይቲ ሺቂዳ፡ «ሃይሲ አዴዚ፡ ታኒ ጸሳ ኬላ ላላዳ ሄዡ ጋላሳራ ዛራዳ ኬጸና ዳንዳያይሰ» ጊዴሰ» ጊዱ ማርካቲዳ።

62 ሄሳ ሲዪዳ ቄሴታ ሃላቃይ ኡቴላፌ ዴንዱ ኤቂዳ፡ «ሃይቲ አሳቲ ኔ ቦላ ማርካቲዛይሳሰ አይኮካ ዛሪኪ?» ጊዴሰ።

63 ዬሱሲካ ጮኡ ጊዴሰ። ቄሴታ ሃላቃይ፡ «ታ ኔና ዴኦ ጸሳ ሱንላን ኦይቻይሰ! ኔኒ ጸሳ ና ኪርሰቶሳ ጊዲኮ ታሰ የታ!» ጊዴሰ።

64 ዬሱሲካ፡ «ኔ ጎይሳካ ማላ፤ ጊዶ አቲን ኢንቴሰ ኡባሰ ታ የቲዛይ ሲንላፌ አሳ ናይ ዎልቃማዛ ኡሻቻን ኡቲዱ ሳሎ ሻራራ ዪዛ ዎዴ ኢንቴ ቤያና» ጊዴሰ።

65 ሄ ዎዴ ቄሴታ ሃላቃይ ባ ማይኦ ዳኪዳ፡ «ጸሳ ቦላ ጫሻ ቃላ ሃሳይዴሰ፤ ኮሰ ሃይሳፌ አዲዛ ሃራ አዛ ማርካ ኮሺዜ! ጸሳ ቦላ ጫሻ ቃላ ኢዚ ሃሳይሺን ኢንቴ ኢንቴ ሃይላራ ሲዪዴታ።

66 ኢንቴሰ አይ ሚሳቲዜ?» ጊዴሰ። ኢሰቲካ ዛሪዱ ኢዛሰ፡ «ሃይቆይ ኢዛሰ ቤሴሰ» ጊዳ።

67 ሄ ዎዴ ዬሱሳ አይፌሶን ጨቲሼ ኢዛ ኢጨዳ፤ ባጋይቲ ኢዛ ባቂሼ፡

68 «ኪርሰቶስ! ኔ ኔና ናቤ ጋሳ ሺን ኔና ባቂዳይ ኦናኮን ኣኔ ኑስ ዮታ» ጊዳ።

ጴጥሮስ ዩሱሳ ካዲዴስ

(ማር 14:66-72፤ ሉቃ 22:56-62፤ ዮሃ 18:15-18፤25-27)

69 ሄሳፌ ጉዬ ጴጥሮስ ቄሴታ ሃላቃዛ ጊቤን ኡቲ ዲሺን ኩፋ ጊዶን ኦሊዛ ኢሲ ማጫስ ዲዛራ ኢዛኮ ሺቃዳ፡ «ኔኒካ ጋለላ ዩሱሳራ ዲዛዴ!» ጋዱስ።

70 ኢዚ ቃሴ፡ «ኔ ኣይ ጊዛኮ ታ ኤሪኬ!» ጊዲ ኡባ ኣሳ ሲንሳን ካዲዴስ።

71 ጊቤዛ ፔንጌ ኢዚ ቢሺን ኢሲ ሃራ ኦሳንቻያ ኢዛ ጴላዳ ሄን ዲዛይታስ፡ «ሃይሲ ኣዴዚ ናዚሬቲ ዩሱሳራ ዲዛዴኮ!» ጋዱስ።

72 ኢዚካ፡ «ታ ኢዛ ኤሪኬ!» ጊዲ ናሞኣንፋ ካዲዴስ።

73 ጉሐ ጋሞኢሺን ሄን ኤቂዳ ኣሳቲ ሸቂዲ ጴጥሮስ፡ «ኔ ሃሳያይ ኔ ሃይታራ ዲዛይሳ ቆንጨሴስ፤ ቱማፔ ኔ ኢስታ ባጋ ኣሳ» ጊዳ።

74 ኢዚካ ጫቂሼኔ ኣማቲሼ፡ «ሄሳ ኣዴዛ ታ ኤሪኬ!» ጊዴስ። ሄሪካ ኩቶይ ዋሲዴስ።

75 ሄ ዎዴ ዩሱሲ ካሴ ጴጥሮስ፡ «ኩቶይ ዋሳናስ ኔ ታና ሄሹቶ ካዳና» ጊዲ ዮቲዳ ቃላይ ቆፊቲን፡ ጴጥሮስ ካሬ ኬዚዲ ጫሞ ዩሆ ዩኪዴስ።

27

የሁዳ ካቂቲሐ

(ማር 15:1፤ ሉቃ 23:1-2፤ ዮሃ 18:28-32)

1 ማላዶ ዋንታራ ቄሴታ ሃላቃቲኔ ዴሬ ጨማቲ ዉሪካ ዩሱሳ ዎዳና ኦጌ ዘሬቲዳ።

2 ዩሱሳ ቃቺ ኤፊዲ ዴሬ ሃሪዛ ጲላጶሳስ ኣሊ ኢሚዳ።

3-4 ኢዛ ኣሊ ኢሚዳ የሁዳይካ ዩሱሳ ቦላ ፒርዴቲዳይሳ ቤኢዲ፡ «ታ ኢዛ ኣላ ኢሞንታ ኣጋርኪና» ጊዲ ባ ኤኪዳ ሄሹ ታሙ ቢራ ቄሴታ ሃላቃታሲኔ ዴሬ ጨማታስ ዛሪ ኢሚዳ፡ «ጲሎ ኣስ ኣላ ኢሚዳ ጊሻስ ታ ሞራዲስ» ጊዴስ። ኢስቲካ፡ «ሂስቲን ኑስ ኣይ ሜቶ! ኔ ኤራ ኤካ!» ጊዳ።

5 ሄሳ ጊሻስ የሁዳይ ቢራ ኤፊዲ ጶሳ ኩፋ ጊዶን ዩጊዲ ኬዚ ቢዲ ጨሌቲ ሃይቂዴስ።

6 ቄሴታ ሃላቃቲ ቢራ ዴንሊዲ፡ «ሱፋ ዋጋ ጊዲዳ ጊሻስ ጶሳ ኩፋ ሚሻን ጉጃናስ ቤሴና» ጊዳ።

7 ባ ጊደን ዘሬቲዲ አማሕ ጊዲዳ አሳታሰ ዱፎ ጊዳና ማላ ኢሲ ኡርቃ ሚሽ ሜዲዛ ሂላዛ ጋዴ ሻሚዳ።

8 ሄሳ ጊሻስ ሄ ጋዴይ ሃች ጋካናሰ ሱላ ጋዴ ጌቴቴስ።

9-10 ኢዛስ ዋጋ ጊዳና ማላ፥ «ኢስራኤል ናይቲ ሄሬጊዳ ሄዡ ታሙ ቢራ ቆዲ ኤኪዳ። ጸሲ ታና ኣዛዚዳ ማላ ኡርቃ ሜዲዛ ሂላዛ ጋዴስ አሚዳ» ጌቴቲዲ ናቤ ኤርማሳ ዶናን ዮቴቲዳይሲ ፖሌቲዳስ።

ጲላጸሳ ሲንሐ ዬሱሳ ሸቆ

(ማር 15:2-5፤ ሉቃ 23:3-5፤ ዮሃ 18:33-38)

11 ሄ ዋዴ ዬሱሲ ዴሬ ሃሪዛይሳ ሲንሐ ሸቂዳስ። ዴሬ ሃሪዛይሲካ፥ «ኔኒ አይሁዳ ካዎ?» ጊዲ ኢዛ ኦይቺዳስ። ዬሱሲካ፥ «ኔ ጊዳ ማላ ጊደ» ጊዳስ።

12 ቄሴታ ሃላቃቲኔ ዴሬ ጨማቲ ኢዛ ሞቲሺን ዬሱሲ ኢስታሰ አይኔ ዛሪቤና።

13 ሄ ዋዴ ጲላጸሲ ዬሱሳ፥ «ኣፑን ዮኦን ኔና ሞቲዛኮ ሲዪኪ?» ጊዳስ።

14 ዴሬ ሃሪዛይሲ ኬሂ ማላሌታና ጋካናሰ ዬሱሲ ኢሲ ቃላካ ዛሪቤና።

15 ዴሬ ሃሪዛይሳስ ባኣሌ ጋላስ ዴሬይ ቃሾ ኣሳፔ፥ «ኤቤሎይ ኑስ ቢርሼቶ!» ጊ ኦይቺኮ አሳዴ ቢርሺዛ ዋጋይ ዳስ።

16 ሄ ዋዴ ጌኔ ኦሶን ኤሬቲዳ ባርባኔ ጌቴቲዛ አሳዴይ ቃሾሶን ዳስ።

17 ዴሬይ ሸቂዳ ማላ ጲላጸሲ፥ «ባርባኔፔኔ ኪርሰቶሳ ጌቴቲዛ ዬሱሳፔ ታ ኢንቴስ ኦና ቢርሻና ማላ ኮዬቲ?» ጊዳስ።

18 ጲላጸሲ ኢስታ ጮ ቃናቴስ ኣሊ አሚዳይሳ ኤሪሼ ኦይቺዳስ።

19 ኢዚ ፒርዳ ኣልጋ ቦላ ኡቲ ዲሺን ኢዛ ማቺያ፥ «ኢዛ ጋሶን ሃች ታኒ ኣጉሞራ ዳሮ ሜቶታዲስ፤ ሄሳ ጲሎ ኣዴዛ ቦላ ኔ ኣይኮካ ኦፋንታ ማላ» ጊዛ ኪታ ጲላጸሳስ ዬዳዱስ።

20 ጊደ ኣቲን ቄሴታ ሃላቃቲኔ ጨማቲ ኢስታሰ ባርባኔይ ቢርሼታና ማላኔ ቃሴ ዬሱሳ ዋቆና ማላ ዋሳናስ ዴሬዛ ቃላይ ጋጋና ማላ ኦሊዳ።

21 ዴሬ ሃሪዛይሲ፥ «ናሞኣታፔ ኦና ቢርሻና ማላ ኮዬቲ?» ጊ ኦይቺን ኢስቲ፥ «ባርባኔ ቢርሻ!» ጊዳ።

22 ጲላጸሲካ፥ «ሂስቲኮ ኪርሰቶሳ ጌቴቲዛ ዬሱሳ ዋስቶ?» ጊዳስ። ኢንቴ ዉሪካ፥ «ካቄቶ!» ጊዳ።

23 ጰላጸሲካ አዛሰ? «ኢዚ አይ ኢታ ኦሴዴ?» ጊዲ ኢሰታ ኦይቺዴሰ። ኢሰቲካ ቃሴ ኬሂ ዋሲዲ፤ «ካቁቶ!» ጊዲ።

24 ጰላጸሲ ሃኒዛይሲ ወሪካ አሳይ ባ ጊዲን ቡልኦኬቴላፊ አቲን ሃራ አይ ጎአይ ባይንዳይሳ ዩሺ ጸሊዲ፤ «ሃይሳ አዴዛ ሱላ ጎሜፔ ታ ጌሻ፤ ሃይሳፊ ጉዬ አንቴ ሽኔ» ጊዲ ሃሰ ኤሂሲዲ ዴሬዛ ሲንላን ባ ኩሺ ሜጩቲዴሰ።

25 ዴሬይ ወሪ፤ «ኢዛ ሱሊ ኑ ቦላኔ ኑ ናይታ ቦላ ጋኮ» ጊዲ ዛሪዴሰ።

26 ሄ ዋዴ ባርባኔ ኢሰታሰ ቢርሺዲ ዬሱሳ ጋራፊሲዳፔ ጉዬ ካቃና ማላ አሊ ኢሚዴሰ።

ዬሱሳ ቦላ ዋታዳራታ ቂልጫ

(ማር 15:16-21፤ ዮሃ 19:2-3)

27 ሄሳፊ ዋታዳራቲ ዬሱሳ ጌዴ ዴሬ ሃሪዛይሳ ጊቤ ኤኪ ቢዲ ወሪ ሸቂዲ ዬሱሳ ጊዶ አሊዲ።

28 ኢዛ ማይኦ ቃሪዲ ሃራ ዘኦ ማይኦ ማይዚዲ።

29 አጉንላ አኪሊሌ ጳጲዲ ገግሲዲ፤ ኢዛ ሁኤ ቦላ ዋሊዲ፤ ሸምቦቆ ጉፊ ኡሻቻ ኩሺን ኦይሊዲኔ ኢዛ ሲንላን ጉልባቲዲ፤ «አይሁዳ ካዋ! አንቴሰ ቶ!» ጊዲ ኢዛ ቂዲዲ።

30 ኢዛ ቦላ ጩቲዲ፤ ሸምቦቆ ጉፊዛ ኢዛ ኩሺፔ ኤኪዲ ዬሱሳ ሁኤን ዛሪ ዛሪዲ ሸጪዲ።

31 ኢዛ ቦላ ቂዲ ካኢዳፔ ጉዬ ቃሴካ ዘኦ ማይኦዛ ቃሪ ኤኪዲኔ ካሴ ኢዛ ማይኦዛ ዛሪ ማይዚዲ ካቃናሶ ኤኪ ቢዲ።

ዬሱሳ ካቂቴሰ

32 ኢሰቲ ኤኪ ቢሺን ቃሪና ጌቲቲዛሶፔ ዱዳ ሲሞና ጌቲቲዛይሳ ዴሚዲ ማሰቃሌዛ ኢዛ ዋልቃራ ቶሲዲ።

33-34 ቢርሺላይ፤ «ሁኤ ጉጌ» ጌቲቲዛ ጎልጎታ ጋኪሺን ጪዬራ ዋላኬቲዳ ዋይኔ ጫጃ፤ «ኡያ» ጊዲ ኢሚዲ፤ ጊዶ አቲን ኢዚ ጋንጺ ኤኪዲ ኡያና ኮዩቤና።

35 ኢዛ ካቂዳፔ ጉዬ ኢዛ ማይኦዛ ቦላ ሳማ ዬጊዲ ጊሸቲዲ።

36 ሄን ኡቲዲ ኢዛ ናጊዲ።

37 «ሃይሲ አይሁዳ ካዋ ዬሱሳ» ጊዛ ሞቶ ቃላ ኢዛ ሁኤፔ ቦላራ ዋሊዲ።

38 ናሞኡ ፓንጋታፔ ኢሶይ ዬሱሳፔ ኡሻቻ ባጋራ፤ ኢሶይ ሃዲርሳ ባጋራ ኢዛራ ኢሲፊ ካቂቲዲ።

39-40 እጌራ አዲ ቢዛ አሳይ ጫዩሼኔ ሁኤ ቃሊሹ፥ «ጸሳ ኬላ ላላዳ ሄሹ ጋላሳን ዛራ ኬጸና ጊዛይሶ! እኔ ኔና አሻ፤ ኔ ጸሳ ና ጊዲኮ እኔ ማስቃሌዛ ቦላፌ ዋዳ» ጊዳ።

41 ቄሴታ ሃላቃቲ ዳሬ ጨማታራ ጊዲዲ ኢዛ ቦላ ቂዲሹ፤

42 «ሃራ እሳ አሺዴስ ሺን ባና አሻናሰ ዳንዳይቤና፤ ኢዚ ኢስራኤሌ ካዋ ጊዲኮ እኔ ሃኢ ማስቃሌ ቦላፌ ዋዳ፤ ኑኒካ ኢዛ አማናና።

43 ጸሳን አማኔቲዴስ፤ ባና ጸሳ ና ጊዳ ማላ ጸሲ ኢዛ ዶሲዛ ጊዲኮ እኔ ሃኢ ኢዛ አሾ» ጊዳ።

44 ኢዛራ ኢሲፌ ካቂቲዳ ፓንጋቲካ ሄሳሶ ጫሻ ቃላ ኢዛ ቦላ ቆቆፊዳ።

ዩሱሳ ሃይቆ

(ማር 15:33-41፤ ሉቃ 23:44-49፤ ዮሃ 19:28-30)

45 ጋላስ ኡሱፑን ሳቴፔ ቢዲ ኡዱፋን ሳቴ ጋካናሰ ኩሜላ ቢታይ ቶሚዴስ።

46 ኡዱፋን ሳቴ ጊዲሺን ዩሱሲ ቃላ ቶቄ ሂስቲዲ፥ «ኤሎሄ! ኤሎሄ! ላማ ሳባቂታኔ» ጊዲ ዋሲዴስ። ሄሳ ጉሳስ ቢርሼላይ፥ «ታ ጸሶ! ታ ጸሶ! ታና አይስ አጋዲ?» ጉሳ።

47 ሄን ኤቂዳ አሳፔ ኢሲ ኢሲ አሳቲ ኢዛ ዋሶዛ ሲዩዲ፥ «ኤላሳ ያይጌስ» ጊዳ።

48 ኢስታፌ ኢሳዴይ ዋጺ ቢዲ ዛንሻ ሚሳቲዛ ሳፊኔጌ ጌቲቲዛ ሚሽ ኤኪዲ ጫሊዳ ዋይኔ ጫጄን ዩጊ ጫጺሲዲኔ ሾምቦቆ ጌቲቲዛ ሚላ ያራን ቃጺዲ ኡያና ማላ ዩሱሳ ዶናኮ ሺሺዴስ።

49 ሃንኮ አሳይ ቃሴ፥ «አጋጊቲ እኔ፥ ኤላሲ ዩዲ ኢዛ አሺሺን ቤያና» ጊዳ።

50 ዩሱሲ ቃሴካ ቶቃ ቃላን ዋሲዲ ሾምፖ ኬዚዴስ።

51 ሄ ዋዴ ጸሳ ኬላ ማጋላሻይ ቦላ ሁኤራ ዱጌ ሲሚ ዳኬቲዲ ናምኡ ኬዚዴስ፤ ቢታይ ቃጺዴስ፤ ዛላቲ ዛኢዳ።

52 ዱፎቲ ዶዩቲዳ፤ ካሴ ሃይቂዳ ጸሳ አሳፔ ዳሪዛ ባጋይ ዴንዲዴስ።

53 ዱፎፔ ኬዚዲ ዩሱሳ ዴንላፌ ጉዬ ጌሻ ካታማ ጌሊዲ ዳርታ አይፌን ቤቲዳ።

54 ማቶ ሃላቃይኔ ኢዛራ ኢሲፌ ዬሱሳ ናጊዛይቲ ቢታ ቃላኔ ሃኒዳይሳ ኡባ ቤኢዲ ዳር ባቢዳ። ቃሴ፥ «ሃይሲ ቱማፔ ጸሳ ናኮ!» ጊዳ።

55 ጋለላፔ ዬዲ ዬሱሳ ኮሺዛዛን ኦሊ ማዳናስ ካሊዛ ዳር ማጫሳቲ ሃኒዛይሳ ወርሲካ ሃሆራ ዴሊሼ ሄን ዴቲስ።

56 ኢስታ ጊዶን ማግዳሌፔ ዬዳ ማራሚራኔ፥ ያቆቤኔ ዮሴፌ ኣዮ ማራሚራ፥ ቃሴካ ዛብዶሳ ናይታ ኣዬይራ ኢሲፌ ዴቲስ።

ዬሱሳ ሞጌቲል

(ማር 15:42-47፤ ሉቃ 23:50-56፤ ዮሃ 19:38-42)

57 ጋዴይ ኦማርሲሺን ዮሴፌ ጌቲቲዛ ኢሲ ዱሬ ኣዴ ዳይሲ ኣርማቲያሴ ጌቲቲዛሶፔ ዬዴስ። ኢዚካ ባ ባጋራ ዬሱሳ ካሊዛዴ።

58 ኢዚ ጲላጶሳ ሲንሉ ሸቂዲ ዬሱሳ ኣሃ ኢዛስ ኢማና ማላ ሞሲን ጲላጶሲካ ኢዛስ ኢማና ማላ ኣዛዚዴስ።

59 ዮሴፌይ ኣሃ ኤኪዲ ጌሽ ጊዲዳ ሞሳ ኣፋላን ጸጺዴስ።

60 ሹቕ ዋጪዲ ባስ ጊግሲዳ ዱፎን ኤፊ ዋሉዲ ጌታ ሹቕ ጌንዴሪሲ ዱፎዛ ጎርዲዴስ።

61 ሄ ዋዴ ማግዳሌ ማራሚራኔ ሃንኮ ማራሚራ ዱፎዛ ጌናን ኡቲዳ።

62 ሳምባታስ ጊጌቲዛ ዋንቴላ ጋላስ ቄሴታ ሃላቃቲኔ ፋርሳዌቲ ጲላጶሳ ሲንሉ ሸቂዳ።

63 «ጎዶ! ሄ ዋርዶይ ካሴ ፓጶ ዲሼ፥ «ሄሹ ጋላሳፌ ጉዬ ታ ዴንዳና» ጊዳ ቃላይ ኑ ዋዚናን ቱርቕ ጊዴስ።

64 ሄሳ ጊሻስ ኢዛ ካሊዛይቲ ኢዛ ኣሃ ካይሶቲ ኤኪዲ ዴራስ፥ «ኢዚ ሃይቆፔ ዴንዲዴስ» ጊዲ ዋራሶንታ ማላ ሄሻንሉ ጋላስ ጋካናስ ዱፎይ ናጌታና ማላ ኣዛዛ፤ ኣካይ ጌኮ ካሴይሳፌ ጉዬ ባላይ ኣጼል ጊዳና» ጊዳ።

65 ጲላጶሲ፥ «ኢንቴስ ናጊዛይቲ ዴቲስ፤ ቢዲኔ ኢንቴስ ኤሬቲዳ ማላ ናጊሲቲ» ጊዴስ።

66 ኢስቲካ ቢዲ ዱፎዛ ዶና ማታሜን ጎርዲዲ ናጋና ዛቤ ኤሲዳ።

28

ሃይቆፔ ዬሱሳ ዴንል

(ማር 16:1-8፤ ሉቃ 24:1-12፤ ዮሃ 20:1-10)

27:63 ማቶ 16:21፤ 17:23፤ 20:19፤ ማር 8:31፤ 9:31፤ 10:33-34፤ ሉቃ 9:22፤ 18:31-33

1 ሳምባታይ አዲድ ጉዬ ሳሚንታፌ ኮይሮ ጋለስ ቡሮ ሳሎይ ዘኢሸን ማግደሌ ማራማኔ ሃንኮ ማራማ ዱፎዛ ቤያና ቢዳ። *

2 ቆፖንታ ዱሸን ጌታ ቢታ ቃሊ ሃኒዳስ፤ ጎዳ ኪታንቻይካ ሳሎፔ ዋጂ ዱፋኮ ቢዱ ሹቻ ጌንዴሪሲዱ ኢዛ ቦላ ኡቲዳስ።

3 ኪታንቻዛስ ሜዳይ ዋልቃንላ ፖኦ ማላ፤ ኢዛ ማይኦይካ ሻቻ ማላ ቦላ።

4 ዱፎ ናጊዛይቲ ኪታንቻዛስ ባቢ ኮኮሪዲኔ ሃይቄል ሚሳቲዳ።

5-6 ኪታንቻዚ ማጫሳታ፡ «ባቦፍቴ፤ አንቲ ካቄቲዳ ዬሱሳ ኮይዛይሳ ታ ኤራይስ፤ ኢዚ ሃኢ ሃን ባ፤ ኢዚ ካሴ ዮቲዳ ማላ ሃይቆፔ ዴንዲዳስ፤ ሃ ዬዱ ኢዚ ኢቺዳሶ ቤኢቲ።

7 ሃኢካ ኤሌሊ ቢዱ ኢዛ ካሊዛይታስ፡ «ሃይቆፔ ዴንዲዳስ። አንቲፌ ካሴቲዱ ጋለላ ቤስ፤ አንቲ ኢዛ ሄን ዴማና፤ ጌዱ ዮቲቲ። ሂኢ ታ አንቲስ ዮታዲስ» ጌዳስ።

8 ማጫሳቲካ ባቦኒኔ ኡፋይሳን ኩሚዱ ኢዛ ካሊዛይታስ ዮታናስ ኤሌሊዱ ዋላን ዱፎዚ ዲዛሶ ዬጊ አጊዱ ቢዳ።

9 ሄራካ ዬሱሲ ኢስታ ዴሚዱ፡ «ሃይቶ ሳር» ጌዳስ። ኢስቲካ ዬሱሳኮ ሸቂዲኔ ኢዛ ቶሆ ኦይኪዱ ኢዛስ ጎይኒዳ።

10 ዬሱሲ ኢስታ፡ «ባቦፍቴ! ቢዲኔ ኢስቲ ጋለላ ባና ማላ ታ አሻታስ ዮቲቲ። ኢስቲ ታና ሄን ቤያና» ጌዳስ።

ናጊዛይታ ማርካቴል

11 ማጫሳቲ ቡሮ ኦጌ ቦላ ዱሸን ናጊዛይታፔ ባጋቲ ካታማ ቢዱ ሃኒዳይሳ ኡባ ቄሴታ ሃላቃታስ ዮቲዳ።

12-13 ቄሴታ ሃላቃቲካ ዴሬ ጨማታራ ሸቄቲዱ ዙሬቲዳ፤ ዋታዳራታስ ጌዱዛ ሚሽ አሚዱ፡ « ኅኒ ጂስኮን ዱሸን ኢዛ ካሊዛይቲ ቃማራ ዬዱ ካይሶቲ ኤፊዳ፤ ጌቲ ጌዳ።

14 ሃይሲ ዋሬይ ዴሬ ሃሪዛይሳ ማታን ሲዬቲኮካ ኑኒ ኢዛስ ሎኤል ዮታና፤ ኣይኮ ኢታይካ አንቲ ቦላ ጋኮንታ ማላ ኑ ኦፋና» ጌዳ።

15 ዋታዳራቲካ ሚሻ ኤኪዱ ኢስቲ ጌዳ ማላ ኦሊዳ፤ ሃይሲ ዮኦዚ ሃኝ ጋካናስ ኣይሁዳታ ኣቻን ዳርሶን ዮቲቲሼ ዴስ።

ባና ካሊዛይታ ኣይፌን ዬሱሳ ቤቶ

(ማር 16:14-18፤ ሉቃ 24:36-49፤ ዮሃ 20:19-23፤ ሃዋ 1:6-8)

16 ሄሳፌ ጉዬ ዬሱሳ ካሊዛ ታማኔ ኢሲኔቲ ዬሱሲ ኢስታ ቤሲዳ ጋለላን ዲዛ ዙማ ቦላ ኬዚዳ።

* 28:1 ሳምባታ ሃይሳ ቦላ ሳምባታይ ቄራ ጋላሳ።

17 ዩሱፋ በኢዳ ማላ ኢዛስ ጎይኒዳ፤ ኢስታ ጋርሳፌ ጉጺዛ ባጋቲ ሲጷድ።

18-20 ዩሱሲካ ባና ካሊዛይታኮ ሸቂዱ፥ «ሳሎኒኔ ሳኣን ጎዳቴሉ ታስ ኢሜቲዳስ። ሄሳ ጊሻስ ቢዲ ዳሬ ኡባ ኣዋ፥ ናዛኔ ጸሎ ኣያና ሱንፋን ጸማቂሼ፥ ታና ካሊዛይታ ኦሊቴ፤ ታ ኢንቴና ኣዛዚዳይሳ ኡባ ናጋና ማላ ታማርሲቴ። ታኒካ ኣላሜ ወርሴል ጋካናስ ኢንቴናራ ዳይስ» ጊዳስ።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b